

("Službene novine BPK Goražde" broj:9/13 I 11/14)

Na osnovu člana 23.b) Ustava Bosansko-podrinjskog kantona Goražde ("Službene novine Bosansko-podrinjskog kantona Goražde" broj: 8/98, 10/00 i 5/03), na prijedlog Vlade Bosansko-podrinjskog kantona Goražde, Skupština Bosansko-podrinjskog kantona Goražde na sjednici održanoj dana _____.____.2013.godine, donosi:

ZAKON

O DOPUNSKIM PRAVIMA BRANILACA I ČLANOVA NJIHOVIH PORODICA U BOSANSKO – PODRINJSKOM KANTONU GORAŽDE

I OSNOVNE ODREDBE

Član 1.

Ovim Zakonom uređuju se prava, uslovi i postupak za ostvarivanje prava, korištenje i prestanak prava, sredstva za finansiranje prava, kao i druga pitanja od značaja za ostvarivanje prava ratnih vojnih invalida i članova njihovih porodica, članova porodica šehida - poginulih, umrlih i nestalih branilaca, dobitnika ratnih priznanja i odlikovanja i članova porodica poginulih, umrlih i nestalih dobitnika ratnog priznanja i odlikovanja, ratnih vojnih zarobljenika i demobiliziranih branilaca i članova njihovih porodica, kao lica zaslužnih u odbrambeno-oslobodilačkom ratu sa područja Bosansko – podrinjskog kantona Goražde (u daljem tekstu: Kanton), a u skladu sa raspoloživim budžetskim sredstvima planiranim za određeno pravo, s tim što sredstva za ostvarivanje prava utvrđenih ovim Zakonom ne mogu biti manja od 5% izvršenja Budžeta Bosansko-podrinjskog kantona Goražde u predhodnoj godini.

Odredbe ovog Zakona se primjenjuju i na lica iz stava 1. ovog člana, koja nemaju prebivalište odnosno boravište na području Kantona, a ostvarila su povratak u Republiku Srpsku u općinama: Foča, Čajniče, Rudo, Višegrad, Rogatica, Pale i Novo Goražde, s tim da su na dan potpisivanja "Općeg okvirnog sporazuma za mir u BiH"(14.12.1995.g.), imala boravište na području Kantona.

Član 2.

U skladu sa odredbama Zakona o pravima branilaca i članova njihovih porodica («Službene novine Federacije BiH» broj: 33/04, 56/06, 70/07 i 9/10), Zakona o posebnim pravima dobitnika ratnih priznanja i odlikovanja i članova njihovih porodica («Službene novine Federacije BiH» broj: 70/05, 61/06 i 9/10) kod regulisanja prava i pogodnosti koja se tiču branilaca i članova njihovih porodica, utvrđenih ovim Zakonom i drugim propisima na području Kantona, koriste se slijedeći pojmovi i definicije:

Braniocem se smatra pripadnik Armije Republike Bosne i Hercegovine, Hrvatskog vijeća odbrane i policije nadležnog organa unutrašnjih poslova (u daljem tekstu: Oružane snage) koji je učestvovao u odbrani Bosne i Hercegovine (početak agresije na općinu Ravno) od 18.09.1991. do 23.12.1996.godine, odnosno do prestanka neposredne ratne opasnosti i koji je demobilisan rješenjem nadležnog vojnog organa, kao i lice koje je učestvovalo u pripremi za odbranu i u odbrani Bosne i Hercegovine u periodu prije 18.09.1991.godine, a koje je angažirano od nadležnih organa;

Pod učešćem u odbrani Bosne i Hercegovine, u smislu stava 2. ovog člana, podrazumjeva se učešće u oružanom otporu i djelovanje u direktnoj vezi sa pružanjem otpora;

Dobrovoljcem i organizatorom otpora smatra se pripadnik vojnih jedinica koji je učestvovao u pripremi za odbranu i u odbrani Bosne i Hercegovine, u periodu do 19.06.1992.godine, kao i drugo lice koje nije bilo vojni obveznik u vrijeme dobrovoljnog stupanja u Oružane snage i ostao neprekidno u jedinicama do kraja rata, ili je ranije demobilisan od nadležnog vojnog organa;

Veteranom se smatra lice koje je stupilo u jedinice iz stava 2. ovog člana, od 18.09.1991. do 31.12.1992.godine i ostao neprekidno do 23.12.1995.godine, ili ranije demobilisan od nadležnog vojnog organa;

Učesnikom rata smatra se svako lice koje je u sastavu Oružanih snaga iz stava 2. ovog člana provelo najmanje jednu godinu dana neprekidno u periodu od 20.06.1992. do 23.12.1995.godine;

Član porodice šehida, poginulog, umrlog, nestalog branioca i umrlog ratnog vojnog invalida, u smislu ovog Zakona, je korisnik prava na porodičnu invalidninu, na osnovu konačnog rješenja nadležnog organa, izdatog u skladu sa važećim federalnim propisima iz oblasti boračko – invalidske zaštite;

Ratni vojni invalid, u smislu ovog Zakona, je državljanin Bosne i Hercegovine koji je vršeci vojne i druge dužnosti za ciljeve odbrane u sastavu Oružanih snaga, učestvujući u odbrani Bosne i Hercegovine u periodu i pod uslovima i okolnostima iz člana 2. stav 2. ovog Zakona, zadobio ranu, povredu, bolest ili pogoršanje bolesti, pa je zbog toga nastupilo oštećenje njegovog organizma najmanje za 20%;

Ratni vojni invalid je i državljanin Bosne i Hercegovine koji je po naređenju ili nalogu nadležnog vojnog organa ili organa uprave nadležnog za poslove odbrane i državne sigurnosti, pod uslovima i okolnostima iz prethodnog stava, zadobio ranu, povredu, bolest ili pogoršanje bolesti, pa je zbog toga nastupilo oštećenje njegovog organizma najmanje za 20%;

Ratni vojni invalid je i lice koje je u periodu i pod uslovima i okolnostima iz stava 2. i 3. ovog člana bilo ratni zarobljenik i zadobilo ranu, povredu, bolest ili pogoršanje bolesti, pa je zbog toga nastupilo oštećenje njegovog organizma najmanje za 20%;

Ratni vojni invalid je i stranac kod koga je nastupilo oštećenje njegovog organizma pod okolnostima i uslovima iz stava 2., 3. i 4. ovog člana;

Dobitnik ratnog priznanja ili odlikovanja, u smislu ovog Zakona, smatra se državljanin Bosne i Hercegovine, koji je u periodu iz člana 2. ovog Zakona, više puta iskazao ličnu hrabrost, požrtvovanost i lični doprinos u borbi za odbranu i oslobođenje Bosne i Hercegovine, odnosno koji se naročito istakao u oružanom suprotstavljanju agresoru ili koji je doprinio proširenju slobodnih dijelova Bosne i Hercegovine, pa mu je u skladu sa propisima dodjeljeno ratno priznanje ili odlikovanje:

Značka "Zlatni ljiljan"	Red hrvatskog trolista
Orden slobode	Red bana Jelačića
Orden heroja oslobodilačkog rata	Red Nikole Šubića Zrinskog
Orden oslobođenja	Red kneza Domagoja s ogrlicom
Orden zlatnog grba sa mačevima	Red hrvatskog pletera
Orden zlatnog ljiljana sa zlatnim vijencem	
Orden zlatnog ljiljana sa srebrenim vijencem	
Medalja za hrabrost	
Medalja pobjede	
Medalja otpora	
Medalja za vojne zasluge	
Policijska medalja za hrabrost	
Zlatna policijska značka – zvijezda	
Srebrena policijska zvijezda	
Srebreni štit	

Član 3.

Članovi porodice lica iz člana 2. ovog Zakona su:

1. bračni partner, djeca rođena u braku i van braka (uža porodica);
2. usvojena djeca, kao i pastorčad koja žive u zajedničkom domaćinstvu sa licima iz prethodnog člana;
3. roditelji i usvojilac;
4. očuh i maćeha koji žive u zajedničkom domaćinstvu sa licima iz prethodnog člana;
5. djed i nena – po ocu i po majci koji su se starali o podizanju i vaspitanju lica od koga izvode pravo i sa kojim žive u zajedničkom domaćinstvu i koji su živjeli u zajedničkom domaćinstvu sa licima iz prethodnog člana neposredno prije njegovog stupanja u Oružane snage pod uslovom da nema lica iz tač. 1.,2.,3. i 4. ovog stava;
6. maloljetna braća i sestre kao i braća i sestre nesposobni za privređivanje, a čija je nesposobnost nastupila prije 15. godine života, ako zajedno žive sa licem iz prethodnog člana i ukoliko nemaju roditelje, odnosno članove uže porodice;
7. vanbračni partner lica iz prethodnog člana sa kojim živi u zajedničkom domaćinstvu najmanje tri godine ili kraće, ako imaju zajedničko dijete.

Član 4.

Zajedničko domaćinstvo, u smislu ovog Zakona, smatra se zajednica života, stanovanja, privređivanja i trošenja ostvarenih prihoda.

Član 5.

Sa borcima – braniteljima u smislu ovog Zakona, izjednačeni su u pravima učesnici narodno-oslobodilačkog antifašističkog rata 1941-1945.godine, čiji je status utvrđen rješenjem nadležnog organa.

II PRAVA

Član 6.

Lica iz člana 2. ovog Zakona imaju prema načinu i obimu utvrđenim ovim Zakonom, slijedeća prava:

1. Zdravstvena zaštita;
2. Banjsko i klimatsko liječenje;
3. Naknada putnih troškova i troškova za liječenje u inozemstvu;
4. Prava po osnovu preostale radne sposobnosti;
5. Participacija troškova za nabavku lijekova koji nisu na esencijalnoj listi;
6. Novčana naknada za vrijeme nezaposlenosti;
7. Stimulativne mjere i prednost pri zapošljavanju;
8. Prednost pri korištenju programa Službe za zapošljavanje Bosansko-podrinjskog kantona Goražde
9. Stimulativne mjere pri zapošljavanju i samozapošljavanju;
10. Prednost pri zakupu i otkupu poslovnog prostora;
11. Ostvarivanje penzije pod povoljnijim uslovima;
12. Prvenstvo upisa u obrazovne ustanove i besplatno školovanje;
13. Stipendiranje;
14. Prednost pri smještaju u đačke i studentske domove;
15. Pravo na besplatne obavezne udžbenike za redovno školovanje;
16. Stambeno zbrinjavanje i pomoć u stambenom zbrinjavanju;
17. Pravo na participaciju troškova za priključak na infrastrukturne mreže (voda, električna energija);
18. Pravo na stan u vlasništvo ;
19. Uklanjanje arhitektonsko - urbanističkih barijera za ulazak i kretanje po stanu u invalidskim kolicima;
20. Prioritet u dodjeli sredstava za povratak i održiv povratak;
21. Participacija troškova naknade za dodijeljeno građevinsko zemljište na korištenje i naknade za uređenje gradskog građevinskog zemljišta;
22. Besplatna i povlaštena vožnja;
23. Participacija troškova dženaze-sahrane;
24. Jednokratna pomoć;
25. Podizanje nišana - nadgrobnih spomenika i spomen obilježja;
26. Participacija u učešću na sportskim takmičenjima u invalidskom sportu;
27. Posebna prava dobitnika ratnih priznanja i odlikovanja;
28. Druga prava u skladu sa posebnim propisima;
29. Osnovno obezbjeđenje;
30. Finansiranje boračkih organizacija čiji su članovi lica iz člana 2. ovog Zakona i finansijska podrška boračkim udruženjima za projekte i aktivnosti koji doprinose poboljšanju statusa boračkih populacija.

U ostvarivanju navedenih prava, prioritet pod jednakim uslovima u okviru boračke kategorije kojoj pripadaju (demobilisani branioci, ratni vojni invalidi, članovi porodice šehida - poginulog, umrlog i nestalog branioca), imaju dobitnici ratnih priznanja i odlikovanja i članovi porodice poginulog, umrlog i nestalog dobitnika ratnog priznanja i odlikovanja.

1. ZDRAVSTVENA ZAŠTITA

Član 7.

Pravo na zdravstvenu zaštitu lica iz člana 1. ovog Zakona i članovi njihovih porodica, ostvaruju u skladu sa odredbama Zakona o zdravstvenoj zaštiti («Službene novine Federacije BiH» broj: 46/10) i Zakona o zdravstvenom osiguranju («Službene novine Federacije BiH» broj: 30/97, 7/02, 7/08 i 48/11).

Sredstva za realiziranje prava na zdravstvenu zaštitu iz stava 1. ovog člana osiguravaju se za osigurana lica iz sredstava obaveznog zdravstvenog osiguranja - a za neosigurana lica koja se ne mogu osigurati po nekom drugom osnovu, obveznik uplate doprinosa za zdravstveno osiguranje je Ministarstvo za boračka pitanja Bosansko-podrinjskog kantona Goražde (u daljem tekstu: Ministarstvo).

Lica iz člana 2. ovog Zakona i članovi njihovih porodica, povratnici u Republiku Srpsku, imaju pravo na obavezan vid zdravstvene zaštite prema Sporazumu o načinu i postupku korištenja zdravstvene zaštite osiguranih lica na teritoriji Bosne i Hercegovine, van područja entiteta odnosno Distrikta Brčko kome osigurano lice pripada ("Službeni glasnik BiH", broj: 30/01), a ukoliko ne mogu pravo ostvariti prema Sporazumu, imaju pravo na obavezan vid zdravstvene zaštite u najbližoj općini u Federaciji, ukoliko to pravo ne mogu koristiti u zdravstvenoj ustanovi u mjestu svog prebivališta.

Član 8.

Nadležna kantonalna zdravstvena ustanova, ukoliko nije formirala, dužna je formirati posebnu službu za praćenje, prevenciju i liječenje lica iz člana 2. ovog Zakona oboljelih od posttraumatskog stresnog poremećaja.

Član 9.

Lica iz člana 2. ovog Zakona i članovi njihovih porodica, ukoliko status osiguranog lica ne mogu ostvariti po nekom drugom osnovu, ostvaruju to pravo po ovom Zakonu.

Član 10.

Skupština Kantona posebnim propisom uređuje učešće Zavoda zdravstvenog osiguranja Kantona u finansiranju ortopedskih pomagala, te obezbjeđenju potrebnih lijekova i sanitetskog materijala za ratne vojne invalide koji su neophodni za liječenje posljedica od rana, povreda, ozlijeđa ili oboljenja zadobijenih tokom učešća u odbrani Bosne i Hercegovine u punom iznosu.

O proširenom obimu prava za lica iz člana 2. ovog Zakona poseban propis donosi Skupština Kantona na prijedlog Vlade.

Član 11.

Lica iz člana 2. ovog Zakona oslobađaju se od obaveze ličnog učešća osiguranih lica u troškovima korištenja zdravstvene zaštite i snošenju troškova liječenja na teritoriji Kantona.

1.1. Uslovi i način korištenja prava na zdravstvenu zaštitu

Član 12.

Licima iz člana 2. ovog Zakona i članovima njihovih porodica se pod uslovima utvrđenim ovim Zakonom, obezbjeđuje zdravstvena zaštita iz obaveznog zdravstvenog osiguranja koja se provodi kao:

- primarna,
- specijalističko-konsultativna,
- bolnička.

Član 13.

Pravo na zdravstvenu zaštitu iz obaveznog zdravstvenog osiguranja lica iz člana 2. ovog Zakona mogu ostvariti pod sljedećim uslovima:

1. Da ne mogu biti zdravstveno osigurani kod poslodavca po osnovu radnog odnosa,
2. Da se ne bave registrovanom samostalnom privrednom, zanatskom ili poljoprivrednom djelatnošću, odnosno, da nisu obveznici ličnog učešća u zdravstvenoj zaštiti iz obaveznog zdravstvenog osiguranja,

3. Da ne mogu ostvariti pravo na zdravstvenu zaštitu iz obaveznog zdravstvenog osiguranja prema propisima penzijsko-invalidskog osiguranja,
4. Da ne mogu ostvariti pravo na zdravstvenu zaštitu iz obaveznog zdravstvenog osiguranja prema propisima Zavoda za zapošljavanje,
5. Da im član porodičnog domaćinstva nije nosilac zdravstvenog osiguranja po osnovama navedenim u tačkama 1. do 4. ovog člana.

Član 14.

Općinska Služba nadležna za boračko-invalidsku zaštitu (u daljem tekstu: prvostepeni organ), prema mjestu prebivališta podnosioca zahtjeva, rješava u prvom stepenu o pravu na zdravstvenu zaštitu iz obaveznog zdravstvenog osiguranja prema ovom Zakonu, ukoliko nije drugačije regulisano drugim propisom.

Rješenje iz predhodnog stava, prvostepeni organ je dužan donijeti u roku od 30 (trideset) dana od dana podnošenja zahtjeva.

Za priznavanje prava na zdravstvenu zaštitu, prvostepeni organ će, u skladu sa odredbama Zakona o upravom postupku, obezbijediti dokaze o ispunjavanju uslova iz člana 7. i 9. ovog Zakona.

Prvostepeni organ vodi kompletnu evidenciju o korisnicima kojima je priznato pravo na zdravstvenu zaštitu iz obaveznog zdravstvenog osiguranja prema ovom Zakonu i dostavlja Ministarstvu mjesečne zbirne izvještaje o broju korisnika i iznosima naknada.

Član 15.

Lica iz člana 7. i 9. ovog Zakona koja ispunjavaju uvjete propisane Zakonom, pravo na zdravstvenu zaštitu iz obaveznog zdravstvenog osiguranja pripada od prvog dana narednog mjeseca od dana podnošenja zahtjeva.

Pravo na zdravstvenu zaštitu iz obaveznog zdravstvenog osiguranja može se koristiti dok postoje uvjeti za korištenje tih prava propisanih Zakonom.

Korisnik prava, prema ovom Zakonu, dužan je u roku od 15 dana od dana nastale promjene prijaviti svaku promjenu koja utiče na korištenje, obim i prestanak ovog prava.

Prvostepeni organi će po službenoj dužnosti, na osnovu prijave korisnika prava ili saznanja na drugi način o nastaloj promjeni iz prethodnog stava ovog člana, pokrenuti postupak odmah, a najkasnije u roku od 15 dana od dana prijema zahtjeva, odnosno saznanja i donijeti rješenje o prestanku ili izmjeni priznatog prava na zdravstvenu zaštitu iz obaveznog zdravstvenog osiguranja.

Odjava i prijava korisnika prava na zdravstvenu zaštitu vrši se u skladu sa Zakonom o jedinstvenom sistemu registracije, kontrole i naplate doprinosa («Službene novine Federacije BiH» broj: 42/09).

Član 16.

Pravo na zdravstvenu zaštitu iz obaveznog zdravstvenog osiguranja stečena po ovom Zakonu ne mogu se prenijeti na drugo lice.

Član 17.

Lica iz člana 2. ovog Zakona i članovi njihovih porodica, koja su radi ostvarivanja zdravstvene zaštite upućena van mjesta prebivališta, a na teritoriji Bosne i Hercegovine, imaju pravo na troškove prevoza u visini cijene povratne autobuske karte od mjesta prebivališta do mjesta u koje su upućeni ako to pravo ne mogu ostvariti prema propisima Zavoda zdravstvenog osiguranja.

Zahtjev za naknadu troškova prevoza iz prethodnog stava, sa odgovarajućom dokumentacijom, podnosi se nadležnom prvostepeno organu na odlučivanje.

Nakon provedenog postupka odlučivanja o priznatom pravu na naknadu troškova prevoza iz predhodnog člana, prvostepeni organ donosi rješenje i vrši obračun o čemu dostavlja izvještaj Ministarstvu.

Član 18.

Nadzor nad rješenjima donesenim u prvom stepenu i postupak po žalbi vrši Ministarstvo.

Član 19.

Sredstva za ostvarivanje prava na zdravstvenu zaštitu iz obaveznog zdravstvenog osiguranja, prema ovom Zakonu obezbijedit će se u Budžetu Ministarstva.

Iznos naknade zdravstvene zaštite iz obaveznog zdravstvenog osiguranja utvrđuje Ministarstvo posebnim sporazumom sa Zavodom zdravstvenog osiguranja.

2. BANJSKO I KLIMATSKO LIJEČENJE

Član 20.

Lica iz člana 2. ovog Zakona, pod uslovima propisanim ovim Zakonom, imaju pravo na banjsko i klimatsko liječenje.

Član 21.

Banjsko i klimatsko liječenje, prema ovom Zakonu, jeste liječenje koje je neophodno kao nastavak liječenja od zadobivene rane, povrede, ozljede ili bolesti koje su propisane kao indikacija za to liječenje, a koje se obavlja u specijalizovanim zdravstvenim ustanovama u kojima se u liječenju primjenjuje i prirodni faktor, drugim zdravstvenim ustanovama u kojima se liječenje obavlja pretežno prirodnim faktorom, kao i u ustanovama i privrednim društvima osnovanim za liječenje, odmor i rekreaciju u kojima se u liječenju primjenjuje prirodni faktor.

O potrebi za banjskim i klimatskim liječenjem lica iz člana 2. ovog Zakona, na osnovu zahtjeva lica i upute ljekara specijaliste, odlučuje Ljekarska komisija koju imenuje Ministarstvo.

Član 22.

Ministarstvo zaključuje ugovor o banjsko - klimatskom liječenju lica iz člana 2. ovog Zakona sa ustanovama i privrednim društvima iz člana 13. ovog Zakona.

Ugovorima iz stava 1. ovog člana, naročito se utvrđuje obim i kvalitet zdravstvenih i drugih usluga koji te ustanove i privredna društva pružaju korisnicima, cijena tih usluga i druga prava i obaveze.

2.1. Uslovi i način korištenja prava na banjsko-klimatsko liječenje

Član 23.

Pravo na banjsko-klimatsko liječenje lica iz člana 2. ovog Zakona mogu koristiti jednom u dvije kalendarske godine.

Izuzetno od odredbi predhodnog stava ovog člana, ako za to postoje medicinske indikacije, pravo na banjsko klimatsko liječenje ratni vojni invalidi i dobitnici najvećih ratnih priznanja i odlikovanja mogu koristiti jednom u kalendarskoj godini u trajanju od 14 dana.

Član 24.

Lica iz člana 2. se mogu upućivati na banjsko-klimatsko liječenje samo u ustanove sa kojima je Ministarstvo zaključilo poseban Ugovor o pružanju usluga.

Član 25.

Prijedlog za stacionarno ili ambulantno banjsko-klimatsko liječenje lica iz člana 2., u skladu sa medicinskim načelima i praksom, daje nadležni ljekar specijalista odgovarajuće grane medicine (zavisno od vrste rane, povrede ili bolesti).

Član 26.

Lica iz člana 2. ovog Zakona podnose zahtjev, sa prijedlogom za liječenje iz prethodnog člana, nadležnom prvostepenom organu, prema prebivalištu korisnika iz člana 1. ovog Zakona.

Prvostepeni organ prosljeđuje prijedloge Komisiji za upućivanje na banjsko-klimatsko liječenje (u daljem tekstu: Ljekarska komisija).

Član 27.

O potrebi upućivanja na banjsko-klimatsko liječenje Ljekarska komisija, na osnovu prijedloga iz člana 25. ovog Zakona, daje nalaz, ocjenu i mišljenje.

Ljekarska komisija može u postupku davanja nalaza, ocjene i mišljenja, ako utvrdi da je potrebno, tražiti da se dopuni ili obnovi medicinska dokumentacija na osnovu koje se odlučuje o potrebi upućivanja na medicinsku rehabilitaciju.

Sastav, sjedište, način i uslove rada Ljekarske komisije posebnim aktom će odrediti Ministar za boračka pitanja (u daljem tekstu: Ministar).

Član 28.

Nalaz, ocjena i mišljenja o potrebi upućivanja na banjsko-klimatsko liječenje Ljekarska komisija donosi bez prisustva lica iz člana 2. ovog Zakona, a izuzetno, ukoliko je to potrebno, komisija poziva korisnika na pregled.

Ljekarska komisija, utvrđuje i potrebu za pratiocem, u toku putovanja na liječenje i povratka i potrebu stalnog prisustva pratioca za vrijeme liječenja, bez korištenja medicinskih usluga, za svaki slučaj pojedinačno.

Član 29.

Nalaz, ocjenu i mišljenje o potrebi upućivanja na banjsko-klimatsko liječenje Ljekarska komisija je dužna donijeti u roku od 15 dana od dana prijema prijedloga i o istom obavijestiti nadležni prvostepeni organ.

Član 30.

U skladu sa članom 29. ovog Zakona, na osnovu nalaza, ocjene i mišljenja Ljekarske komisije, prvostepeni organ, donosi rješenje o upućivanju na banjsko-klimatsko liječenje.

Prvostepeni organ vodi kompletnu evidenciju o korisnicima koji se prema ovom Zakonu, upućuju na banjsko-klimatsko liječenje i o tome dostavlja šestomjesečni izvještaj Ministarstvu, a po potrebi i ranije.

Nadzor nad rješenjima donesenim u prvom stepenu i postupak po žalbi vrši Ministarstvo.

Član 31.

Nadležni prvostepeni organi sa prostora Kantona će koordinirano vršiti planiranje banjsko-klimatskog liječenja, koje će se vršiti u vremenskom periodu od 7 (sedam) ili 14 (četnaest) dana, za maksimalno 10 (deset) korisnika.

Na prijedlog ordinirajućeg ljekara ustanove u kojoj je započelo banjsko-klimatsko liječenje, korisnik može produžiti boravak za još jedan utvrđeni period, uz saglasnost Ministarstva.

Član 32.

U vremenskom periodu iz prethodnog člana utvrđuje se slijedeći odnos i broj korisnika:

- Ratni vojni invalidi 6 korisnika
- Demobilisani borci 2 korisnika
- Članovi porodice šehida/poginulog borca 2 korisnika

Ukoliko nisu popunjena sva mjesta kod određene kategorije iz prethodnog stava ovog člana zbog nedovoljnog broja zahtjeva u vremenskom periodu utvrđenom u članu 31. ovog Zakona, ista se, uz saglasnost Ministarstva, mogu popuniti iz reda drugih kategorija.

Član 33.

U skladu sa članom 31. i 32. ovog Zakona, prvostepeni organ sa najvećim brojem korisnika (Služba boračko-invalidske i socijalne zaštite Općine Goražde) će donijeti konačnu, zbirnu Odluku o upućivanju pojedine grupe korisnika na banjsko-klimatsko liječenje.

Odluka iz prethodnog stava ovog člana, dostavlja se Ministarstvu i ustanovi iz člana 24. ovog Zakona.

Član 34.

Lica iz člana 2. ovog Zakona koja su korisnici banjsko-klimatskog liječenja imaju pravo na naknadu troškova prevoza do liječilišta, ukoliko od strane Ministarstva nije organizovan prevoz do mjesta u koje su upućeni na liječenje.

3. NAKNADA PUTNIH TROŠKOVA I TROŠKOVA ZA LIJEČENJE U INOZEMSTVU

Član 35.

Ostvarivanje prava na naknadu troškova liječenja u inostranstvu ostvaruje se u skladu sa članom 27. stav 3. Zakona o pravima branilaca i članova njihovih porodica ("Službene novine Federacije BiH" broj: 33/04, 56/05, 70/07 i 9/10) i to: ratni vojni invalidi, djeca poginulog branioca, umrlog i nestalog branioca, demobilizirani branilac i djeci demobiliziranih branioca, prema utvrđenoj medicinskoj dokumentaciji i u skladu sa Zakonom o zdravstvenom osiguranju i propisu o upućivanju osiguranika na liječenje u inozemstvo.

Pored lica utvrđenih članom 27. stav 3. Federalnog zakona, pravo na naknadu troškova liječenja u inostranstvu mogu ostvariti roditelji i bračni drug šehida, poginulog, umrlog i nestalog branioca i dobitnici ratnih priznanja i odlikovanja i članova porodica poginulih, umrlih i nestalih dobitnika ratnog priznanja i odlikovanja, bračni drug i djeca ratnih vojnih invalida i bračni drug demobiliziranog branioca

Visina troškova za liječenje u inostranstvu odobrava se u skladu sa raspoloživim sredstvima u budžetu predviđenih za ove namjene do visine 10 prosječnih netto plaća isplaćenih u Federaciji Bosne i Hercegovine (u daljem tekstu: Federacija BiH) u predhodnoj godini.

Član 36.

Pravo na naknadu troškova prijevoza za odlazak na liječenje i povratak po završetku liječenja u visini troškova autobusne karte od mjesta boravka do mjesta liječenja odlazak-povratak, kao i naknadu troškova smještaja do 10 dana, u visini do dvije prosječne netto plaće isplaćene u Federaciji BiH u predhodnoj godini, ostvaruju lica iz člana 35. ovog Zakona.

Ukoliko je lice iz prethodnog stava korisnik prava na dodatak za njegu i pomoć od drugog lica ima pravo na naknadu troškova prijevoza i boravka za lice koje sa njim putuje u pratnji.

Član 37.

O nemogućnosti liječenja u Bosni i Hercegovini, potvrdu izdaje ljekarski konzilij Kliničkog centra Univerziteta u Sarajevu.

Član 38.

Pravo na naknadu troškova i troškova za liječenje u inostranstvu po zahtjevu lica iz člana 35. ovog Zakona utvrđuje se na osnovu nalaza, ocjene i mišljenja komisije stručne ustanove iz predhodnog člana Zakona, i računa izdatih nadležnih ustanova, preduzeća i sl. a postupak provodi prvostepeni organ nadležan za boračko-invalidsku zaštitu u čijoj se službenoj evidenciji vodi podnosilac zahtjeva

Nakon provedenog postupka odlučivanja, o priznatom pravu na naknadu troškova prevoza, i/ili troškova za liječenje u inostranstvu iz predhodnog člana, prvostepeni organ donosi rješenje i vrši obračun, o čemu dostavlja izvještaj Ministarstvu.

4. PRAVO PO OSNOVU PREOSTALE RADNE SPOSOBNOSTI

Član 39.

Nezaposleni vojni invalid, koji je zadobio ranu, povredu, ozljedu ili bolest po osnovu koje mu je priznat status vojnog invalida, kod koga je, usljed bolesti ili povrede, došlo do težeg oštećenja organizma, na osnovu preostale radne sposobnosti ima pravo na profesionalnu rehabilitaciju, uključujući i školovanje za obavljanje poslova za koje se traži viša stručna sprema od one koju vojni invalid ima, ako prema općem obrazovanju, godinama života, zdravstvenom stanju i drugim okolnostima ima uslove za uspješnu rehabilitaciju.

Član 40.

Profesionalnom rehabilitacijom obezbjeđuje se osposobljavanje za vršenje ranijeg ili drugog odgovarajućeg zanimanja, stručno osposobljavanje za vršenje određenog zanimanja i stručno usavršavanje.

Član 41.

Pravo na profesionalnu rehabilitaciju utvrđuje se na osnovu nalaza, ocjene i mišljenja komisije stručne ustanove za ocjenjivanje radne sposobnosti, u skladu sa propisima iz oblasti penzijsko-invalidskog osiguranja.

Komisija iz stava 1. ovog člana, dužna je u roku od 30 dana od dana prijema zahtjeva izvršiti ocjenu radne sposobnosti i o tome u daljem roku od 8 dana pismeno izvijestiti ratnog vojnog invalida i prvostepeni organ nadležan za boračko - invalidsku zaštitu u čijoj se službenoj evidenciji vodi vojni invalid.

Član 42.

Kantonalni organi uprave i kantonalne upravne ustanove, općine sa područja Kantona, kao i sva pravna lica čiji je osnivač Kanton ili Općina, odnosno koja se finansiraju iz budžeta sa učešćem od najmanje 25 %, dužni su primiti na profesionalnu rehabilitaciju ratnog vojnog invalida, kojeg uputi Ministarstvo na prijedlog prvostepenog organa nadležnog za boračko-invalidsku zaštitu.

4.1. Uslovi, način i kriteriji ostvarivanja prava po osnovu preostale radne sposobnosti

Član 43.

Profesionalna rehabilitacija provodi se na način i pod uslovima koji su predviđeni za rehabilitaciju po propisima o penzijskom i invalidskom osiguranju ako ovim Zakonom nije drukčije propisano, s tim što se rehabilitacija može vršiti i redovnim školovanjem u školama srednjeg obrazovanja, ali najdalje do sticanja petog stepena stručne spreme.

Član 44.

Ratni vojni invalidi imaju pravo na profesionalnu rehabilitaciju ako prema općem obrazovanju, godinama života, zdravstvenom stanju i drugim okolnostima imaju uslove za uspješnu rehabilitaciju i ako nisu u radnom odnosu.

Član 45.

Ratni vojni invalidi koji nemaju stručnu spremu, osposobljavaju se za vršenje zanimanja za koje je potrebna stručna sprema stečena priučavanjem.

Ratni vojni invalidi koji imaju stručnu spremu nižu od spreme kvalifikovanog radnika, odnosno od srednje stručne spreme osposobljavaju se za vršenje zanimanja za koje je potrebna stručna sprema kvalifikovanog radnika, odnosno srednja stručna sprema.

Ratni vojni invalidi koji imaju stručnu spremu kvalifikovanog radnika, odnosno srednju stručnu spremu ili stručnu spremu višu od navedene mogu se osposobljavati za sticanje stručne spreme jednake onoj koju imaju ako iz opravdanih razloga ne mogu da vrše zanimanje za koje imaju stručnu spremu.

Ratni vojni invalid ima pravo na školovanje za obavljanje poslova za koje se traži viša stručna sprema od one koju ratni vojni invalid ima, ako prema općem obrazovanju, godinama života, zdravstvenom stanju i drugim okolnostima ima uslove za školovanje.

Član 46.

Ratni vojni invalidi koji su već rehabilitovani nemaju pravo da se putem nove profesionalne rehabilitacije osposobljavaju za vršenje zanimanja za koje je potrebna stručna sprema istog stepena za koju su se osposobili predhodnom rehabilitacijom.

Ratni vojni invalid ima pravo da nastavi započetu profesionalnu rehabilitaciju, ako je do spriječenosti došlo usljed bolesti ili drugih opravdanih razloga, ukoliko spriječenost nije trajala duže od 12 (dvanaest) mjeseci.

U slučaju iz prethodnog stava, trajanje profesionalne rehabilitacije može se produžiti najviše za onoliko vremena koliko je trajala spriječenost.

Ratni vojni invalid koji usljed bolesti ili drugih opravdanih razloga nije završio profesionalnu rehabilitaciju na koju je upućen može biti ponovo upućen na istu profesionalnu rehabilitaciju.

Član 47.

Ratni vojni invalidi zahtjev za profesionalnu rehabilitaciju, podnosi prvostepenom organu nadležnom za boračko-invalidsku zaštitu gdje je ratni vojni invalid ostvario pravo na ličnu invalidninu.

Uz zahtjev dostavlja se sljedeća dokumentacija:

1. Dokaz da podnosilac zahtjeva pripada boračkoj populaciji;
2. Dokaz da je podnosilac na evidenciji nezaposlenih lica kod Službe za zapošljavanje Bosansko-podrinjskog kantona Goražde;
3. Dokaz o prethodnom zaposlenju za koje se traži rehabilitacija.
4. Pismena izjava podnosioca zahtjeva da će prihvatiti zaposlenje na poslovima na kojima se osposobljava;
5. Vrijeme za koje će podnosilac zahtjeva biti zaposlen od najmanje jedne godine dana (Ugovor ili druga garancija poslodavca);
6. Dokaz o školskoj spremi koju ima podnosilac zahtjeva;
7. Predugovor sa ustanovom, organizacijom, odnosno pravnom licem koje će vršiti profesionalnu rehabilitaciju uz iskazane troškove.

Član 48.

Po prijemu zahtjeva, prvostepeni organ dužan je isti odmah uputiti nadležnoj ljekarskoj komisiji za ocjenjivanje radne sposobnosti da izvrši ocjenu radne sposobnosti podnosioca zahtjeva.

Komisija iz predhodnog stava dužna je postupiti u skladu sa odredbama člana 41.ovog Zakona.

Član 49.

Prvostepeni organ dužan je dostaviti Ministarstvu prijedlog o upućivanju ratnog vojnog invalida na profesionalnu rehabilitaciju najkasnije u roku od 8 dana od dana sticanja prava na profesionalnu rehabilitaciju.

Član 50.

Nakon priznavanja prava i ukoliko su ispunjeni svi drugi zakonski preduslovi, Ministarstvo potpisuje ugovor sa pravnom licem za vršenje rehabilitacije i poslodavcem koji prima korisnika prava u radni odnos.

Član 51.

Ministarstvo će u roku od 8 dana od dana stupanja na profesionalnu rehabilitaciju ratnog vojnog invalida pismeno izvijestiti prvostepeni organ koji je uputio prijedlog za profesionalnu rehabilitaciju.

5. PARTICIPACIJA TROŠKOVA ZA NABAVKU LIJEKOVA KOJI NISU NA ESENCIJALNOJ LISTI

Član 52.

Troškove nabavke lijekova, koji se ne nalaze na esencijalnoj listi, a neophodni su za liječenje posljedica od rana, povreda ili oboljenja zadobijenih tokom učešća u Oružanim snagama u odbrani Bosne i Hercegovine za ratne vojne invalide snosi Ministarstvo u punom iznosu, ukoliko to pravo ne mogu ostvariti po drugom osnovu.

Član 53.

Ukoliko ne mogu ostvariti po drugom osnovu participaciju troškova nabavke lijekova koji nisu na esencijalnoj listi ratni vojni invalidi kod kojih nije utvrđena uzročno-posljedična veza po osnovu rane, povrede, ozlijeđe ili bolesti zadobijene tokom službe u Oružanim snagama sa teškom materijalno-socijalnom situacijom, Ministarstvo parcipira do iznosa jedne prosječne netto plaće isplaćene u Federaciji BiH u predhodnoj godini u toku jedne kalendarske godine.

Pravo na participacija troškova za nabavku lijekova imaju članovi porodice šehida/poginulog borca i demobilisani borci pod uslovima i visini troškova definisanih predhodnim stavom ovog člana.

Član 54.

Troškove nabavke lijekova iz člana 53. i 54. ovog Zakona za koje u skladu sa važećim propisima refundira Zavod zdravstvenog osiguranja Bosansko-podrinjskog kantona Goražde (u daljem tekstu: Zavod), Ministarstvo će isplatiti razliku između stvarne cijene koštanja lijekova i visine isplaćenih sredstava na ime refundacije od strane Zavoda.

5.1. Uslovi, način i kriteriji za priznavanje prava na participaciju troškova za nabavku lijekova

Član 55.

Pod uslovom da su su imali prebivalište-boravište na području Kantona na dan 14.12.1995.godine, opći kriterij za ostvarivanje prava na participaciju troškova na ime nabavke lijekova koji nisu na esencijalnoj listi I liječenja da podnosioci zahtjeva pripadaju jednoj od kategorija boračkih populacija, i to:

- demobilisani branilac (uvjerenje nadležnog organa o pripadnosti Oružanim snagama u periodu 18.09.1991. do 22.04. 1996.god, najmanje jednu godinu dana);
- ratni vojni invalid (rješenje nadležnog općinskog organa);
- član porodice šehida i poginulih i nestalih boraca i umrlih ratnih vojnih invalida (rješenje nadležnog općinskog organa).

Član 56.

O potrebi nabavke lijekova koji se ne nalaze na esencijalnoj listi, a neophodni su za liječenje od posljedica rana, povreda ili oboljenja zadobijenih tokom učešća u odbrani Bosne i Hercegovine, nalaz i mišljenje daje ordinirajući ljekar nadležne zdravstvene ustanove na području Kantona.

U skladu sa medicinskim načelima i praksom ordinirajući ljekar po utvrđenoj dijagnozi **na poledini recepta konstatuje uzročno-posljedičnu vezu** odnosno nabavku lijeka koji je neophodan za liječenje od posljedica rana, povreda ili oboljenja zadobijenih tokom učešća u odbrani Bosne i Hercegovine, što ovjerava faksimilom i pečatom.

Lica iz člana 52. i 53. ovog Zakona prilikom obraćanja ljekaru dužni su dostaviti na uvid Rješenje o priznatom statusu ili medicinsku dokumentaciju koja potječe iz ratnog perioda.

Član 57.

Lica iz člana 52. i 53. - po preuzimanju pravilno propisanog i ovjerenog recepta vrše nabavku propisanih lijekova u nekoj od ustanova registrovanih za vršenje ove djelatnosti u Bosni i Hercegovini, uz obavezno preuzimanje original računa za preuzeti lijekove.

Po preuzimanju recepta od ordinirajućeg ljekara korisnik je dužan izvršiti fotokopiranje istog, a koji će koristiti u daljem postupku kao bitan dokaz radi ostvarivanja prava na refundaciju sredstava uplaćenih za nabavku lijekova.

Član 58.

Maksimalan iznos sredstava odobrenih za refundaciju nabavke lijekova u toku jedne budžetske godine ne može biti veći od iznosa sredstava planiranih za te namjene u Budžetu Ministarstva.

Član 59.

Licima iz člana 2. ovog Zakona može se priznati participacija na ime troškova nabavke lijekova samo na osnovu podnesenog zahtjeva i priloga iz kojeg se može ustanoviti materijalno-socijalna situacija tj. ako ispunjavaju opće i posebne uslove propisane ovim Zakonom .

Član 60.

Pravo na participaciju troškova na ime nabavke lijekova koji nisu na esencijalnoj listi i koji se ne mogu obezbjediti po drugom osnovu priznaje se rješenjem koje donosi Ministar.

Član 61.

Pod posebnim uslovom za ostvarivanje prava na participaciju troškova na ime nabavke lijekova I novčane pomoći za potrebe liječenja smatra se da ukupna novčana neto primanja, uključujući i primanja po osnovu socijalne i boračko invalidske zaštite, iznose do 15% po članu domaćinstva prosječne netto plaće isplaćene u Federaciji BiH u predhodnoj godini.

Izuzetno za nabavku lijekova ili liječenje za koje je utvrđena uzročno-posljedična veza na osnovu zadobijene rane, povrede ili oboljenja zadobijenog tokom službe u Oružanim snagama za ratne vojne invalide utvrđeni cenzus iz predhodnog stava ovog člana se ne odnosi.

Licima iz člana 2. ovog Zakona koja dokažu da su u izuzetno teškoj materijalno-socijalnoj situaciji, uz saglasnost Ministra može se dodijeliti jednokratna novčana pomoć za potrebe liječenja ili nabavku lijekova, čija ukupna novčana netto primanja prelaze utvrđeni cenzus u stavu 1. ovog člana, ukoliko ispunjavaju opće uslove definisane ovim Zakonom.

Član 62.

Za potrebe liječenja i nabavku lijekova, lica iz člana 2. su obavezni dostaviti dokaze:

1. Zahtjev sa tačnom adresom, brojem kontakt telefona i brojem žiro-računa ;
2. Dokaz o statusu branioca iz člana 2. Zakona o dopunskim pravima boraca i članova njihovih porodica u Bosansko-podrinjskom kantonu Goražde;
3. Fotokopija lične karte podnosioca zahtjeva
4. Dokaz o mjestu prebivališta podnosioca i svih punoljetnih članova porodičnog domaćinstva;
5. Kućna lista;
6. Uvjerenje da se podnosilac zahtjeva i punoljetni članovi njegovog porodičnog domaćinstva nalaze na evidenciji Službe za zapošljavanje (za nezaposlene) ili dokaz o visini primanja (po osnovu radnog odnosa, boračko-invalidske zaštite, penzije, samostalne djelatnosti i drugih osnova) ili dokaz o redovnom školovanju;
7. relevantnu medicinsku dokumentaciju,
8. predračun (račun) troškova liječenja, odnosno nabavke lijekova.

Član 63.

Odobrena sredstva za potrebe liječenja i nabavke lijekova ne mogu biti manja od 6% KM niti u većem iznosu od jedne prosječne netto plaće isplaćene u Federaciji BiH u predhodnoj godini.

Sredstva za potrebe liječenja ili nabavke lijekova za koje se utvrdi uzročno-posljedična veza rane, povrede, ozlijede ili oboljenja nastale u toku služenja u Oružanim snagama priznavaće se u visini stvarnih troškova.

Visina sredstava odredit će se isključivo na osnovu računa (predračuna), izdatog od strane nadležne zdravstvene ustanove ili drugog pravnog lica registrovanog za obavljanje predmetne djelatnosti.

6. NOVČANA NAKNADA ZA VRIJEME NEZAPOSLENOSTI

Član 64.

Novčana naknada za vrijeme nezaposlenosti za lica iz člana 2. ovog Zakona, ostvaruje se po propisima o posredovanju u zapošljavanju i socijalnoj sigurnosti nezaposlenih lica i propisima iz boračko-invalidske zaštite koji regulišu predmetnu oblast.

7. STIMULATIVNE MJERE I PREDNOST PRI ZAPOŠLJAVANJU

Član 65.

Lica iz člana 2. ovog Zakona imaju pravo na prednost prilikom zapošljavanja pod uslovima i na način predviđen politikom zapošljavanja u Kantonu, ukoliko zadovoljavaju opće i posebne uslove.

Kantonalne upravne ustanove, općine, kao i sva pravna lica čiji je osnivač Kanton ili Općina, odnosno koja se finansiraju iz Budžeta sa učešćem od najmanje 25% dužni su prilikom prijema u radni odnos osigurati prednost licima iz člana 2. ovog Zakona, kao i članovima njihove uže porodice.

Prilikom unaprijeđenja u veće službeno zvanje prednost imaju ratni vojni invalidi od 60 i više procenata invalidnosti.

8. PREDNOST PRI KORIŠTENJU PROGRAMA SLUŽBE ZA ZAPOŠLJAVANJE BOSANSKO-PODRINJSKOG KANTONA GORAŽDE

Član 66.

Prednost pri korištenju programa Službe za zapošljavanje BPK u stimulanju zapošljavanja i samozapošljavanja, nabavci opreme, obezbijedit će se licima iz člana 2. ovog Zakona.

Za ostvarivanje prava iz stava 1. ovoga člana, Kantonalna služba za zapošljavanje će posebnim propisom utvrditi način i uslove.

9. STIMULATIVNE MJERE PRI ZAPOŠLJAVANJU I SAMOZAPOŠLJAVANJU

Član 67.

Za otvaranje radnih mjesta, kojim bi pitanje zaposlenja riješila lica iz člana 2. ovog Zakona, kao i članovi njihove uže porodice, mogu se dodijeliti bespovratna novčana sredstva.

Član 68.

Bespovratna novčana sredstva za stimulanje zapošljavanja i samozapošljavanja demobilisanih boraca, ratnih vojnih invalida i članova porodica šehida i poginulih boraca mogu se odobriti za finansiranje projekata za otvaranje radnih mjesta kroz pokretanje ili proširenje proizvodno–uslužnih djelatnosti demobilisanim borcima, ratnim vojnim invalidima, članovima porodica šehida/poginulih boraca, udruženjima/fondacijama koje okupljaju boračku populaciju, kao i pravnim licima (privrednim i društvenim subjektima) koji vrše zapošljavanje pripadnika boračkih populacija.

9.1. Uslovi, način i kriteriji za odobravanje bespovratnih sredstava za zapošljavanje i samozapošljavanje

Član 69.

Ministarstvo je dužno objaviti Javni poziv za odobravanje sredstava za zapošljavanje i samozapošljavanje lica iz člana 2. ovog Zakona.

Član 70.

Maksimalan iznos sredstava odobrenih za zapošljavanje i samozapošljavanje lica iz člana 2. ovog Zakona u toku jedne budžetske godine ne može biti veći od iznosa raspoloživih sredstava planiranih za te namjene u budžetu Ministarstva.

Član 71.

Kandidati za korištenje bespovratnih sredstava projekte za zapošljavanje i samozapošljavanje u skladu sa Javnim pozivom dostavljaju na adresu Ministarstva sa naznakom „Komisiji za ocjenu projekata za zapošljavanje i samozapošljavanje„.

Član 72.

a.)Svi projekti dostavljeni po Javnom pozivu koji ispunjavaju opće uslove će se uključiti u proces vrednovanja bez obzira da li će biti sufinansirani/finansirani.

b.)Vrednovanje i selekciju projekata vršit će tročlana komisija koju imenuje Ministar za svaku budžetsku godinu.

c.)Pri vrednovanju projekata koristit će se metode stručne ocjene.

d.)Komisija razmatra dostavljene zahtjeve, utvrđuje ispunjenost općih uslova, vrši opservaciju faktičkog stanja na terenu, te donosi procjenu i ocjenu projekata (POZITIVAN ili NEGATIVAN) sa obrazloženjem ocjene, za svaki projekat posebno. Uz obrazloženje, komisija može da navede i određene prijedloge, sugestije, preporuke, vlastita zapažanja i sl.

e.)Ocjenu POZITIVAN može dobiti Projekat koji, prema procjeni komisije, ima minimum realnih mogućnosti za uspješnu realizaciju i održivost i koje ostvari najmanje 50 % predviđenih bodova po svim kriterijima.

f.)Ocjenu NEGATIVAN će dobiti Projekat koji, prema procjeni komisije, ne sadrži ni minimum realnih mogućnosti za uspješnu realizaciju niti održivost.

g.)Postupak vrednovanja se odvija kroz ocjenjivanje svakog od utvrđenih kriterija ocjenama od 1-10 izuzev kriterija pod rednim brojem 8. koji se boduju pojedinačno, a prema skali za evaluaciju projekata definisanoj u članu 79. ovog Zakona.

h.)Kao rezultat vrednovanja i rangiranja projekata sačinut će se rang lista prioriteta sa prijedlozima za odobravanje i redoslijedom finansiranja.

Član 73.

Komisija je dužna podnositi izvještaje Ministru za period koji je utvrđen rješenjem o imenovanju.

Predsjednik komisije dužan je Ministru prezentirati prijedloge komisije neovisno od ličnog mišljenja.

Ocjenu projekata komisija je dužna donijeti najkasnije u roku od 30 (trideset) dana od dana zaprimanja zahtjeva - projekta.

Član 74.

Komisija ima pravo zatražiti dodatnu dokumentaciju ukoliko smatra da bi određene činjenice mogle bitnije uticati na donošenje konačne ocjene projekta.

Komisija po potrebi može obaviti razgovor sa podnosiocima projekta radi dodatnih pojašnjenja, prikupljanja činjenica i sl., a sve u cilju donošenja pravilne ocjene Projekta.

Član 75.

Listu sa prijedlogom projekata za finansiranje/sufinansiranje, visinom sredstava, načinom i dinamikom sufinansiranja/finansiranja na prijedlog komisije donosi Ministar, a konačnu odluku o finansiranju/sufinansiranju projekata donosi Vlada Bosansko-podrinjskog kantona Goražde u daljem tekstu: Vlada).

Nakon donošenja odluke od strane Vlade, Ministarstvo sa korisnicima sredstava pojedinačno zaključuje ugovor kojim se regulišu međusobna prava i obaveze.

Član 76.

Opći uslovi za odobravanje bespovratnih sredstava na ime zapošljavanja i samozapošljavanja lica iz člana 2. ovog Zakona su:

Za fizička lica:

1. da pripadaju kategorijama lica iz člana 2. ovog Zakona, i da su u sastavu Oružanih snaga proveli najmanje dvije godine;
2. da se projektom planira samozapošljavanje kroz pokretanje vlastite poslovne djelatnosti ili u saradnji sa drugim privrednim subjektom;
3. da se nalaze na evidenciji nezaposlenih lica kod Službe za zapošljavanje Bosansko – podrinjskog kantona Goražde, u trajanju najmanje šest mjeseci prije podnošenja zahtjeva za dodjelu sredstava;
4. da imaju registrovano preduzeće ili samostalnu radnju ili dokaz o pokretanju postupka registracije kod nadležnog organa (prijava ili zahtjev);
5. Period u kojem se korisnik sredstava samovoljno objavljuje sa evidencije Službe za zapošljavanje u općini u kojoj je prijavljen na području Kantona, s tim da ovaj period **ne može biti manji od 2 godine i 6 mjeseci.**

Za pravna lica:

1. registracija fondacije/udruženja koje okuplja boračke populacije, registracija preduzeća, samostalne radnje za druga pravna lica koja upošljavaju pripadnike boračke populacije;
2. da se projektom planira pokretanje, proširenje poslovne djelatnosti, nabavka opreme i upošljavanje novoupisanih radnika iz reda boračkih populacija.

Član 77.

Visina sredstava koja se može odobriti na ime zapošljavanja ili samozapošljavanja ne može prelaziti iznos od 10.000 KM po odobrenom projektu za fizička lica.

Visina sredstava na ime zapošljavanja lica iz člana 2. Zakona, proširenja poslovne djelatnosti ili nabavke opreme, za fondacije/udruženja boračkih populacija i druga pravna lica koja vrše upošljavanje lica iz člana 2. ovog Zakona mogu se odobriti do iznosa od 10.000 KM, po jednom novoupisanim radniku.

Član 78.

Dokumenti koje dostavljaju podnosioci projekata za dodjelu bespovratnih sredstava na ime zapošljavanja i samozapošljavanja su:

a) obavezna dokumentacija potrebna za fizička lica:

- Zahtjev za bespovratna novčana sredstva u kojem se navodi traženi iznos bespovratnih novčanih sredstava i namjena;
- Uvjerenje (rješenje) o statusu pripadnika boračke populacije;
- Ovjerena kopija lične karte i prijava prebivališta/boravišta;
- Posjedovni list;
- Kućna lista;
- Uvjerenje sa evidencije nezaposlenih punoljetnih članova domaćinstva;
- Ovjerena izjava o periodu, za koji se korisnik sredstava samovoljno odjavljuje sa evidencije Službe za zapošljavanje u općini u kojoj je prijavljen na području Kantona, s tim da ovaj period **ne može biti manji od 2 godine i 6 mjeseci**;
- Dokaz o registraciji djelatnosti ili dokaz o pokretanju postupka registracije kod nadležnog suda, nadležnog organa (prijava ili zahtjev);
- Projekat (biznis plan) koji je ekonomski opravdan i koji obezbjeđuje trajnost poslovanja i stvara uslove za povećanje zaposlenosti, načelno sadrži: poslovni plan, stručne kvalifikacije, plan investiranja, izjavu o uspješnosti projekta i sl.;
- Dokaz o posjedovanju vlastitog ili ugovor o zakupu poslovnog prostora, za koji postoji upotrebna dozvola nadležnog općinskog organa za obavljanje proizvodne djelatnosti;
- Dokaz ili ovjerena izjava da podnosilac zahtjeva za dodjelu sredstava za stimulisanje zapošljavanja i samozapošljavanja nije koristio finansijska sredstva ili drugi vid pomoći na ime zapošljavanja od strane Ministarstva ili drugih domaćih organa i institucija, ili inostranih humanitarnih organizacija u periodu od 1996.godine do dana podnošenja zahtjeva;
- Dokaz ili ovjerena izjava da podnosilac zahtjeva nije samovoljno raskinuo radni odnos ili svojom krivicom dobio otkaz radnog odnosa u periodu od tri godine do dana podnošenja zahtjeva;
- Dokaz o ispunjavanju minimlnih tehničkih uslova za obavljanje registrovane djelatnosti;
- Dokaz o izboru banke za obavljanje platnog prometa, dodjelu identifikacionog i poreznog broja, ako je to po zakonu, odnosno ako je registrovanom pravnom i fizičkom licu naloženo da to i učini.

b) Obavezna dokumentacija potrebna za udruženja/fondacije:

- Zahtjev za bespovratna novčana sredstva u kojem se navodi traženi iznos bespovratnih novčanih sredstava i namjena;
- PROJEKAT ZAPOŠLJAVANJA (načelno sadrži: poslovni plan, plan investiranja, opis djelatnosti, procjena tržišta, izjava o uspješnosti projekta, broj trenutno uposlenih radnika i broj novih radnih mjesta koja se planiraju otvoriti i sl.);
- Registracija udruženja/fondacije.

Dodatna dokumentacija za udruženja/fondacije koje već imaju registrovanu poslovnu djelatnost:

- Bilans stanja i bilans uspjeha poslovnog subjekta za predhodnu godinu poslovanja;
- Izjava o postojećim (kreditnim ili lizing) zaduženjima;
- Potvrda o stanju poreskih obaveza ne starija od tri mjeseca (izdata od strane poreske uprave);
- Potvrda o stanju obaveza prema Fondu penzijsko-invalidskog osiguranja i Fondu zdravstvenog osiguranja, ne starije od tri mjeseca;
- Ostali dokumenti za koje se smatra da mogu biti od značaja za ocjenu zahtjeva.
- Spisak lica iz člana 2. Zakona koji se planiraju primiti u radni odnos sa uvjerenjima o učešću u Oružanim snagama odbrambeno – oslobodilačkog rata 1992. – 1995.g. Bosne I Hercegovine;

c) Potrebna dokumentacija za pravna lica (d.d. i d.o.o.):

- Projekat sa zahtjevom za bespovratna novčana sredstva na memorandumu preduzeća (navesti traženi iznos bespovratnih sredstava, namjenu, broj trenutno uposlenih radnika i broj novih radnih mjesta koja se planiraju otvoriti);
- Poslovni plan, sa pripadajućim tabelama, i to: bilans stanja, bilans uspjeha, projekcija gotovinskog toka, plan investiranja, izjava o uspješnosti projekta;
- Kompletna prva registracija preduzeća i sve izmjene i dopune iste (ili izvadak o promjenama registracije, izdat od strane suda);
- Ovjereni godišnji obračuni preduzeća za prethodne tri godine;
- Izvještaj neovisnog revizora, gdje zakon propisuje obavezu revizije;
- Presjek bilansa stanja i uspjeha (ili bruto bilans) za prethodni mjesec poslovanja;
- Odluka nadležnog organa preduzeća za zaduženje;
- Ugovor o osnivanju ili odluka o osnivanju i statut firme;
- Ponuda i procjena ponuđenog kolateralna sa zemljišno knjižnim izvatkom;
- Uvjerenje o poreskoj i porezu na dodatu vrijednost registraciji;
- Obavještenje o razvrstavanju pravnog lica prema djelatnosti (zavod za statistiku);
- Karton deponovanih potpisa lica ovlaštenih za zastupanje i potpisivanje, sa ovjerenim kopijama ličnih karata lica ovlaštenih za zastupanje i potpisivanje;
- Izjava o postojećim (kreditnim ili lizing) zaduženjima preduzeća;
- Potvrda o stanju poreskih obaveza ne starija od tri mjeseca (izdata od strane poreske uprave);
- Potvrda o stanju obaveza prema penzijsko-invalidskom osiguranju, zdravstvenom osiguranju i osiguranju od nezaposlenosti, ne starije od tri mjeseca;
- Potvrda od penzijsko-invalidskog osiguranja iz baze podataka matične evidncije aktivnih osiguranika;
- Spisak lica iz člana 2. Zakona koji se planiraju primiti u radni odnos sa uvjerenjima o učešću u Oružanim snagama odbrambeno – oslobodilačkog rata 1992. – 1995.g. BiH;
- Ostali dokumenti za koje se ocjeni da mogu biti od značaja za ocjenu kreditnog zahtjeva.

d) Potrebna dokumentacija za fizička lica (SZR, obrtnička radnja i sl.):

- Projekat sa zahtjevom (navesti iznos traženih sredstava, namjenu, broj trenutno uposlenih radnika i broj novih radnih mjesta koja se planiraju otvoriti);
- Poslovni plan sa pripadajućim tabelama;
- Rješenje nadležnog općinskog organa za obavljanje predmetne djelatnosti;
- Poreske prijave za prethodne tri godine poslovanja kao i dokaz o plaćenom porezu za posljednju poslovnu godinu;
- Ponuda i procjena ponuđenog kolateralna;
- Uvjerenje o poreskoj i porezu na dodatu vrijednost (registraciji);
- Karton deponovanih potpisa lica ovlaštenih za zastupanje i potpisivanje sa ovjerenim kopijama ličnih karata lica ovlaštenih za zastupanje i potpisivanje;
- Izjava o postojećim (kreditnim ili lizing) zaduženjima sa izvodom računa iz poslovne banke;
- Potvrda o stanju poreskih obaveza ne starija od tri mjeseca izdata od strane poreske uprave;
- Ovjereni kopija lične karte vlasnika samostalne zanatske radnje;
- Potvrda o stanju obaveza prema penzijsko-invalidskom osiguranju, zdravstvenom osiguranju i osiguranju od nezaposlenosti, ne starije od tri mjeseca;
- Potvrda od penzijsko-invalidskog osiguranja iz baze podataka matične evidncije aktivnih osiguranika;
- Spisak lica iz člana 2. Zakona koji se planiraju primiti u radni odnos;
- Ostali dokumenti za koje se ocjeni da mogu biti od značaja za ocjenu u cilju dodjele bespovratnih sredstava.

e) Dokumentacija potrebna za fizička lica – samostalni poljoprivrednici/obrnici:

- Projekat sa zahtjevom za bespovratna novčana sredstva (navesti traženi iznos bespovratnih novčanih sredstava);
- Poslovni plan ;
- Rješenje nadležnog općinskog organa o registraciji samostalne poljoprivredne djelatnosti (može se dostaviti i naknadno, ali u svakom slučaju prije eventualne isplate novčanih sredstava);

- Uvjerenje o poreskoj registraciji (može se dostaviti i naknadno, ali u svakom slučaju prije eventualne isplate novčanih sredstava);
- Potvrda poreske uprave o izmirenim obavezama;
- Ugovor o zakupu i/ili dokaz o vlasništvu poljoprivrednog zemljišta;
- Ponuda kolaterala i/ili izjava žiranta;
- Potvrda od biro-a za zapošljavanje, ukoliko je tražilac bespovratne novčane pomoći prijavljen;
- Ovjerna izjava o periodu za koji se korisnik sredstava samovoljno odjavljuje sa evidencije nezaposlenih kod Službe za zapošljavanje u općini u kojoj je prijavljen na području Kantona, s tim da ovaj period ne može biti manji od 2 godine i 6 mjeseci;
- Spisak lica iz člana 2 Zakona koji se planiraju primiti u radni odnos;
- Ovjerna kopija kućne liste podnosioca Projekta;
- Ovjerna kopija lične karte podnosioca;
- Ostali dokumenti za koje se ocjeni da mogu biti od značaja (npr. kooperantski ugovor, predračun isl.).

Član 79.

Evaluaciju svih aplikacija komisija provodi u skladu sa sljedećom Skalom za evaluaciju projekata.

R/B	KRITERIJ	BODOVI				
		5	4	3	2	1
1.	Zapošljavanje kategorija boračkih populacija					
	1.1.	Zapošljavanje djece bez oba roditelja i RVI 100% I grupa	10			
	1.2.	Zapošljavanje člana p/š sa dva i više poginulih i RVI 100% II grupa		9		
	1.3.	Zapošljavanje člana porodice šehida i RVI 90%, 80% i 70 %			8	
	1.4.	Zapošljavanje ostalih RVI				7
	1.5.	Zapošljavanje demobilisanog borca				6
2.	Imovinski cenzus novouposlenog lica i članova p/d					
	2.1.	Porodica bez ikakvih primanja	10			
	2.2.	Porodična primanja do 50 KM po članu p/d		8		
	2.3.	Porodična primanja do 100 KM po članu p/d			6	
	2.4.	Porodična primanja do 150 KM po članu p/d				4
	2.5.	Porodična primanja do 200 KM po članu p/d				2
3.	Učešće u OS novouposlenog lica					
	3.1.	Patriotska liga i 48 mjeseci učešća u OS	5			
	3.2.	Puno učešće u OS (48 mjeseci)		4		
	3.3.	Učešće u OS od 36 do 48 mjeseci			3	
	3.4.	Učešće u OS od 24 do 36 mjeseci				2
	3.5.	Učešće u OS od 12 do 24 mjeseca				1
4.	Vrijeme na evidenciji Službe za zapošljavanje novouposlenog lica					
	4.1.	Preko 8 godina	8			
	4.2.	Od 6 do 8 godina		6		
	4.3.	Od 4 do 6 godina			4	
	4.4.	Od 2 do 4 godina				2
	4.5.	Do 2 godine				1
5.	Prethodni radni staž novouposlenog lica					
	5.1.	Preko 30 godina	8			
	5.2.	Od 20 do 30 godina		6		
	5.3.	Od 10 do 20 godina			4	
	5.4.	Od 5 do 10 godina				2
	5.5.	Od 1 do 5 godina				1
6.	Razvoj proizvodnih djelatnosti					
	6.1.	Proizvodne i izvozno orijentirane djelatnosti	8			
	6.3.	Poljoprivreda i prehrambena industrija		6		
	6.2.	Drvena, metalska ind. i proizvodno zanatstvo			4	
	6.5.	Uslužne i ostale djelatnosti				2
	6.4.	Pružanje stručnih i intelektualnih usluga				1
7.	Lično ulaganje u realizaciju projekta					
	7.1.	Lično ulaganje preko 50 % vrijednosti projekta	5			
	7.2.	Lično ulaganje od 40 – 50 % vrijednosti projekta		4		
	7.3.	Lično ulaganje od 30 – 40 % vrijednosti projekta			3	
	7.4.	Lično ulaganje od 20 – 30 % vrijednosti projekta				2

	7.5.	Lično ulaganje od 10 – 20 % vrijednosti projekta					1
8.	Realnost i održivost projekta						
	8.1.	Aplikant ima zadovoljavajuće tehničko znanje koje je vezano za projekat					5
	8.2.	Sveobuhvatan dizajn projekta je koherentan i sadrži konkretnu analizu problema					5
	8.3.	Sredstva su planirana realno				7	
	8.4.	Obezbijeđen plasman proizvoda	10				

Kriteriji pod rednim brojem 8 se boduju svaki pojedinačno.

Član 80.

U slučaju da je član užeg porodičnog domaćinstva (supružnik, roditelj i djeca) novouposlenog lica takođe bio pripadnik Oružanih snaga, novouposlenom licu se dodaju bodovi tog člana porodičnog domaćinstva definisani pod tačkom 3. Skale za evaluaciju projekata.

Član 81.

Prioritet u dodjeli bespovratnih sredstava nad fizičkim licima imaju udruženja boračkih populacija i fondacije registrovane za pružanje pomoći borcima i članovima njihovih porodica ili privredni subjekti čiji su osnivači udruženja / fondacije.

Član 82.

Izuzetno korisnici bespovratnih novčanih sredstava mogu biti pravna i fizička lica sa područja susjednih općina u Republici Srpskoj koje gravitiraju ka Kantonu, samo ako je u pitanju zapošljavanje povratnika u Republiku Srpsku i u tom slučaju neophodno je osigurati potrebnu nadležnost općinskog organa kojom se potvrđuje da je aplikant projekta povratnik u Republiku Srpsku.

Član 83.

Ukoliko na Javni poziv nema prijava ili se nije prijavio dovoljan broj pravnih lica iz člana 81., raspoloživa sredstva dodjeliće se pod jednakim uslovima fizičkim i ostalim pravnim licima koja su podnijela zahtjev za dodjelu sredstava, a u skladu sa odredbama ovog Zakona.

Član 83.a)

U slučaju da privredno društvo čiji je većinski vlasnik udruženje/fondacija registrovana za pružanje pomoći borcima i članovima njihovih porodica aplicira Projektom na osnovu kojeg bi se zaposlilo veći broj lica iz članu 2. ovog Zakona, kao i članovi njihovih porodica, imaju prednost pri dodjeli sredstava planiranih u budžetu za predmetne namjene.

U vezi sa predhodnim stavom ovog člana cjelokupan iznos planiranih sredstava u budžetu za zapošljavanje i samozapošljavanje u jednoj kalendarskoj godini može se odobriti jednom privrednom društvu iz stava 1. ovog člana, bez obzira na uslove i kriterije propisane članom 77.stav 2. i članom 79. ovog Zakona.

Pod uslovom da nema projekata apliciranih od strane privrednih društava iz stava 1. ovog člana, cjelokupan iznos sredstava obezbijeđen u budžetu za zapošljavanje i samozapošljavanje u jednoj kalendarskoj godini može se odobriti i privrednom društvu čiji osnivač nije udruženje/fondacija sa sjedištem na području Kantona ukoliko u projektu izraze potrebu za zapošljavanjem većeg broja lica iz člana 2. ovog Zakona, pod uslovima i kriterijima propisanim ovim Zakonom.

Odluku prvenstva za korištenje i odobravanje sredstava za zapošljavanje donosi Vlada na prijedlog Ministarstva».

10. PREDNOST PRI ZAKUPU I OTKUPU POSLOVNOG PROSTORA

Član 84.

Lica iz člana 2. ovog Zakona imaju prednost, a u skladu sa važećim materijalnim propisima, prilikom zakupa i otkupa poslovnog prostora u vlasništvu Općina i Kantona, ako rješavaju pitanje svog zaposlenja.

11. OSTVARIVANJE PENZIJE POD POVOLJNIM USLOVIMA

Član 85.

Lica iz člana 2. ovog Zakona pod povoljnijim uslovima mogu ostvariti pravo na penziju i dodatak na penziju u skladu sa pozitivnim zakonskim propisima.

12. PRVENSTVO UPISA U OBRAZOVNE USTANOVE I BESPLATNO ŠKOLOVANJE

Član 86.

Pod jednakim uvjetima utvrđenim posebnim propisima, lica iz člana 1. ovog Zakona, kao i njihova djeca, imaju pravo na prvenstvo upisa i besplatno školovanje u obrazovnim ustanovama čiji je osnivač ili suosnivač Kanton ili Općina.

Lica iz člana 2. ovog Zakona imaju pravo na besplatno doškolovanje, odnosno prekvalifikaciju radi sticanja neophodnog stepena obrazovanja koje im je potrebno radi obavljanja određenih poslova, a isto nije u mogućnosti da obavlja poslove na koje je bilo raspoređeno prije nastanka invalidnosti.

Obrazovne ustanove iz prethodnog stava će svojim pravilima ili drugim aktima utvrditi način i uvjete za korištenje ovog prava.

13. STIPENDIRANJE

Član 87.

Lica iz člana 2. ovog Zakona, kao i njihova djeca, imaju pravo na dodjelu stipendije za vrijeme redovnog školovanja i studija u srednjoškolskim i visokoškolskim obrazovnim ustanovama.

13.1. Uslovi, način i kriteriji za ostvarivanje prava na dodjelu stipendija

Član 88.

Ministar donosi plan stipendiranja učenika u srednjim školama, višim i visokoškolskim ustanovama za svaku školsku godinu, a u skladu sa raspoloživim sredstvima odobrenih u budžetu.

Član 89.

O stipendiranju učenika i studenata iz člana 87. ovog Zakona stara se Ministarstvo, a koje program stipendiranja realizuje putem tročlane Komisije za dodjelu stipendija koju formira Ministar za svaku školsku godinu posebno.

U sastav Komisije imenuje se jedan predstavnik Ministarstva za boračka pitanja – predsjednik Komisije, jedan predstavnik Ministarstva za obrazovanje, nauku, kulturu i sport i jedan zajednički predstavnik iz reda udruženja i organizacija koji okupljaju pripadnike boračkih populacija, a kojeg predloži koordinacija boračkih udruženja Kantona.

Ministarstvo će:

- objaviti Konkurs;
- zaprimati prijave na Konkurs;
- obezbijediti potrebne uslove za rad Komisije za dodjelu stipendija;
- po završetku Konkursa i izboru kandidata po odluci Komisije za dodjelu stipendija, Ministarstvo
- nastaviti sve dalje aktivnosti vezano za sprovođenje odluke o izboru;
- pratiti realizaciju zaključenih pojedinačnih Ugovora o stipendiranju i
- vršiti doznaku sredstava stipendistima putem ovlaštene poslovne banke.

Član 90.

Po utvrđenim i odobrenim godišnjim sredstvima za stipendiranje učenika i studenata iz člana 87. ovog Zakona iz budžeta Ministarstva sredstva se obezbjeđuju za:

- redovno školovanje učenika u srednjem obrazovanju 50 %
- redovno školovanje studenata na višim i visokoškolskim ustanovama 50%.

Raspodjela sredstava može, po potrebi, biti i drugačija, a u zavisnosti od broja prijavljenih kandidata za dodjelu stipendija za pojedine vrste školovanja, a o čemu konačnu odluku donosi Ministar uz saglasnost Vlade.

Izuzetno od odredbi stava 1. i 2. ovog člana Ministar cjelokupan iznos obezbjeđenih sredstava u budžetu može rasporediti pojedinoj vrsti (nivou) školovanja i pojedinačnoj kategoriji iz reda pripadnika boračkih populacija, uz saglasnost Vlade.

Član 91.

Izbor kandidata za stipendiranje vrši se na osnovu prijave na konkurs. Konkurs raspisuje Ministarstvo.

Konkurs sadrži:

- uslove i kriterije koje kandidati moraju ispunjavati;
- broj kandidata koji se stipendiraju;
- broj mjeseci na koje se stipendija odnosi i njen mjesečni iznos;
- rok za podnošenje prijave;
- potrebne isprave koje se prilažu uz prijavu na konkurs;
- adresu ili druge podatke (fax, e-mail) na koju se prijava na konkurs podnosi
- i druge eventualno potrebne podatke.

Konkurs za dodjelu stipendija se objavljuje u jednom od dnevnih listova koji izlazi na području Federacije BiH na drugi pogodan način (elektronski mediji, web stranice, oglasne ploče Kantona i udruženja boračkih populacija).

Rok za podnošenje prijave na Konkurs za dodjelu stipendija određuje Ministarstvo za svaku školsku godinu posebno i isti objavljuje u tekstu Konkursa za dodjelu stipendija.

Član 92.

Izbor kandidata za dodjelu stipendija vrši tročlana Komisija iz člana 89. ovog Zakona.

Komisija je dužna razmotriti prijave u roku od 30 dana od dana zatvaranja Konkursa za dodjelu stipendija i u narednih 10 dana donijeti prijedlog odluke o izabranim kandidatima.

Ministarstvo raspisuje Konkurs za dodjelu stipendija najkasnije do kraja mjeseca oktobra tekuće godine za narednu školsku godinu, a čiji se tekst objavljuje u jednom dnevnom listu koji izlazi na području Kantona i na drugi pogodan način koji odredi Ministarstvo.

Komisija je dužna, po obavljenom odabiru kandidata objaviti svoju Odluku i spisak svih odabranih kandidata za stipendiranje, te istu sa izvještajem dostaviti Ministru na dalju nadležnost i postupanje.

Na osnovu prijedloga Odluke Komisije o izboru kandidata i dodjeli stipendija i pozitivnih zakonskih propisa Ministar sa korisnicima zaključuje pojedinačne ugovore.

Član 93.

U svome radu Komisija za dodjelu stipendija ima sljedeće nadležnosti:

- učestvuje u izradi i raspisivanju konkursa za dodjelu stipendija
- razmatra zahtjeve za dodjelu stipendija i sačinjava prijedlog za dodjelu stipendija;
- po potrebi, preciznije definiše kriterije prioriteta za dodjelu stipendija iz člana 102. ovog Zakona.

Član 94.

Za učenike i studente **koji se prvi puta upisuju** u srednju školu, višu ili visokoškolsku obrazovnu ustanovu za utvrđivanje prosjeka ocjena uzet će se u razmatranje prosjek ocjena završnog razreda osnovne, odnosno prosjek ocjena završnog razreda srednje škole.

Član 95.

Stipendije se isplaćuju za jednu školsku godinu i isplaćivat će se 9 (devet) mjeseci u kojima se nastava odvija u školskoj godini.

Član 96.

Visina mjesečne stipendije iznosi 20% od prosječne neto plaće isplaćene u Federaciji BiH u predhodnoj godini.

Član 97.

Stipendija se, u pravilu, ne može dodijeliti za dva ili više učenika iz iste porodice i licima koja već primaju stipendiju od nekog drugog organa, institucije ili fondacije. Porodicu u smislu ovog Zakona čini: bračni drug, djeca rođena u braku ili van braka, usvojena djeca, braća, sestre, kao i roditelji ako žive u zajedničkom domaćinstvu.

Izuzetno od stava 1. ovog člana, stipendija se može dodijeliti za više učenika - studenata iz iste porodice, ukoliko nije bilo dovoljno prijavljenih kandidata, koji ispunjavaju uslove Konkursa za dodjelu stipendije po odredbama stava 1. ovog člana.

Član 98.

Prava i obaveze i druga pitanja o dodjeli i korišćenju stipendije regulisat će se preciznije u međusobno zaključenom Ugovoru između odabranog stipendiste i Ministarstva.

Ugovor o stipendiranju učenika, studenata sadrži: ime i prezime učenika - studenta, JMBG, ime i prezime roditelja (staratelja) i njegovu tačnu adresu, broj telefona, JMBG roditelja (staratelja), naziv škole i međusobna prava i obaveze učenika - studenta i Ministarstva.

Ugovor o stipendiranju potpisuju roditelj (staratelj) učenika, student i Ministar ili lice koje on ovlasti.

Član 99.

Stipendije su nepovratne ukoliko stipendisti redovno ispunjavaju svoje školske obaveze.

Roditelj (staratelj) učenika i student koji je potpisnik ugovora o stipendiranju dužan je da vrati sav iznos sredstava, uz pripadajuću zakonsku kamatu, u roku od godinu dana, koje je primio za stipendiranje po osnovu ovog Zakon u slučaju ako napusti redovno školovanje ili ako izgubi pravo na dalje školovanje.

Ministarstvo će obezbijediti kontrolu sprovođenja odredbi Ugovora i po potrebi pokretati postupke za raskid Ugovora i nadoknadu sredstava.

Član 100.

Ministar ima pravo da obustavi isplatu stipendije shodno uslovima po osnovu Zakona i u slučaju nedostatka finansijskih sredstava u budžetu Ministarstva planiranih za ovu namjenu, a o čemu će korisnici stipendija biti pismeno obaviješteni.

Član 101.

Komisija će u razmatranju pristiglih molbi za dodjelu stipendija utvrđivati broj bodova za svakog kandidata prema sljedećem:

1. Bodovi po osnovu rezultata u učenju

- za učenike prvog razreda srednje škole prosječna ocjena u osmom razredu osnovne škole zaokružena na jednu decimalu i pomnožena sa 10,
- za učenike srednjih škola prosječna ocjena u prethodnoj školskoj godini zaokružena na jednu decimalu i pomnožena sa 10,
- za studente na prvoj godini studija prosječna ocjena u IV razredu srednje škole zaokružena na jednu decimalu i pomnožena sa 19,
- za studente viših godina studija prosječna ocjena u prethodnoj godini studija zaokružena na jednu decimalu i pomnožena sa 10,
- za učenike ponos generacije iz prethodne školske godine 6 bodova,
- za osvojene nagrade na takmičenjima iz oblasti znanja koje organizuje Prosvjetno-pedagoški zavod na kantonalnom, državnom i međunarodnom nivou 6 bodova,

2. Bodovi po osnovu otežanih uslova života koji su nastali kao posljedica agresije

- Učenik ili student bez jednog roditelja koji je poginuo kao pripadnik Oružanih snaga 15 bodova,
- Učenik ili student za roditelja ratnog vojnog invalida sa invaliditetom preko 80 % 10 bodova,
- Učenik ili student za roditelja ratnog vojnog invalida sa invaliditetom od 60 do 80 % 8 bodova,
- Učenik ili student roditelja ratnog vojnog invalida sa invaliditetom do 60% 6 bodova,
- Učenik ili student za svakog člana porodičnog domaćinstva koji je ratnog vojnog invalida preko 50 % 2 boda,

- Učenik ili student za roditelje pripadnike Oružanih snaga za svaki puni mjesec učešća roditelja u Oružanim snagama, obuhvata učešće od 18.9.1991. do 23.12.1996. 1 bod.

3. Bodovi po osnovu dodjele ratnih priznanja

- Učenik ili student čiji su roditelji nosioci najviših ratnih priznanja 5 bodova,

4. Bodovi po osnovu niskog porodičnog standarda

- Učenik ili student čija porodica prima socijalnu pomoć ili je bez ikakvih primanja 15 bodova,
- Učenik ili student čija porodica ima manja primanja od 15% po članu domaćinstva prosječne netto plaće isplaćene u predhodnoj godini u Federaciji BiH 10 bodova,
- Učenik ili student čija porodica ima primanja od 15% do 25% prosječne netto plaće po članu porodičnog domaćinstva isplaćene u Federaciji BiH u predhodnoj godini 8 bodova,
- Učenik ili student za svakog nezaposlenog punoljetnog člana porodičnog domaćinstva 2 boda.

5. Bodovi po ostalim osnovama

- Učenik ili student za svakog teško oboljelog člana porodičnog domaćinstva, a koji nije bodovan po osnovu ratne vojne invalidnosti (npr. maligna oboljenja, teška srčana oboljenja, dijabetes) 2 boda,
- Učenik ili student za svakog člana porodičnog domaćinstva na redovnom školovanju 1 bod,
- Učenik ili student bez jednog roditelja koji je umro nakon agresije a bio je u toku agresije pripadnik Oružanih snaga i to:
 - a) Umrli ratni vojni invalid 10 bodova,
 - b) Umrli borac - branilac 5 bodova.

Član 102.

Stipendije bez bodovanja po odredbama člana 102. ovog Zakona, ukoliko ispunjavaju uslove iz člana 87. ovog Zakona i ne obnavljaju razred ili godinu, dobivaju:

1. Djeca bez oba roditelja čiji su roditelji poginuli kao pripadnici Oružanih snaga ili umrli odnosno poginuli nakon agresije, a jedan od njih je bio pripadnik Oružanih snaga;
2. Djeca ratnih vojnih invalida I grupe sa 100 % invaliditeta sa pravom na tuđu njegu i pomoć;
3. Učenici generacija iz prethodne školske godine;
4. Studenti sa prosjekom 9,0 i više za prethodnu školsku godinu;
5. Jedno od djece koje bi u skladu sa kriterijima bodovanja imalo najviše bodova, iz porodice u kojoj se na redovnom školovanju nalaze troje i više djece.

Član 103.

Kada prijavljeni kandidati pri bodovanju imaju isti broj bodova, prednost će imati kandidati viših razreda odnosno godina studija i čiji je porodični standard niži.

Član 104.

Izuzetno na uslove, način i postupak propisane ovim Zakonom na prijedlog Ministarstva uz saglasnost Vlade, postupak dodjele stipendija licima iz člana 2. ovog Zakona i njihovoj djeci može da provodi Ministarstvo za obrazovanje, nauku, kulturu i sport Bosansko-podrinjskog kantona Goražde uz uvažavanje kriterija propisanih ovim Zakonom.

14. PREDNOST PRI SMJEŠTAJU U ĐAČKE I STUDENTSKE DOMOVE

Član 105.

Đački i studentski domovi kojima je osnivač Kanton dužni su svojim aktima propisati da prioritet za smještaj u ove ustanove imaju djeca lica iz člana 2. ovog Zakona.

15. PRAVO NA BESPLATNE OBAVEZNE UDŽBENIKE ZA REDOVNO ŠKOLOVANJE

Član 106

Djeci lica iz člana 2. ovog Zakona, koja pohađaju osnovnu i srednju školu na području Kantona, obezbijediti će se novčana pomoć za nabavku obaveznih udžbenika.

Pravo na novčanu pomoć za nabavku udžbenika imaju lica iz stava 1. ovog člana pod uvjetima i na način utvrđenim kriterijima kao i raspoloživim sredstvima.

Izuzetno, pravo iz stava 1. ovog člana bez obzira na kriterije pripadaju djeci bez oba roditelja.

15.1. Uslovi, način, postupak i kriteriji dodjele sredstava za nabavku udžbenika

Član 107.

Osiguranje udžbenika za učenike osnovnih i srednjih škola sa prostora Kantona iz budžeta Ministarstva vršit će se u skladu sa odredbama ovog Zakona, pod uslovom da su prvi put upisali razred redovne osnovne ili srednje škole.

Član 108.

Odobranje sredstava za nabavku udžbenika vršit će se samo u socijalno-ekonomski opravdanim slučajevima, odnosno učenicima koji se nalaze u teškim socijalno-ekonomskim uslovima, a koji zadovoljavaju opće i posebne uslove utvrđene ovim Zakonom.

Pod teškim socijalno-ekonomskim uslovima po ovom Zakonu smatraju se podnosioci zahtjeva čija ukupna novčana primanja članova porodičnog domaćinstva uključujući i primanja po osnovu socijalne i boračko-invalidske zaštite ne prelaze iznos od 15% prosječne netto plaće isplaćene u Federaciji BiH u predhodnoj godini, po jednom članu domaćinstva.

Član 109

Pod udžbenicima za osnovno i srednje obrazovanje podrazumjevaju se nastavna sredstva koja izlažu gradivo utvrđeno nastavnim planom i programom.

Član 110

Maksimalan iznos sredstava odobrenih za nabavku besplatnih udžbenika u toku jedne budžetske godine ne može biti veći od iznosa sredstava planiranih za te namjene u budžetu Ministarstva.

Svake budžetske godine utvrđuje se visina novčanih sredstava za ove namjene.

Član 111.

Djeci lica iz člana 2. ovog Zakona mogu se odobriti bespovratna sredstva za nabavku udžbenika samo na osnovu podnesenog zahtjeva i priloga iz kojih se može ustanoviti da se podnosilac zahtjeva nalazi u izuzetno teškoj materijalnoj i socijalnoj situaciji.

Član 112.

Ministarstvo će za svaku budžetsku godinu objaviti Javni poziv za ostvarivanje prava na besplatne obavezne udžbenike za redovno školovanje.

Član 113.

Lica iz člana 2. ovog Zakona podnose zahtjev Ministarstvu na propisanom obrascu.

U ovom obrascu navedena je i potrebna dokumentacija koju je podnositelj zahtjeva dužan priložiti uz isti.

Podneseni zahtjev važi samo za budžetsku godinu u kojoj je zahtjev podnijet.

Član 114.

Zahtjev koji je primljen pismenim putem, a koji je nerazumljiv ili nepotpun, vratiće se podnosiocu zahtjeva radi dopune i preciziranja ili ako je to povoljnije za podnosioca zahtjeva, pozvat će se usmeno ili putem telefona obavijestiti o potrebi preciziranja i dopune zahtjeva i o istom napraviti službena zabilješka.

Član 115

Ministar za svaku budžetsku godinu imenuje tročlanu komisiju, koja razmatra prispjele pismene zahtjeve za dodjelu i donosi prijedlog Odluke o dodjeli sredstava za nabavku udžbenika.

Član 116.

Prijedlog Odluke, Komisija je dužna donijeti najkasnije u roku od 10 (deset) dana od datuma definisanog za prijem zahtjeva u Javnom oglasu.

Član 117.

Na prijedlog komisije, Ministar donosi Odluku o dodjeli sredstava podnosiocima zahtjeva.

Na Odluku iz predhodnog stava, podnosilac zahtjeva može uložiti prigovor Ministru u roku od 8 (osam) dana od dana isticanja Odluke na oglasnoj ploči Kantona.

Član 118.

Po okončanju školske godine učenici koji su dobili školske udžbenike dužni su iste vratiti u biblioteku škole.

U slučaju da učenik ne vrati udžbenike ili ih je u znatnoj mjeri oštetio dužan je za iste platiti određeni novčani iznos.

Član 119.

Opći kriteriji za ostvarivanje prava za dodjelu sredstava su da podnosioci zahtjeva posjeduju dokaz da učenik redovno pohađa osnovnu ili srednju školu i da prvi put upisuje razred.

Član 120.

Posebni kriteriji za ostvarivanje prava za dodjelu sredstava su:

1. Borački status,
2. Socijalni položaj podnosioca zahtjeva (ukupna novčana primanja članova porodičnog domaćinstva uključujući i primanja po osnovu socijalne i boračko invalidske zaštite da ne prelaze iznos od 15% prosječne netto plaće isplaćene u Federaciji BiH u predhodnoj godini, po jednom članu porodičnog domaćinstva,
3. Veći broj članova porodičnog domaćinstva.

Član 121.

Obavezne isprave-dokumenta koja dostavljaju svi podnosioci zahtjeva (roditelj , staratelj) za dodjelu sredstava su :

1. Zahtjev sa tačnom adresom, jedinstvenim matičnim brojem građana i brojem kontakt telefona na jedinstvenom obrascu;
2. Dokaz o pripadništvu boračkoj populaciji, za roditelje odnosno staratelje;
3. Kućnu listu;
4. Uvjerenje Službe za zapošljavanje da se punoljetni članovi porodičnog domaćinstva nalaze na evidenciji (za nezaposlena lica);
5. Dokaze o ukupnim mjesečnim primanjima podnosioca zahtjeva i punoljetnih članova po osnovu:
 - radnog odnosa (potvrda preduzeća),
 - penzije (ček od penzije),
 - boračko-invalidske zaštite (potvrda općinskog organa).

16. STAMBENO ZBRINJAVANJE I POMOĆ U STAMBENOM ZBRINJAVANJU

Član 122

Lica iz člana 2. ovog Zakona imaju pravo na stambeno zbrinjavanje i pomoć u stambenom zbrinjavanju.

Pravo iz stava 1. ovog člana, pripada i licima povratnicima u Republiku Srpsku pod uslovom da su na dan potpisivanja "Općeg okvirnog sporazuma za mir u BiH"(14.12.1995.g.), imala boravište na području Kantona.

Član 123.

Stambeno zbrinjavanje i pomoć u stambenom zbrinjavanju lica iz člana 2. ovoga Zakona vrši se po pravu prvenstva kako sljede:

1. djeci poginulih, umrlih, nestalih boraca bez oba roditelja i ratnim vojnim invalidima sa oštećenjem organizma od 100% I grupe;
2. porodicama sa dva i više poginulih, umrlih, nestalih boraca i ratnim vojnim invalidima sa oštećenjem organizma od 100% II grupe;
3. porodicama poginulih, umrlih, nestalih boraca i ratnim vojnim invalidima sa oštećenjem organizma od 90%, 80% i 70%;
4. ostalim ratnim vojnim invalidima;
5. demobilisanim borcima.

Član 124.

Stanovi iz fonda stanova namijenjenih za rješavanje stambenih pitanja lica iz člana 2. ovog Zakona, dodjeljivat će se na osnovu posebnog propisa kojeg donosi Vlada na prijedlog Ministarstva, u kojem se naročito uređuju kriteriji, uslovi i način dodjele stanova.

Pravo iz stava 1. ovog člana, gube ona lica koja bez opravdanog razloga odbiju ponuđeni odgovarajući stan.

Član 125.

Lica iz člana 2. ovog Zakona, imaju pravo na dodjelu kredita za rješavanje stambenih potreba.

Licima iz prethodnog stava ovog člana, koja su u izuzetno teškoj materijalno – socijalnoj situaciji, može se dodjeliti jednokratna bespovratna pomoć za rješavanje stambenih potreba.

Lica iz člana 2. ovog Zakona koja su stambeno nerješena ili neadekvatno imaju riješeno stambeno pitanje u pogledu veličine i uslovnosti stambene jedinice čiji su vlasnici, imaju pravo na rješavanje svog stambenog pitanja putem udruživanja ličnih sredstava

Pravo iz stava 1. ovog člana realizuje se na osnovu bankovnih propisa, a u skladu sa Ugovorom o deponovanju i plasmanu finansijskih sredstava koji zaključuje Ministarstvo sa odabranom bankom.

16.1. Uslovi ostvarivanja prava na jednokratnu bespovratnu dodjelu sredstava za rješavanje stambenih potreba i definisanje korisnika prava

Član 126.

Pravo na jednokratnu bespovratnu dodjelu sredstava za rješavanje stambenih potreba (u daljem tekstu: dodjela sredstava) ostvaruju lica iz čl. 2. Zakona pod uslovom da su do dana podnošenja zahtjeva:

- započela izgradnju stambene zgrade ili stana, a istu nisu dovršili zbog nedostatka sredstava;
- imaju odgovarajući stambeni prostor, koji je neophodno dograditi ili adaptirati kako bi se stvorili neophodni uslovi za stanovanje;
- nisu izvršili priključak na infrastrukturnu mrežu.

Član 127.

Prema odredbama ovog Zakona smatraju se stambeno riješenim i nemaju pravo na dodjelu jednokratne bespovratne pomoći za rješavanje stambenih potreba, pripadnici boračke populacije koji su:

- vlasnici porodične stambene zgrade ili stana na području Bosne I Hercegovine, ili koji zadovoljavaju stambene potrebe u skladu sa propisima koji regulišu stambene odnose i ovim Zakonom, ili da takav stan posjeduje njihov član porodičnog domaćinstva;
- koristili stambeni objekat u ličnom ili vlasništvu člana porodičnog domaćinstva, koji su odgovarali potrebama stanovanja u skladu sa propisima koji regulišu stambene odnose i ovim Zakonom, a svojevrijem su izgubili svojinu nad stambenim objektom, teretnim ili dobroćinim pravnim poslom (sa ili bez naknade), ili su ga bilo kojim drugim pravnim poslom, otuđili nakon 14.12.1995.godine;

- na ime stambenog zbrinjavanja ostvarili jednokratnu bespovratnu pomoć u novčanim sredstvima ili građevinskom materijalu od strane državnih organa i institucija ili međunarodnih organizacija u visini koja prelazi 10.000,00 KM.
- Pripadnici boračkih populacija koji nisu imali prebivalište – boravište na području Kantona na dan potpisivanja «Općeg okvirnog sporazuma za mir u Bosni i Hercegovini» (dana 14.12.1995.), te pripadnici boračkih populacija koja imaju status raseljenog lica izuzev interno raseljenih lica ;
- Pripadnici boračkih populacija koji nisu proveli neprekidno jednu godinu u Oružanim snagama ;
- Pripadnici boračkih populacija koji su proveli više od jedne godine u Oružanim snagama, a iste su samovoljno napustili.

Član 128.

Pod odgovarajućom strukturom stana koja ispunjava stambene potrebe u skladu sa zakonom, u smislu ovog Zakona, podrazumjeva se stan sa jednom ili više prostorija koje korisnika osiguravaju od elementarnih nepogoda i štite njegovo pukućstvo od oštećenja kako slijedi:

Minimalan sadržaj uslovne stambene jedinice baziran je na veličini domaćinstva sa dva, tri i četiri člana i određuje se kao osnovni sadržaj i treba da sadrži: dnevni boravak, kuhinju, spavaću sobu, kupatilo sa WC-om i hodnik, sa površinama kako slijedi: dnevni boravak 15-18m²; kuhinja 4,5-6m²; spavaća soba 11-14m²; kupatilo 3,3 – 4,4m². -Minimalan sadržaj uslovne stambene jedinice prema osnovnom sadržaju iz prethodnog stava i broju članova domaćinstva, određuje se na slijedeći način:

- a) za jednog člana domaćinstva, dnevni boravak, kuhinja, ½ sobe, kupatilo sa wc-om;
- b) za pet i više članova domaćinstva, osnovni sadržaj stambene jedinice se povećava za ½ sobe po članu domaćinstva;

Napomena: Izuzetno ako stambena jedinica ispunjava kriterije uslovnosti iz predhodnih stavova pomoć se može dodjeliti po procjeni stručne komisije ukoliko je oštećen krov ili ukoliko treba zatvoriti nužne otvore na dijelu stambene jedinice.

U smislu ostvarivanja prava iz člana 125. stav 2. ovog Zakona članovima porodičnog domaćinstva, smatraju se članovi porodičnog domaćinstva u skladu sa zakonom, odnosno bračni drug, djeca (rođena u braku ili van braka, usvojena ili pastorčad), bračni drugovi djece, roditelji bračnih drugova (otac, majka, očuh, maćeha, usvojilac), braća i sestre, unučad bez roditelja, kao i druga lica koja je korisnik dužan po Zakonu da izdržava ili su ta lica dužna da izdržavaju korisnika, a koja zajedno sa njim trajno žive i stanuju, kao i lica koja sa korisnikom žive u ekonomskoj zajednici više od 10 godina, ili više od pet godina, ako su zaključili ugovor o doživotnom izdržavanju.

Član 129.

Pod teškom stambenom situacijom podrazumjeva se:

- a) kolektivni smještaj,
- b) lica sa privremenim rješenjem na stan ili podstanar,
- c) lice povratnik privremeno smješteno u pomoćnom objektu bez osnovnih uslova stanovanja,
- d) lice koje sa užom porodicom živi kod svojih roditelja ili roditelja bračnog druga u objektu neodgovarajuće strukture ,
- e) lice povratnik u Republiku Srpsku,
- f) lice koje stanuje u vlastitom objektu sa neodgovarajućom strukturom ili nije priključeno na infrastrukturnu mrežu.

Član 130.

(Visina jednokratne bespovratne pomoći za pomoć u stambenom rješavanju)

Maksimalan iznos sredstava odobrenih za jednokratne bespovratne pomoći za rješavanje stambenih potreba boraca i članova njihovih porodica u toku jedne budžetske godine ne može biti veći od iznosa sredstava planiranih za te namjene u Budžetu Ministarstva.

Iznos sredstava koji se može dodijeliti podnosiocu zahtjeva na ime ostvarivanja prava iz stava 2. člana 125.ovog Zakona **ne može prelaziti 10.000,00** (slovima: desethiljada KM), bez obzira na broj bodova utvrđen rang listom i stambenom situacijom.

16.2. Način ostvarivanja prava na ime dodjele sredstava za izgradnju, adaptaciju, rekonstrukciju ili dogradnju stambenog objekta

Član 131.

(Podnošenje zahtjeva)

Lica koja imaju pravo na ostvarivanje prava na dodjelu sredstava podnose zahtjeve na posebnim obrascima, koje priprema Ministarstvo svake godine prema zahtjevima potreba dokazne dokumentacije, u rokovima određenim **Javnim pozivom** za ostvarivanje prava na dodjelu sredstava koji se objavljuje za svaku budžetsku godinu.

U obrascima iz stava (1) ovog člana navedena je i potrebna dokumentacija koju je podnosilac zahtjeva dužan priložiti uz isti.

Član 132.

(Postupak dodjele sredstava)

O dodjeli sredstava odlučuje Ministar uz saglasnost Vlade, uzevši u obzir broj bodova po kriterijima bodovanja i nalaz i mišljenje komisija za procjenu oštećenja stambenih objekata i utvrđivanje potreba za građevinskim materijalom i izvođenjem radova.

Stručna komisija ocijenivši opravdanost, hitnost i objektivnu potrebu za prioriteto rješavanje stambenog pitanja svakog pojedinačnog podnosioca zahtjeva, nalaz i mišljenje komisija, za teško egzistencijalno, stambeno, zdravstveno ili na drugi način ugrožene korisnike, sačinjava posebnu listu prioriteta za rješavanje, bez obzira na broj bodova po kriterijima bodovanja.

Član 133.

(Postupak sa nerealiziranim zahtjevima)

Zahtjevi koji nisu mogli biti realizirani u godini u kojoj su podnijeti, prenose se u rješavanje za narednu godinu, pod uvjetom da se budžetom Kantona odobri finansiranje ovog prava, a obaveza podnosioca zahtjeva je da **po raspisanom Javnom pozivu za narednu godinu** dopuni svoj zahtjev nužnom dokumentacijom koju propisuje Ministarstvo.

Član 134.

(Procjena oštećenja stambenih objekata)

Komisije imenuje Ministar, odnosno posao procjene oštećenja stambenih objekata i utvrđivanje potreba za građevinskim materijalom i izvođenjem radova povjerava relevantnoj kantonalnoj instituciji.

Komisije vrše posao procjene oštećenja stambenih objekata i utvrđuju potrebe za građevinskim materijalom o minimumu stambenih uslova definisanih u članu 128. ovog Zakona za sanaciju, adaptaciju i izgradnju stambenih objekata.

Član 135.

(Postupak po prigovoru na liste korisnika)

Na odluku Ministra iz člana 132. koje se objavljuju kao preliminarne liste korisnika dodjele sredstava, može se podnijeti prigovor Ministru.

Rješenje koje Ministar donese po prigovoru je konačno.

Nakon proteka prigovornog roka objavljuju se liste korisnika dodjele sredstava koje su konačne.

Član 136.

(Zaključivanje ugovora između korisnika i Ministarstva)

Korisnik prava na dodjelu sredstava zaključuje sa Ministarstvom ugovor kojim se detaljno preciziraju prava i obaveze korisnika i davaoca sredstava po ovom osnovu.

Obavezni sastavni dio ovog ugovora jeste odredba da korisnik prava na dodjelu sredstava na ovaj način završava sa svojim potraživanjima prema Ministarstvu po osnovu rješavanja stambenog pitanja.

6.3. Kriteriji za prvenstvo korištenja prava

Član 137. (Kriteriji bodovanja)

Prilikom formiranja liste korisnika prava na dodjelu sredstava pored ispunjavanja uvjeta iz čl. 125. Zakona, Stručna komisija iz člana 132. stav (1) uzima u obzir zbir bodova dobivenih na osnovu:

- a) općih kriterija,
- b) posebnih kriterija,
- c) dopunskih kriterija.

Odjeljak A - Opći kriteriji

Član 138. (Opći kriteriji)

a) Stambena situacija se rješava

1. sanacijom, rekonstrukcijom, adaptacijom, preuređenjem krovišta i potkrovlja u stambeni prostor, pretvaranjem zajedničkih prostorija u stambeni prostor ili dogradnjom stambene jedinice 40 bodova

b) Broj članova porodičnog domaćinstva

1. za svakog člana porodičnog domaćinstva, podnosioca zahtjeva po 10 bodova

c) Učešće u Oružanim snagama

1. učešće od 18. 09. 1991. - 23. 12. 1995. za jedan mjesec 4 boda

- Bodovi za učešće u Oružanim snagama pripadaju podnosiocu zahtjeva..

d) Nosioci najviših ratnih priznanja 40 bodova

e) Hronološki red podnijetih zahtjeva - za svaku godinu čekanja 40 bodova

- Ukupan broj bodova ostvaren po svakoj tački ovog člana međusobno se zbraja.
- Za ratne vojne invalide koji su otpušteni iz Oružanih snaga po osnovu vojne nesposobnosti koja je posljedica ranjavanja ili povređivanja i šehide - poginule borce, učešće u Oružanim snagama boduje se za čitav period od momenta stupanja u Oružane snage pa sve do završetka oružane agresije na Bosnu i Hercegovinu (23.12.1995.godine).

Odjeljak B - Posebni kriteriji

Član 139. (Posebni kriteriji)

a) Broj poginulih boraca-šehida članova porodičnog domaćinstva

1. članovi PŠiPB sa dva i više poginulih i roditelji koji su izgubili jedino dijete	50 bodova
2. članovi PŠiPB sa jednim poginulim sa troje i više malodobne djece	45 bodova
3. članovi PŠiPB sa jednim poginulim i dvoje malodobne djece	40 bodova
4. članovi PŠiPB sa jednim poginulim i jednim malodobnim djetetom	30 bodova
5. šehidska porodica bez djece	25 bodova
6. roditelji šehida sa jednim poginulim	20 bodova

b) Procenat oštećenja organizma

1. Ratni vojni invalid sa procentom tjelesnog oštećenja 100% I i II grupe	50 bodova
2. Ratni vojni invalidi sa procentom tjelesnog oštećenja 90% III grupe	45 bodova
3. Ratni vojni invalidi sa procentom tjelesnog oštećenja 80% IV grupe	40 bodova
4. Ratni vojni invalidi sa procentom tjelesnog oštećenja 70% V grupe	35 bodova
5. Ratni vojni invalidi sa procentom tjelesnog oštećenja 60% VI grupe	30 bodova
6. Ratni vojni invalidi sa procentom tjelesnog oštećenja 50% VII grupe	25 bodova
7. Ratni vojni invalidi sa procentom tjelesnog oštećenja 40% VIII grupe	20 bodova
8. Ratni vojni invalidi sa procentom tjelesnog oštećenja 30% IX grupe	15 bodova
9. Ratni vojni invalidi sa procentom tjelesnog oštećenja 20% X grupe	10 bodova

c) Borci - branioci BiH

8 bodova

- Podnosiocu zahtjeva pripadaju bodovi samo po osnovu jedne tačke ovoga člana, koja je za njega povoljnija.

Odjeljak C - Dopunski kriteriji**Član 140.****(Dopunski kriteriji)****a) Teška bolest podnosioca zahtjeva ili člana porodičnog domaćinstva**

Pod teškim bolestima u smislu ove uredbe smatraju se:

- 1) akutna tuberkuloza;
- 2) maligna oboljenja;
- 3) endemska nefropatija;
- 4) stanje poslije hirurškog zahvata srca;
- 5) sva degenerativna oboljenja centralnog nervnog sistema;
- 6) infarkt (srčani, moždani);
- 7) oboljenje mišićnog sistema i paralize.

Sve ove bolesti boduju se pojedinačno sa

5 bodova

b) Maloljetni pripadnici Oružanih snaga

Licima koja su se uključila u OS u životnoj dobi kada nisu bili vojni obveznici

20 bodova

c) Borački status člana porodičnog domaćinstva

Dodatni borački status za svakog člana porodičnog domaćinstva

20 bodova

d) Materijalna situacija porodičnog domaćinstva podnosioca zahtjeva

1. porodice korisnici socijalne pomoći i porodice bez ikakvih primanja	50 bodova
2. porodice sa primanjima do 15% prosječne netto plaće isplaćene u FBiH u prethodnoj godini po članu.	45 bodova
3. porodice sa primanjima od 15% do 20% prosječne netto plaće isplaćene u FBiH u prethodnoj godini po članu	30 bodova
4. porodice sa primanjima od 20% do 25% prosječne netto plaće isplaćene u FBiH u prethodnoj godini po članu	10 bodova

e) Status stanovanja

1. stanuje u alternativnom smještaju koji je dužan napustiti	40 bodova
2. stanuje kao podstanar	30 bodova
3. stanuje u vlastitoj neuslovnoj stambenoj jedinici	20 bodova
4. stanuje kod roditelja	10 bodova

- Pod primanjima porodičnog domaćinstva podrazumijevaju se ukupna novčana primanja uključujući primanja po osnovu socijalne i boračko-invalidske zaštite.
- Ukupan broj bodova ostvaren po svakoj tački ovog člana međusobno se zbraja.

16.4. Formiranje liste korisnika prava na dodjelu sredstava

Član 141. (formiranje listi)

Liste korisnika za dodjelu sredstava sadrži zbir bodova dobivenih po osnovu općih, posebnih i dopunskih kriterija.

Član 142. (dodjela sredstava na ime nabavke građevinskog materijala)

Prilikom ostvarivanja prava na dodjelu sredstava na ime nabavke građevinskog materijala i formiranja liste korisnika vrši se bodovanje po kriterijima iz čl.138.,139. i 140. ovog Zakona.

Član 143. (dodjela sredstava za izvođenje građevinskih radova i pružanje građevinskih usluga)

Prilikom ostvarivanja prava na dodjelu sredstava u vidu izvođenja građevinskih radova i pružanju građevinskih usluga, pravo na ovaj vid pomoći imaju:

- a) djeca bez oba roditelja, roditelji šehida koji su stari, bolesni i iznemogli, naročito roditelji šehida nosilaca najviših ratnih priznanja;
- b) šehidske porodice koje nemaju mogućnost da same ugrade građevinski materijal;
- c) ratni vojni invalidi sa visokim stepenom invalidnosti (ratni vojni invalidi I, II i III grupe invalidnosti)
- d) teško oboljeli branitelji od oboljenja definisanih u članu 140. stav (1) tačka a) ovog Zakona, koji su korisnici socijalne pomoći ili koji u okviru porodičnog domaćinstva ne ostvaruju nikakva primanja.

Za formiranje liste korisnika za ovaj način dodjele sredstava pored ispunjavanja uvjeta iz stava (1) ovog člana vrši se bodovanje po kriterijima iz čl.138,139. i 140 ovog Zakona.

16.5. Potrebna dokumentacija za odobravanje sredstava na ime nabavke građevinskog materijala i pružanje građevinskih usluga

Član 144.

a) Osnovna dokumentacija koju prilaže podnosilac zahtjeva

1. Dokaz o pripadnosti boračkoj populaciji po odredbama člana 1. i 2. Zakona o dopunskim pravima branilaca i članova njihovih porodica u Kantonu, (uvjerenje odjela Ministarstva odbrane, rješenje o prizatom pravu na ličnu/porodičnu invalidninu);
2. Uvjerenje o državljanstvu ili fotokopija Cipsove lične karte za podnosioca zahtjeva;
3. Rodni list za podnosioca zahtjeva i za sve članove porodičnog domaćinstva;
4. Kućna lista;
5. Uvjerenje o kretanju za podnosioca zahtjeva izdato od Policijske uprave (policijska uprava gdje podnosilac zahtjeva ima prebivalište, odnosno boravište) koje mora obuhvatiti period od 01.01.1991.godine do dana izdavanja uvjerenja;
6. Dokaz o ukupnim primanjima domaćinstva podnosioca zahtjeva i punoljetnih članova porodičnog domaćinstva (potvrda o primanjima od poslodavca, ček od penzije iz radnog odnosa, odnosno primanja po osnovu lične i porodične invalidnine, ličnog i porodičnog materijalnog obezbjeđenja i dr.);
7. Izjava ovjerena od općinske službe za ovjeru da su podnosilac zahtjeva i članovi domaćinstva evidentirani kod Kantonalne Službe za zapošljavanje;
8. Dokaz Kantonalne Službe za zapošljavanje da je podnosilac zahtjeva nezaposlen kao i za nezaposlene članove domaćinstva;
9. Dokaz o uslovima stanovanja podnosioca zahtjeva:
 - a) ako stanuje u alternativnom smještaju koji je dužan napustiti, (rješenje nadležnog organa);
 - b) ako stanuje kao podstanar, (ovjeren ugovor o podstanarskom odnosu);
 - c) ako stanuje u vlastitoj neuslovnoj stambenoj jedinici, (ovjerena izjava);
 - d) ako stanuje kod roditelja, (ovjerena izjava).

10. kada je u pitanju sanacija, rekonstrukcija, adaptacija, preuređenje krovšta i potkrovlja u stambeni prostor, pretvaranje zajedničkih prostorija u stambeni prostor ili dogradnja stambene jedinice:
- Izjava ovjerena od općinske službe za ovjeru da podnosilac zahtjeva kao i njegovi članovi porodičnog domaćinstva nemaju drugu stambenu jedinicu u vlasništvu ili posjedu niti su podnijeli zahtjev za upis vlasništva na bilo kojoj stambenoj jedinici u Kantonu te na ostalim područjima Bosne i Hercegovine izuzev one koja je predmet ostvarivanja ovog prava;
 - izjava podnosioca zahtjeva da nije dobio donaciju od bilo koga i u bilo kojem iznosu, odnosno
 - izjava za ona lica koja su dobila donaciju tačan iznos odobrene donacije te navesti instituciju od koje je dobio donaciju;
11. ukoliko se podnosilac zahtjeva nastanio na teritoriji Kantona u periodu od 04.05.1992.g. – 14.12.1995.g.:
- izjava da nije u statusu raseljenog lica (izjava od strane podnosioca zahtjeva ovjerena od općinske službe za ovjeru), kao i
 - dokaz od općine prebivališta do dolaska u Bosansko-podrinjski kanton Goražde da on i članovi porodičnog domaćinstva nemaju uslovnu stambenu jedinicu u toj općini, (*dokaz iz općine trenutnog prebivališta i dokaz od općine do dolaska u Kanton*)

b) Dodatna dokumentacija koju po potrebi dostavlja podnosilac zahtjeva

- dokaz o dodatnom boračkom statusu jednog ili više članova porodičnog domaćinstva (Federalno ministarstvo za boračka pitanja - općinsko odjeljenje sektora za vojne evidencije gdje se podnosilac vodi u evidenciji);
- ljekarski nalaz o teškoj bolesti podnosioca zahtjeva ili člana porodičnog domaćinstva.

c) Dodatna dokumentacija za sve oblike ostvarivanja ovoga prava koju dostavlja podnosilac zahtjeva pored osnovne dokumentacije

1. Jednokratna bespovratna dodjela sredstava za nabavku građevinskog materijala

- Ukoliko stambena jedinica nije evidentirana u katastru općina, gruntovnici ili knjizi položenih ugovora Suda potrebno je dostaviti građevinsku dozvolu-rješenje o legalizaciji objekta-naknadnu urbanističku saglasnost za legalizaciji objekta.

2. Jednokratna bespovratna dodjela sredstava za izvođenje građevinskih radova i pružanja građevinskih usluga

- Ukoliko stambena jedinica nije evidentirana u katastru općina, gruntovnici ili knjizi položenih ugovora Suda potrebno je dostaviti građevinsku dozvolu-rješenje o legalizaciji objekta-naknadnu urbanističku saglasnost za legalizaciji objekta;
- Ukoliko je podnosilac zahtjeva korisnik stalne socijalne pomoći – Rješenje nadležnog Centra za socijalni rad.

Pravo na ovaj vid pomoći imaju slijedeće boračke kategorije:

- djeca bez oba roditelja, roditelji šehida koji su stari, bolesni i iznemogli, naročito roditelji šehidanosilaca najviših ratnih priznanja;
- šehidske porodice koje nemaju mogućnost da same ugrade građevinski materijal;
- ratni vojni invalidi sa visokim stepenom invalidnosti (ratni vojni invalidi I, II i III grupe invalidnosti);
- teško oboljeli branitelji od oboljenja definisanih u članu 140. stav (1) tačka a) Zakona koji su korisnici socijalne pomoći ili koji u okviru porodičnog domaćinstva neostvaruju nikakva primanja;
- Ostali potrebni dokazi relevantni za odlučivanje o pravu u konkretnom slučaju.

Svi navedeni dokazi moraju biti originali ili propisno ovjerena kopija ne starija od šest mjeseci.

Po ukazanoj potrebi Ministarstvo će službenim putem izvršiti provjere određenih podataka, te ukoliko pri provjerama ustanovi da je podnosilac zahtjeva dao netačne podatke, zahtjev će biti odbijen.

17. PRAVO NA PARTICIPACIJU TROŠKOVA ZA PRIKLJUČAK NA INFRASTRUKTURALNE MREŽE (VODA, ELEKTRIČNA ENERGIJA I KANALIZACIJA)

Član 145.

Pravo na participaciju troškova za priključak na infrastrukturne mreže (voda, kanalizacija, i električna energija) imaju lica iz čl. 2. ovog Zakona, pod uvjetom da stambeno pitanje rješavaju prvi put i da stambeni objekat posjeduje elektroenergetsku saglasnost, odnosno adekvatnu saglasnost drugih javnih preduzeća.

Lica iz čl. 2. ovog Zakona, imaju pravo na participaciju troškova za priključak na vodovodnu i kanalizacionu mrežu, monofazni priključak (dužine vodovodnog kabla 200 metara i do 70 metara kanalizacionih cijevi) na elektro-distributivnu mrežu pod uvjetima iz stava 1. ovog člana.

17.1. Uslovi, način i kriteriji za ostvarivanje prava

Član 146.

Kod priključaka na infrastrukturnu mrežu priznaje se cijena obračunata od strane Javnog preduzeća isključivo za monofazni priključak kod električne energije, te obračunata cijena vodomjera, usluga i taksi (za standardni priključak) kod priključka vode, standardni priključak na kanalizacionu mrežu, dok dodatne troškove (elektro-mreža, vodovodne cijevi preko 200 m i kanalizacione cijevi preko 70 m izvođenje radova i sl.) do mjesta priključenja, obezbjeđuje korisnik ličnim sredstvima.

U ruralnim područjima Kantona i susjednim općinama iz stava 2. člana 1. Zakona **gdje nije instalirana gradska vodovodna mreža** licima iz člana 2. ovog Zakona mogu se odobriti sredstva za rješavanje vodosnadbijevanja iz mjesnih izvorišta u obimu i visini utvrđenoj u predhodnom stavu ovog člana.

Član 147.

Opći kriteriji za ostvarivanje prava na dodjelu sredstava za priključak na infrastrukturnu mrežu je da podnosilac zahtjeva pripada boračkoj populaciji i da prvi put rješava svoje stambeno pitanje.

Član 148.

Posebni kriteriji za ostvarivanje prava za priključak na infrastrukturnu mrežu su:

1. Nezadovoljavajuća stambena situacija i težak socijalni položaj podnosioca zahtjeva;
2. Porodični standard;
3. Veći broj članova porodičnog domaćinstva;
4. Ukupna novčana neto primanja po članu porodičnog domaćinstva, uključujući i primanja po osnovu socijalne i boračko invalidske zaštite, iznose manje od 25% prosječne netto plaće isplaćene u Federaciji BiH u predhodnoj godini;
5. Vanredne okolnosti koje podnosioca zahtjeva dovode u posebno težak položaj.

Član 149.

Visina novčanih sredstava za priključak stambenog objekta na infrastrukturnu mrežu u iznosu:

- a) 100 % od stvarnih troškova za porodice bez redovnih mjesečnih primanja;
- b) 75 % od stvarnih troškova za porodice sa primanjima do 25% prosječne netto plaće isplaćene u Federaciji BiH u predhodnoj godini po članu sa 4 i više članova;
- c) 50 % od stvarnih troškova za porodice sa primanjima do 25% prosječne netto plaće isplaćene u Federaciji BiH u predhodnoj godini po članu do 3 člana porodičnog domaćinstva.

Član 150.

Postupka za ostvarivanje prava iz člana 145. Zakona pokreće se podnošenjem zahtjeva na propisanim obrascima.

Ovim obrascima navedena je potrebna dokumentacija koju je podnosioc zahtjeva dužan priložiti uz isti.

Član 151.

Prvostepeni postupak za utvrđivanje prava na dodjelu sredstava za priključak na infrastrukturnu mrežu (električna energija, voda, kanalizacija), vodi Ministarstvo, u skladu sa odredbama Zakona o upravnom postupku («Službene novine F BiH» broj: 2/98 i 48/99).

Član 152.

U drugostepenom postupku po žalbi rješava Vlada.

Član 153.

Dokumentacija za ostvarivanje prava

na dodjelu sredstava na ime priključka na infrastrukturnu mrežu

1. Zahtjev sa tačnom adresom i brojem kontakt telefona;
2. Dokaz o statusu borca Bosne i Hercegovine iz člana 2. Zakona o dopunskim pravima branilaca i članova njihovih porodica u Bosansko-podrinjskom kantonu Goražde (Uvjerenje o vremenu provedenom u Oružanim snagama);
3. Dokaz da podnosilac zahtjeva po prvi put rješava svoje stambeno pitanje odnosno da isto nema adekvatno rješeno na području Kantona i općinama iz stava 2 člana 1. Zakona o dopunskim pravima branilaca i članova njihovih porodica (uključujući i članove porodičnog domaćinstva):
 - Ugovor o podstanarskom odnosu ovjeren od nadležne institucije ili
 - dokaz da se podnosilac zahtjeva i članovi njegovog porodičnog domaćinstva nalaze u privremenom smještaju ili
 - dokaz da podnosilac zahtjeva i članovi njegovog porodičnog domaćinstva nemaju zadovoljavajuće rješeno stambeno pitanje, odnosno da stambena jedinica u ličnom vlasništvu nije priključena na infrastrukturnu mrežu;
4. Izjavu da podnosilac zahtjeva i njegovi punoljetni članovi porodičnog domaćinstva nemaju rješeno stambeno pitanje na području Bosne i Hercegovine;
5. Kućna lista;
6. Fotokopija Cipsove lične karte podnosioca zahtjeva i prijava mjesta boravka-prebivališta podnosioca zahtjeva i punoljetnih članova domaćinstva;
7. Uvjerenje da se podnosilac zahtjeva i punoljetni članovi njegovog porodičnog domaćinstva nalaze na evidenciji Službe za zapošljavanje (za nezaposlene) ili dokaz o visini primanja (za zaposlene), uključujući primanja-prihode iz radnog odnosa, boračko – invalidske zaštite, penzije, samostalne djelatnosti i drugih osnova;
8. Izjavu da podnosilac zahtjeva, u budžetskoj godini na koju se odnosi podneseni zahtjev, nije koristio jednokratnu bespovratnu pomoć za stambeno rješavanje od Ministarstva kao i donaciju od domaćih nivoa vlasti i međunarodnih humanitarnih organizacija za ove namjene;
9. Posjedovni list za podnosioca i članove porodičnog domaćinstva;
10. Građevinska dozvola ili urbanistička saglasnost za građenje;
11. Predračun–(elektroenergetska saglasnost, predračun za ugradnju vodomjera i sl) za priključak na infrastrukturnu mrežu (priključak električne energije, vode, kanalizacije i sl.) izdat od strane Javnog preduzeća;
12. Ostali potrebni dokazi relevantni za odlučivanje o pravu u svakom konkretnom slučaju.

Svi navedeni dokazi moraju biti originali ili propisno ovjerena kopija ne starija od šest mjeseci.

18. PRAVO NA STAN U VLASNIŠTVO

Član 154.

Pod uvjetom da nemaju riješeno stambeno pitanje, te da prebivalište, odnosno boravište na području Kantona imaju neprekidno od 23.12.1996.godine ratni vojni invalidi I grupe i ratni vojni invalidi koji su radno nesposobni po osnovu rane, povrede ili bolesti zadobijene za vrijeme službe u Oružanim snagama, kao i djeca šehida/poginulog borca-branitelja i umrlog ratnog vojnog invalida, koja su bez oba roditelja, imaju pravo na odgovarajući stan u vlasništvu na području Kantona.

Pod uvjetima iz stava 1. ovog člana pravo na stan u vlasništvu mogu ostvariti i roditelji sa dva i više šehida - poginulih boraca.

Član 155.

Ratni vojni invalidi I grupe i ratni vojni invalidi koji su radno nesposobni po osnovu ranjavanja ili ozljeđivanja za vrijeme službe u Oružanim snagama, kao i djeca šehida-poginulog borca-branitelja i umrlog ratnog invalida, koja su bez oba roditelja, čije je stambeno pitanje riješeno na način koji ne zadovoljava njihove potrebe, ostvaruju pravo iz prethodnog člana pod uvjetom da stan kojim raspolažu stave na raspolaganje Kantonu.

Član 156.

Lica iz člana 154. koja ostvare pravo na stan u vlasništvu na području Kantona u vidu poklona ili naslijeđa imaju pravo na naknadu troškova (poreza) za promet nepokretnosti s ciljem uknjižbe vlasništva.

Član 157.

Vlada Kantona će posebnim propisom utvrditi uslove i način za ostvarivanje prava na stan u vlasništvu.

19. UKLANJANJE ARHITEKTONSKO-URBANISTIČKIH BARIJERA ZA ULAZAK I KRETANJE PO STANU U INVALIDSKIM KOLICIMA

Član 158.

Vojni invalidi I grupe, koji nisu sposobni za kretanje bez invalidskih kolica, imaju pravo na uklanjanje arhitektonsko - urbanističkih barijera za prilaz, ulazak i kretanje u stambenoj zgradi u kojoj stanuju, kao i za kretanje po stanu.

Pravo iz stava 1. ovog člana, vojni invalidi mogu ostvariti samo jednom, i to na stambenoj jedinici sa riješenim svim imovinsko - pravnim odnosima.

Pravo iz prethodnog stava je u isključivoj nadležnosti općina u sastavu Kantona, a obim, način i uslove za ostvarivanje ovih prava utvrđuju općine svojim propisima.

20. PRIORITET U DODJELI SREDSTAVA ZA POVRATAK I ODRŽIVI POVRATAK

Član 159.

Lica iz člana 2. ovoga Zakona, koja su u prognaničkom, odnosno statusu izbjeglog i raseljenog lica na području Kantona, prilikom njihovog povratka u prijeratna mjesta prebivališta, imaju prioritet u obezbjeđenju i dodjeli sredstava za povratak i održiv povratak kod svih kantonalnih i općinskih organa koji imaju uticaj na ostvarivanje ovog prava.

Nadležna Ministarstva u Kantonu kod kojih se ostvaruju prava iz prethodnog stava, kao i općine u sastavu Kantona, posebnim propisom uredit će obim, stepen, uslove i način korištenja ovog prava.

Član 160.

Pravo iz člana 159. ovog Zakona, nemaju lica koja su na području Bosne i Hercegovine riješila svoje stambeno pitanje.

20.1. Uslovi, način i postupak dodjele sredstava

Član 161.

Lica iz člana 2. ovog Zakona i članovi njihovih porodica, koja imaju ili su imala status raseljenog lica, a pod uslovom da su prebivalište, odnosno boravište na području Kantona imala na dan potpisivanja „Općeg okvirnog sporazuma za mir u Bosni i Hercegovini „ (14.12.1995. godine) imaju pravo na jednokratnu bespovratnu dodjelu sredstava za povratak i održiv povratak u mjesto predratnog prebivališta.

Lica koja su 1992. god. imala prebivalište na teritoriji entiteta Republika Srpska imat će prioritet na jednokratnu dodjelu bespovratnih sredstava za povratak i održivi povratak.

Član 162.

Prava na jednokratnu bespovratnu dodjelu novčanih sredstava za povratak I održivi povratak ostvaruju lica pod uslovom da rješavaju stambene potrebe, pokreću proizvodno- uslužne djelatnosti, poljoprivredne i druge djelatnosti, a sve u cilju obezbjeđivanja uvjeta za povratak i održivi povratak.

Član 163.

Pravo iz člana 159. ovog Zakon nemaju lica koja imaju ili su imala status interno raseljenih lica na području Kantona, a koja su svoje stambeno pitanje trajno riješila na području Kantona.

Član 164.

Korisnici prava po ovom Zakonu mogu biti lica iz člana 2. Zakona, koja su u prognaničkom odnosno statusu izbjeglog i raseljenog lica i pored drugih uvjeta da im je omogućen nesmetan povratak u prijeratno prebivalište te da postoje uslovi za sanaciju postojećeg ili izgradnja novog stambenog objekta.

Član 165.

Licima iz člana 2. Zakona koja su u prognaničkom odnosno statusu izbjeglog i raseljenog lica ili su ostvarila povratak u prijeratna prebivališta, mogu se odobriti jednokratna bespovratna novčana sredstva za povratak i održiv povratak na osnovu podnesenog zahtjeva, ako ispunjavaju opće i posebne uslove propisane ovim Zakonom.

Član 166.

Novčana sredstva za povratak i održivi povratak se mogu odobriti najviše u visini do 5.000 KM (slovima: pethiljada KM).

Udruživanjem više lica iz člana 2. ovog Zakona, kroz obavljanje određene djelatnosti iz člana 162. ovog Zakona mogu se odobriti novčana sredstva u zavisnosti od broja lica, a najviše do iznosa koji predstavlja zbir pojedinačnih iznosa sredstava.

Član 167.

Postupak odobravanja novačanih sredstava za povratak i održivi povratak je sljedeći:

1. Zahtjev za odobravanje novčanih sredstava, sa kompletnom propisanom dokumentacijom, podnosi se Ministarstvu po javnom oglašavanju;
2. Komisija za dodjelu sredstava za povratak i održivi povratak imenovana rješenjem Ministra obrađuje sve pristigle zahtjeve i sa svojim mišljenjem o oporavdanosti zahtjeva dostavlja izvještaj sa prijedlogom korisnika za korištenje bespovratnih novčanih sredstava za povratak i održiv povratak Ministru ;
3. Ministar na prijedlog Komisije donosi konačnu Odluku o dodjeli sredstava, a Vlada na osnovu konačne Odluke Ministra donosi Odluku o odobravanju novčanih sredstava korisnicima sredstava za povratak i održivi povratak;
4. Nakon donošenja Odluke Ministarstvo zaključuje pojedinačne ugovore o dodjeli sredstava za povratak i održiv povratak sa licima kojima su odobrena novčana sredstva;
5. Novčana sredstva za povratak i održiv povratak korisnik je dužan u cjelosti realizirati u roku od 90 dana nakon izvršene doznake novčanih sredstava a u skladu sa sklopljenim pojedinačnim ugovorom o dodjeli sredstava za povratak i održiv povratak;
6. Kontrolu realizacije ugovora o dodjeli sredstava za povratak i održivi povratak izvršava Ministarstvo, a po nalazu Komisije za utvrđivanje konkretne implementacije utrošenih sredstava na terenu.

Član 168.

Izuzetno, licima iz člana 2. ovog Zakona, koji iz opravdanih razloga (elementarne nepogode, vanredne okolnosti i sl.) ne mogu čekati Javna oglašavanja za programe ili projekte koje implementiraju drugi federalni ili kantonalni organi uprave nedležni za pitanja povratka, mogu se dodijeliti sredstva odmah nakon uvida u činjenično stanje na terenu, te na osnovu ocjene opravdanosti zahtjeva, o čemu će komisija sačiniti službenu zabilješku.

Odluku o dodjeli sredstava iz prethodnog stava donosi Vlada na prijedlog Ministra.

Član 169.

Novčana sredstva za povratak i održivi povratak se koriste za namjene iz člana 159. ovog Zakona, a mogu se odobriti za sanaciju ili izgradnju stambenih objekata, nabavku osnovnih sredstava za obavljanje djelatnosti, građevinskog materijala, nabavku poljoprivrednih mašina ili alata, nabavku stoke i izvršenje određenih građevinskih usluga ili usluga popravke mašina.

Član 170.

U slučaju nenamjenske realizacije dobijenih novčanih sredstava za povratak i održivi povratak, na prijedlog Komisije korisnik sredstava će biti u obavezi da u cjelosti izmiri sva sredstva u skladu sa ugovorom o dodjeli sredstava za povratak i održivi povratak.

Član 171.

Uz zahtjev za odobravanje novčanih sredstava za povratak i održivi povratak prilažu se, u zavisnosti od namjene, sljedeći dokazi:

- uvjerenje odnosno potvrda o statusu borca – branitelja Bosne i Hercegovine;
- rješenje o utvrđenom statusu raseljenog lica;
- dokaz o neposjedovanju nekretnina ili stana na području Kantona;
- biznis plan (projekat) o obavljanju djelatnosti;
- kopija lične karte (uvjerenje o prebivalištu Cips) izdate od općine u koju se lice vratilo;
- predračun (ponuda) o traženim materijalnim sredstvima.

Član 172.

Sredstva za finansiranje prava utvrđenih ovim Zakonom za svaku godinu obezbjeđuju se iz budžeta Ministarstva.

20. PARTICIPACIJA TROŠKOVA NAKNADE ZA DODIJELJENO GRAĐEVINSKO ZEMLJIŠTE NA KORIŠTENJE I NAKNADE ZA UREĐENJE GRADSKOG GRAĐEVINSKOG ZEMLJIŠTA

Član 173.

Lica iz člana 2. ovog Zakona, koja prvi put rješavaju svoje stambeno pitanje, pod uslovom da su izvršili pribavljanje građevinskog zemljišta i odobrenja za građenje, imaju pravo na participaciju troškova u minimalnom iznosu od 50 % za:

1. Naknadu namjenjenu za preuzeto ili kupljeno zemljište površine do 400 m²,
2. Naknadu iz osnova prirodnih pogodnosti gradskog građevinskog zemljišta i pogodnosti već izgrađene komunalne infrastrukture koje mogu nastati prilikom korištenja tog zemljišta, a koje nisu rezultat ulaganja sredstava vlasnika ili korisnika nekretnina – rente, netto građevinske površine do 100 m²,
3. Naknade za uređenje gradskog građevinsko zemljišta za izgradnju porodične stambene zgrade za vlastite potrebe netto građevinske površine do 100 m².

Lica koja grade objekat na vlastitom zemljištu, imaju pravo na participaciju troškova za naknade iz tačaka 2. i 3. prethodnog stava.

Lica iz člana 2. ovog Zakona koja posjeduju vlastito građevinsko zemljište na području Bosne i Hercegovine nemaju pravo na naknadu troškova za kupljeno zemljište iz tačke 1. stava 1. ovog člana.

Odredbe iz stava 1. ovog člana odnose se i na razliku između postojeće stambene površine i dogradnje, nadziđivanja, preuređenja krovišta i potkrovlja, pretvaranja zajedničkih prostorija i rekonstrukcije, do netto stambenog prostora 100 m².

Naknada troškova za kupljeno građevinsko zemljište površine do 400 m² odobrava se u skladu sa raspoloživim sredstvima u budžetu do visine pet prosječnih netto plaća isplaćenih u Federaciji BiH u predhodnoj godini.

Član 174.

Lica iz člana 2. ovog Zakona, kada rješavaju pitanje svoga zaposlenja, imaju pravo na participaciju troškova naknada iz tačaka 2. i 3. prethodnog člana za izgradnju poslovnog prostora neto površine do 100 m², u minimalnom iznosu od 50 %.

21.1. Uslovi, način, postupak i kriteriji za ostvarivanje prava

Član 175.

Pravo na odobravanje novčanih sredstava na ime participacije troškova naknade za dodijeljeno građevinsko zemljište i naknade na korištenje gradskog građevinskog zemljišta imaju lica iz člana 2. ovog Zakona koja prvi put rješavaju svoje stambeno pitanje na području Kantona pod uslovom da su na dan potpisivanja „Općeg okvirnog sporazuma za mir u BiH „ (14.12.1995. godine) imali prebivalište na području Kantona.

Član 176.

Maksimalan iznos sredstava odobrenih za participaciju troškova naknade za dodijeljeno građevinsko zemljište i naknade na korištenje gradskog građevinskog zemljišta u toku jedne budžetske godine ne može biti veći od iznosa sredstava planiranih za te namjene u Budžetu Ministarstva.

Član 177.

Kao mjerodavna cijena kvadratnog metra građevinskog zemljišta, uzima se ona cijena koju utvrdi općinski organ prema gradskim zonama.

Član 178.

Za ostvarivanje prava na participaciju troškova naknade za dodijeljeno građevinsko zemljište na korištenje i naknade za uređenje gradskog građevinskog zemljišta podnosilac zahtjeva mora ispunjavati uslove prema mjerilima i kriterijima kako slijedi:

1. Učešće u oružanim snagama;
2. Stambena situacija;
3. Matrijalno-porodične prilike.

Član 179.

Prilikom odobravanja visine sredstava u obzir se uzimaju materijalne prilike i mjesečna primanja podnosioca zahtjeva i punoljetnih članova porodičnog domaćinstva, i to:

- a) Ako je visina mjesečnih primanja iz prethodnog stava do visine jedne prosječne netto plaće u Federaciji BiH, podnosilac zahtjeva oslobađa se troškova participacije koja pada na teret Ministarstva u iznosu 100%;
- b) Ako je visina mjesečnih primanja od jedne do dvije prosječne neto plaće u Federaciji BiH, podnosilac zahtjeva učestvuje ličnim sredstvima sa 25% ukupnih troškova dok preostale troškove snosi Ministarstvo u iznosu 75%;
- c) Ako je visina mjesečnih primanja preko visine dvije prosječne neto plaće u Federaciji BiH, podnosilac zahtjeva učestvuje ličnim sredstvima sa 50% ukupnih troškova dok preostale troškove snosi Ministarstvo u iznosu 50%.

Član 180.

Postupak priznavanja ovih prava, na osnovu zahtjeva korisnika, vrši prvostepeni organ.

Član 181.

Radi priznavanja ovog prava, prvostepeni organi će obezbjediti slijedeće dokaze:

- Zahtjev, koji treba biti uredno protokolisan u skladu sa propisima o kancelarijskom poslovanju, potpun u smislu navoda šta se traži i po kom osnovu;
- Uvjerenje o statusu borca;
- Kućna lista.
- Dokaz da podnosilac zahtjeva po prvi put rješava svoje stambeno pitanje odnosno da isto nema riješeno na području Kantona i općinama iz stava 2 člana 1. ovog Zakona (uključujući i članove porodičnog domaćinstva);
- Rješenje o dodjeli građevinskog zemljišta, o dozvoli za građenje ili rješenje o urbanističkoj saglasnosti i visini rente;
- Kupoprodajni ugovor (original ili ovjerena kopija);
- Uvjerenje o mjestu prebivališta;

- Uvjerenje o kretanju podnosioca zahtjeva;
- Dokaz o ukupnim mjesečnim novčanim primanjima podnosioca zahtjeva i punoljetnih članova porodičnog domaćinstva;
- Ostali potrebni dokazi relevantni za odlučivanje o pravu u svakom konkretnom slučaju.

Član 182.

U Rješenju o priznatom pravu naknade troškova za dodijeljeno gradsko građevinsko zemljište, odnosno rentu, obavezno treba da stoji : "Iznos troškova koje snosi Ministarstvo, kao i iznos troškova koje snosi podnosilac zahtjeva".

Član 183.

Rukovodilac nadležnog prvostepenog organa na osnovu zahtjeva i priložene dokumentacije u skladu sa odredbama Zakona o upravnom postupku, donosi pojedinačna rješenja o priznavanju prava na participaciju troškova.

Član 184.

Po okončanju prvostepenog postupka, rukovodilac prvostepenog organa dostavlja cjelovit izvještaj o priznavanju prava i postupku dodjele sredstava, Ministarstvu.

Član 185.

U drugom stepenu postupak po žalbi o priznavanju prava na participaciju troškova rješava Ministarstvo.

22. BESPLATNA I POVLAŠTENA VOŽNJA

Član 186.

Lica iz člana 2. ovog Zakona, imaju pravo na besplatnu vožnju do banjškog i klimatskog liječilišta, kada su upućena na liječenje od strane Ministarstva.

U slučaju kada nije organiziran poseban prijevoz do banjškog i klimatskog liječilišta, licima koja su upućena na banjško-klimatsko liječenje će se nadoknaditi troškovi prijevoza u redovnom autobuskom saobraćaju.

Član 187.

Ratni vojni invalidi i jedan član iz porodičnog domaćinstva porodice šehida/poginulih boraca (bračni drug šehida/poginulog branioca, imaju pravo na povlaštenu vožnju u javnom gradskom saobraćaju na području Kantona i međugradskom saobraćaju u općine iz člana 1. stav 2. ovog Zakona.

Pravo na povlaštenu vožnju u javnom gradskom saobraćaju može ostvariti i jedan od roditelja šehida/poginulog branioca ukoliko ne žive u zajedničkom domaćinstvu sa porodicom šehida/poginulog borca iz stava 1. ovog člana.

Izuzetno od odredbi prethodnog stava, djeca bez oba roditelja koja su redovni studenti imaju pravo na besplatnu povlaštenu vožnju do mjesta studiranja, ukoliko studiraju na području BiH.

Pored ratnog vojnog invalida, koji je korisnik prava na dodatak za njegu i pomoć od strane drugog lica, pravo na besplatnu vožnju ima i lice koje mu tu njegu i pomoć pruža.

22.1. Uslovi, način i postupak ostvarivanja prava na povlaštenu vožnju

Član 188.

Prevoz korisnika u gradskom i prigradskom saobraćaju prema ovom Zakonu može vršiti samo prevoznik odabran od strane Ministarstva, u skladu sa važećim zakonskim propisima.

Sa odabranim prevoznikom Ministarstvo će zaključiti poseban ugovor kojim će se regulisati međusobne obaveze i način obavljanja usluga prevoza.

Član 189.

Pravo na povlašten prevoz korisnika u gradskom i prigradskom saobraćaju će se rješavati u skladu sa ovim Zakonom i pozitivnim zakonskim propisima.

Pravo iz prethodnog stava mogu ostvariti samo korisnici kojima je mjesto prebivališta odnosno boravišta udaljeno više od tri kilometra od centra grada Goražda.

Član 190.

Pravo na povlašten prevoz u gradskom i prigradskom saobraćaju stečena po ovom Zakonu ne može se prenijeti na drugo lice.

Izuzetno, nosilac prava kod porodice šehida – poginulog borca, može svoje pravo prenijeti na člana porodice poginulog borca - šehida, koji je korisnik prava na porodičnu invalidninu, na osnovu konačnog rješenja nadležnog organa, izdatog u skladu sa važećim federalnim propisima iz oblasti boračko – invalidske zaštite.

Član 191.

Pravo na povlašten prevoz u gradskom i prigradskom saobraćaju po ovom Zakonu mogu ostvariti samo ako ovo pravo ne mogu ostvariti po nekom drugom osnovu.

Član 192.

Korisnicima koji ispunjavaju uvjete propisane ovim Zakonom, pravo na povlašten prevoz u gradskom i prigradskom saobraćaju pripada od prvog dana narednog mjeseca od dana podnošenja zahtjeva i važi do isteka roka ugovora zaključenog između Ministarstva i odabranog pružaoca usluga prevoza, kada je potrebno postupak obnoviti.

Član 193.

Korisnik prava, dužan je u roku od 15 dana od dana nastale promjene prijaviti svaku promjenu koja utiče na korištenje, obim i prestanak ovog prava.

Prvostepeni organi nadležni za boračko-invalidsku zaštitu će po službenoj dužnosti, na osnovu prijave korisnika prava ili saznanja na drugi način o nastaloj promjeni iz prethodnog stava ovog člana, pokrenuti postupak odmah, a najkasnije u roku od 15 dana od dana prijema zahtjeva, odnosno saznanja i donijeti rješenje o prestanku ili izmjeni priznatog prava na povlašten prevoz u gradskom i prigradskom saobraćaju, sa pravnim djelovanjem od prvog dana narednog mjeseca po nastaloj promjeni.

Član 194.

Prvostepeni organ, prema mjestu prebivališta podnosioca zahtjeva, rješava u prvom stepenu o pravu na povlašten prevoz u gradskom i prigradskom saobraćaju i o pravu na refundaciju sredstava na ime troškova prevoza lica iz člana 186. ovog Zakona, ukoliko nije drugačije regulirano drugim propisom.

Rješenje iz predhodnog stava, prvostepeni organ dužan je donijeti u roku od 30 (trideset) dana od dana podnošenja zahtjeva.

Član 195.

Prvostepeni organ vodi kompletnu evidenciju o korisnicima kojima je priznato pravo na povlašten prevoz u gradskom i prigradskom saobraćaju i dostavlja Ministarstvu mjesečne zbirne izvještaje o broju korisnika kojima je priznato ovo pravo.

Član 196.

Prvostepeni organ dostavlja odabranom prevozniku spisak korisnika kojima je priznato pravo na povlašten prevoz u gradskom i prigradskom saobraćaju i zahtjev za izdavanje iskaznica za prevoz.

Član 197.

Nadzor nad rješenjima donesenim u prvom stepenu i postupak po žalbi provodi Ministarstvo.

Član 198.

Djeca bez oba roditelja koja su redovni studenti imaju pravo na besplatnu vožnju do mjesta studiranja na području Bosne i Hercegovine.

Korisnici prava iz prethodnog stava ovog člana mogu u toku jednog mjeseca koristiti četiri odlaska do mjesta studiranja odnosno četiri povratka od mjesta studiranja do Goražda, sa pružaocem usluga prevoza po vlastitoj želji uz obavezno preuzimanje povratne karte sa tačno navedenim datumom i relacijom putovanja.

Član 199.

Obavezna dokumenta koja se podnose za ostvarivanje prava na povlašteni prevoz u gradskom i prigradskom saobraćaju su:

1. Zahtjev sa tačnom adresom, JMBG i brojem kontakt telefona;
2. Uvjerenje o boračkom statusu (ratni vojni invalid, porodica šehida i poginulog borca);
3. Kopija lične karte;
4. Potvrda o mjestu prebivališta;
5. Dokaz da se podnosilac zahtjeva ne nalazi u radnom odnosu;
6. Izjava da ovo pravo ne ostvaruje po nekom drugom osnovu;
7. Dokaz o uplati participacije za godinu dana.

Izuzetno, dokaz iz tačke 5. prethodnog stava, neće se uzeti kao isključiv ukoliko je korisnik zaposlen, a mjesto prebivališta i radno mjesto korisnika su udaljeni najmanje 3 km od centra grada Goražda.

Potrebna dokumentacija za refundaciju sredstava na ime troškova prevoza djece bez oba roditelja koji su redovni studenti:

1. Zahtjev sa tačnom adresom i brojem žiro-računa;
2. Uvjerenje obrazovne ustanove o redovnom studiranju (podnosi se jednom u toku akademske godine uz prvi zahtjev);
3. Original povratna karta/e sa tačno navedenom relacijom i datumom putovanja.

Član 200.

Za korištenje usluga prevoza u gradskom i prigradskom saobraćaju odabrani prevoznik izdaje iskaznicu korisnicima koja važi od dana sticanja prava do isteka roka ugovora zaključenog između Ministarstva i odabranog pružaoca usluga prevoza.

Iskaznica iz prethodnog stava se može izdati samo lično korisniku sa spiska iz člana 196. ovog Zakona, uz pokaz dokumentacije koja dokazuje njegov identitet.

Član 201.

Od prihvaćene cijene godišnje iskaznice, ugovorene sa pružaocem usluga prevoza, korisnik participira sa 10%.

Korisnik uplaćuje participaciju direktno na račun pružaoca usluga i to unaprijed za godinu dana, odnosno za onoliki broj mjeseci koji je ostao do isteka ugovora zaključenog sa pružaocem usluga.

Izuzetno od prethodnog stava, djeca bez oba roditelja oslobađaju se participacije.

Član 202.

Pored ratnog vojnog invalida, koji je korisnik prava na dodatak za njegu i pomoć od strane drugog lica, pravo na povlaštenu vožnju ima i lice koje mu tu njegu i pomoć pruža.

Član 203.

U skladu sa odredbama iz prethodnog člana, odabrani prevoznik će fakturisati usluge prevoza Ministarstvu, uz tabelarni prikaz koji sadrži: spisak sa potpisima korisnika kojima su izdate iskaznice, borački status, procenat učešća Ministarstva, mjesto prebivališta i obračun visine troškova koji idu na teret Ministarstva.

Član 203.a)

Licima iz člana 187. ovog Zakona pod uslovom i na način po postupku definisanim ovim Zakonom mogu se odobriti novčana sredstva na ime povlaštene vožnje u mjesečnom iznosu

30% cijene koštanja mjesečne karte na relaciji od mjesta prebivališta podnosioca zahtjeva do sjedišta Bosansko-podrinjskog kantona Goražde.

Licima koja ispunjavaju uslove na povlašteni prevoz propisane Zakonom pravo iz predhodnog stava ovog člana pripada od prvog dana narednog mjeseca od dana podnošenja zahtjeva i važi do kraja kalendarske godine.

Odluku o dodjeli sredstava za realizaciju prava na povlaštenu vožnju na način definisan ovim članom donosi Ministar za boračka pitanja.

23. PARTICIPACIJA TROŠKOVA DŽENAZE-SAHRANE

Član 204.

U slučaju smrti demobilisanog branioca, ratnog vojnog invalida, člana porodice šehida – poginulog borca, članovi porodice, odnosno lice koje je snosilo troškove sahrane-dženaze, ukoliko to pravo ne mogu ostvariti prema drugom osnovu, imaju pravo na participaciju troškova dženaze-sahrane u visini prosječne jedne mjesečne netto plaće isplaćene u Federaciji BiH u prethodnoj godini prema podacima Zavoda za statistiku Federacije BiH.

23.1. Uslovi i način ostvarivanja prava na participaciju troškova dženaze-sahrane

Član 205.

Pod uslovom da je umrli imao prebivalište- boravište na dan smrti na području Kantona i/ili općinama iz stava 2 člana 1. ovog Zakona, opći kriteriji za ostvarivanje ovog prava je da je umrli pripadao kategoriji boračke populacije i to:

- demobilisani borac (uvjerenje nadležnog organa o pripadnosti Oružanim snagama u periodu 18.09.1991. do 22.04.1996. godine, najmanje dvije godine);
- ratni vojni invalid (rješenje nadležnog općinskog organa);
- član porodice šehida, poginulih i nestalih boraca i umrlih ratnih vojnih invalida (rješenje nadležnog općinskog organa);
- dobitnik ratnog priznanja i odlikovanja (uvjerenje ili kopija priznanja).

Član 206.

Pravo na participaciju troškova dženaze-sahrane članovi porodice, odnosno lice koje je snosilo troškove dženaze-sahrane ostvaruju podnošenjem zahtjeva prvostepenom organu sa potrebnim dokazima o ispunjavanju uslova za ostvarivanje ovog prava u roku od šest mjeseci (180 dana) od dana smrti lica iz člana 2. ovog Zakona.

Član 207.

Pravo na participaciju troškova dženaze-sahrane utvrđuje se rješenjem prvostepenog organa, a novčana sredstva isplaćuju se iz budžeta Ministarstva.

Član 208.

Obavezne isprave i dokumente koje dostavljaju podnosioci zahtjeva za ostvarivanje prava na participaciju troškova dženaze-sahrane su:

1. Zahtjev sa tačnom adresom, brojem kontakt telefona i brojem žiro-računa;
2. Dokaz za umrlog o boračkom statusu;
3. Izvod iz matične knjige umrlih;
4. Kućna lista;
5. Fotokopija Cipsove lične karte podnosioca zahtjeva i prijava mjesta boravka podnosioca zahtjeva i umrlog lica;
6. Dokaz da pomoć u slučaju smrti članovi uže porodice nisu ostvarili po drugom osnovu (potvrda poslodavca ako je umrli bio u radnom odnosu, potvrda od Službe za socijalnu zaštitu nadležne općine ako je umrli bio korisnik prava po tom osnovu, kao i drugi dokazi koji bi mogli uticati za ostvarivanje prava po ocjeni prvostepenog organa);
7. Dokaz o izvršenim uplatama kod nadležnih organa troškova dženaze-sahrane (specifikacija troškova sa računima).

Član 209.

Po okončanju prvostepenog postupka, Rukovodilac prvostepenog organa dostavlja cjelovit izvještaj sa rješenjima o priznatom prava na dalju realizaciju Ministarstvu.

24. JEDNOKRATNA POMOĆ

Član 210.

Pravo na dodjelu jednokratne novčane pomoći mogu ostvariti lica iz člana 2. ovog Zakona na slijedeći način:

1. Dodjelom novčanih sredstava za rješavanje socijalnih potreba;
2. Dodjelom prehrambenog bona u iznosu do 10% prosječne netto plaće isplaćene u Federaciji BiH u predhodnoj godini;
3. Dodjelom novčanih sredstava za obezbjeđenje ogrijeva

Član 211.

Ministarstvo je dužno svake godine objaviti Javni poziv za ostvarivanje ovog prava kao i Javni poziv za odabir dobavljača roba za dodjelu prehrambenog bona.

Član 212.

Lica koja imaju pravo na ostvarivanje prava na dodjelu jednokratne novčane pomoći podnose zahtjev za ostvarivanje ovog prava na propisanim obrascima (OBRAZAC 1, 2 i 3).

Član 213.

Podneseni zahtjev važi samo za budžetsku godinu u kojoj je zahtjev podniet. Svake budžetske godine utvrđuje se visina novčanih sredstava za ove namjene.

Član 214.

Pružanje jednokratne novčane pomoći za lica iz člana 2. ovog Zakona vršiće se izuzetno samo u socijalno-ekonomskim opravdanim slučajevima, odnosno licima koja se nalaze u teškim socijalno-ekonomskim uslovima, a koji zadovoljavaju opće i posebne uslove utvrđene kriterijima, ukoliko ima odobrenim finansijskih sredstava za ovu namjenu.

Član 215.

Razmatrnje zahtjeva, provjera njihove formalne ispravnosti i davanje prijedloga za uvrštenje na jedinstvenu Odluku (zbirno rješenje) o dodjeli sredstava u skladu sa kriterijima iz ovog Zakona vrši Komisija imenovana od strane Ministra.

U Komisiju iz predhodnog stava ovog člana imenuje se jedan predstavnik Ministarstva koji je predsjednik Komisije i dva člana iz reda udruženja boračkih populacija».

Komisija se formira na vremenski period od dvije godine, a po isteku tog perioda Komisija prestaje sa obavljanjem zadatka za koje je imenovana, s tim da se može ponovno imenovati za još jedan period utvrđen ovim članom.

Član 215.a)

Komisija iz predhodnog člana obavezno se sastaje jednaput mjesečno, a po ukazanoj potrebi i dva puta pri čemu vrši razmatranje zahtjeva i sačinjava prijedlog Odluke o dodjeli sredstava koju upućuje uz izvještaj na dalji postupak Ministru.

Radi utvrđivanja vjerodostojnosti pojedinih činjenica i dokaza Komisija može vršiti uvid na licu mjesta ili na drugi način ispitati tačnost navoda u priloženoj dokumentaciji. Odluku o dodjeli sredstava donosi Ministar.

Član 215.b)

U cilju bržeg rješavanja i efikasnosti postupka u slučaju većeg broja zahtjeva koji se zasnivaju na istom ili sličnom činjeničnom stanju i na istom pravnom osnovu Komisija iz člana 215. obavezna je predložiti zbirno rješenje za podnosiocje zahtjeva koji ispunjavaju uslove za ostvarivanje prava u skladu sa Zakonom.

Za podnosiocje zahtjeva čiji je zahtjev odbijen zbog neispunjavanja nekog od propisanih uslova u skladu sa Zakonom o upravnom postupku se donose pojedinačna rješenja

24.1. Uslovi, kriteriji i način za ostvarivanje prava na jednokratnu pomoć za socijalne potrebe

Član 216.

Pod uslovom da su imali prebivalište-boravište na području Kantona na dan 14.12.1995.godine, opći kriterij za ostvarivanje jednokratne novčane pomoći za socijalne potrebe jeste da podnosioci zahtjeva pripadaju jednoj od kategorija boračkih populacija, i to:

- demobilisani branilac (uvjerenje nadležnog organa o pripadnosti Oružanim snagama u periodu 18.09.1991. do 23.12.1995.god, najmanje jednu godinu dana);
- ratni vojni invalid (rješenje nadležnog općinskog organa);
- član porodice šehida i poginulih i nestalih boraca i umrlih ratnih vojnih invalida (rješenje nadležnog općinskog organa).

Član 217.

Posebni uslovi za ostvarivanje prava na jednokratnu novčanu pomoć za zadovoljenje socijalnih potreba su:

1. Ukupna novčana neto primanja, uključujući i primanja po osnovu socijalne i boračko invalidske zaštite, iznose manje od 15% prosječne neto plaće isplaćene u Federaciji BiH u predhodnoj godini po članu domaćinstva;
2. Da podnosilac zahtjeva i članovi njegovog porodičnog domaćinstva nisu u radnom odnosu ili da nemaju riješen radno-pravni status (preduzeća u stečaju i likvidaciji, preduzeća čiji su žiro računi blokirani, sudski sporovi iz domena radnih odnosa i sl.);
3. Da podnosilac zahtjeva i članovi njegovog porodičnog domaćinstva nisu korisnici domaće penzije po propisima PIO/MIO ili inostrane penzije.
4. Da podnosilac zahtjeva i članovi njegovog porodičnog domaćinstva u mjestu prebivališta-boravišta ne posjeduje više od 10.000 m² obradivog poljoprivrednog zemljišta;
5. Da podnosilac zahtjeva ili član njegovog porodičnog domaćinstva se ne bave samostalnom djelatnošću;
6. Da podnosilac zahtjeva ili član njegovog porodičnog domaćinstva ne posjeduje motorno vozilo (automobil) mlađi od 15 godina, poljoprivrednu ili drugu mehanizaciju koja omogućava ostvarivanje dobiti”.

Izuzetno, licima iz člana 214. ovog Zakona koja dokažu da su u veoma teškoj materijalno-socijalnoj situaciji, a ne ispunjavaju neki od propisanih uslova iz predhodnog stava ovog člana ukoliko ima raspoloživih sredstava Ministar može u toku kalendarske godine jedanput odobriti jednokratnu novčanu pomoć za socijalne potrebe u visini utvrđenoj u članu 219. ovog Zakona.

Član 218.

Obavezne isprave-dokumenta koja dostavljaju podnosioci zahtjeva za dodjelu jednokratne novčane pomoći za zadovoljenje socijalnih potreba su:

1. Zahtjev sa tačnom adresom, brojem kontakt telefona i brojem žiro-računa;
2. Dokaz o statusu branioca iz člana 2. Zakona o dopunskim pravima boraca i članova njihovih porodica u Bosansko-podrinjskom kantonu Goražde;
3. Fotokopija lične karte podnosioca zahtjeva;
4. Dokaz o mjestu prebivališta podnosioca zahtjeva i svih punoljetnih članova porodičnog domaćinstva (Uvjerenje Cips);
5. Kućna lista;
6. Uvjerenje da se podnosilac zahtjeva i punoljetni članovi njegovog porodičnog domaćinstva nalaze na evidenciji Službe za zapošljavanje (za nezaposlene) ili dokaz o visini primanja (po osnovu boračko-invalidske zaštite, socijalne zaštite i drugih osnova), ili dokaz o redovnom školovanju;
7. Dokaz da podnosilac zahtjeva u mjestu prebivališta-boravišta ne posjeduje više od 10 000 m² obradivog poljoprivrednog zemljišta (posjedovni list);
8. Da podnosilac zahtjeva ili član njegovog porodičnog domaćinstva ne posjeduje motorno vozilo (automobil), poljoprivrednu ili drugu mehanizaciju koja omogućava ostvarivanje dobiti.

Član 219.

Kriteriji za utvrđivanje visine sredstava koja se dodjeljuju na ime pomoći za zadovoljenje socijalnih potreba su:

- | | |
|-----------------------------|--|
| - porodica do 2 člana | 20% prosječne netto plaće isplaćene u F BiH u predhodnoj godini; |
| - porodica sa 3 člana | 25% prosječne netto plaće isplaćene u F BiH u predhodnoj godini; |
| - porodica sa 4 člana | 30% prosječne netto plaće isplaćene u F BiH u predhodnoj godini; |
| - porodica sa 5 članova | 40% prosječne netto plaće isplaćene u F BiH u predhodnoj godini; |
| - porodica sa više od 5 čl. | 45% prosječne netto plaće isplaćene u F BiH u predhodnoj godini. |

Član 220.

Podnosiocu zahtjeva može se odobriti jednokratna pomoć za socijalne potrebe samo jednom u toku jedne budžetske godine, a izuzetno, prema procjeni stanja, u socijalno opravdanim slučajevima, dva puta u toku jedne budžetske godine.

24.2. Uslovi, način i kriteriji za ostvarivanje prava na dodjelu prehrambenog bona

Član 221.

Prehrambeni bon će se dodjeljivati licima iz člana 2. ovog Zakona koji su bez ikakvih prihoda, odnosno koji se nalaze u stanju socijalne potrebe, a koji imaju prebivalište/boravište na području Kantona.

Član 222.

Obavezne isprave-dokumenta koja dostavljaju svi podnosioci zahtjeva za dodjelu prehrambenog bona:

- Zahtjev sa tačnom adresom, jedinstvenim matičnim brojem građana i brojem kontakt telefona na jedinstvenom obrascu;
- Dokaz o statusu borca-branitelja Bosne i Hercegovine iz člana 2. Zakona (uvjerenje o vremenu provedenom u Oružanim snagama u toku agresije, rješenje o ratnom vojnom invalidu, dokaz o statusu člana porodice ratnog vojnog invalida, dokaz o statusu člana porodice šehida-poginulog borca);
- Fotokopija lične karte ili prijave mjesta boravka-prebivališta;
- Uvjerenje Zavoda za zapošljavanje ukoliko je podnosilac zahtjeva nezaposlen
- Uvjerenje Zavoda za zapošljavanje za nezaposlene članove domaćinstva;
- Kućnu listu;
- Dokaze o ukupnim mjesečnim prihodima-primanjima podnosioca zahtjeva i članova njegovog porodičnog domaćinstva po osnovu: radnog odnosa, boračko-invalidske zaštite, penzije, samostalne djelatnosti i drugih osnova.
- Dokaz da podnosilac zahtjeva u mjestu prebivališta-boravišta ne posjeduje više od 5.000 m² obradivog poljoprivrednog zemljišta (posjedovni list);
- Da podnosilac zahtjeva ili član njegovog porodičnog domaćinstva ne posjeduje motorno vozilo (automobil), poljoprivrednu ili drugu mehanizaciju koja omogućava ostvarivanje dobiti.

Član 223.

Podnosiocu zahtjeva može se odobriti prehrambeni bon jednom godišnje na prijedlog Komisije.

Na prijedlog udruženja boračkih populacija koje se sufinansiraju iz Budžeta Ministarstva, podnosiocu zahtjeva u skladu sa utvrđenim kriterijima iz ovog Zakona prehrambeni bon (paket), a prema procjeni stanja u socijalno opravdanim slučajevima može se odobriti dva i više puta godišnje do iznosa raspoloživih sredstava u Budžetu.

24.3. Uslovi, način i kriteriji za ostvarivanje prava na dodjelu sredst. za nabavku ogrijeva

Član 224.

Novčana sredstva za nabavku ogrijeva će se dodjeljivati licima iz člana 2. ovog Zakona koji su bez ikakvih prihoda, odnosno koji se nalaze u stanju socijalne potrebe, a koji imaju prebivalište/boravište na području Kantona.

Član 225

Podnosiocu zahtjeva mogu se odobriti novčana sredstva za nabavku ogrijeva u iznosu od 25% prosječne netto plaće isplaćene u Federaciji BiH u predhodnoj godini jednom godišnje.

Član 226.

Obavezne isprave-dokumenta koja dostavljaju svi podnosioci zahtjeva za nabavku ogrijeva

- Zahtjev sa tačnom adresom, jedinstvenim matičnim brojem građana i brojem kontakt telefona na jedinstvenom obrascu;
- Dokaz o statusu borca-branitelja Bosne i Hercegovine iz člana 2. Zakona o dopunskim pravima branilaca i članova njihovih porodica (uvjerenje o vremenu provedenom u Oružanim snagama u toku agresije, rješenje o ratnom vojnom invalidu, dokaz o statusu člana porodice ratnog vojnog invalida, dokaz o statusu člana porodice šehida-poginulog borca);
- Fotokopija lične karte ili prijave mjesta boravka-prebivališta;
- Uvjerenje Zavoda za zapošljavanje ukoliko je podnosilac zahtjeva nezaposlen
- Uvjerenje Zavoda za zapošljavanje za nezaposlene članove domaćinstva;
- Kućnu listu;
- Dokaze o ukupnim mjesečnim prihodima-primanjima podnosioca zahtjeva i članova njegovog porodičnog domaćinstva po osnovu: radnog odnosa, boračko-invalidske zaštite, penzije, samostalne djelatnosti i drugih osnova.
- Dokaz da podnosilac zahtjeva u mjestu prebivališta-boravišta ne posjeduje više od 5. 000 m² obradivog poljoprivrednog zemljišta (posjedovni list);
- Da podnosilac zahtjeva ili član njegovog porodičnog domaćinstva ne posjeduje motorno vozilo (automobil), poljoprivrednu ili drugu mehanizaciju koja omogućava ostvarivanje dobiti.

25. PODIZANJE NIŠANA –NADGROBNIH SPOMENIKA I SPOMEN OBILJEŽJA

Član 227.

Svim pripadnicima Oružanih snaga koji su poginuli ili umrli u toku agresije na Republiku Bosnu i Hercegovinu od 1992. do 1995. godine i ukopani na području Kantona, Kanton će podići nišane-nadgrobnne spomenike, u skladu sa idejnim rješenjem šehidskog nišana, te obezbjediti trajnu zaštitu i održavanje.

Kanton će podići nišane-nadgrobnne spomenike i pripadnicima Oružanih snaga iz predhodnog stava koji su ukopani izvan područja Kantona prema evidenciji odjela Ministarstva odbrane općina u sastavu Kantona, odnosno vojnih jedinica.

Organizatorima otpora, veteranima, dobrovoljcima, ratnim vojnim invalidima i dobitnicima ratnih priznanja i odlikovanja, Kanton podiže nišane – nadgrobnne spomenike nakon njihove smrti u skladu sa usvojenim tipiziranim idejnim rješenjem, o čemu će Ministarstvo donijeti poseban propis.

Članovi porodice šehida/poginulog borca koji svojim sredstvima izvrše podizanje nišana-nadgrobnog spomenika imaju pravo naknade troškova u visini i prema dinamici isplate koje utvrdi Ministarstvo.

Izgradnju ostalih spomen obilježja, Ministarstvo će vršiti u skladu sa raspoloživim sredstvima za svaku budžetsku godinu, a u skladu sa posebnim propisom.

25.1. Uslovi i način za ostvarivanje prava na izgradnju nišana i spomen obilježja

Član 228.

Ministarstvo će za svaku budžetsku godinu objaviti Javni poziv za odabir isporučioaca nišana- nadgrobnih spomenika, u skladu sa pozitivnim zakonskim propisima.

a) Ostvarivanje prava na izgradnju nišana-spomenika

Član 229.

Porodica koja želi ostvariti pravo na izgradnju nišana- nadgrobno spomenika obraća se zahtjevom Ministarstvu, o čemu se u Ministarstvu sačinjava Zapisnik na unificiranom obrascu.

Službenik Ministarstva dužan je izvršiti uvid u službenu evidenciju poginulih pripadnika Oružanih snaga na području Kantona, te ukoliko se poginuli nalazi na evidenciji, izdaje se nalog ovlaštenom dobavljaču za izgradnju nišana – nadgrobno spomenika.

Član 230.

Za poginule pripadnike Oružanih snaga koji se ne nalazi na evidenciji poginulih pripadnika, zatražit će se dodatni dokazi:

- smrti list (smrt nastupila od 18.09.1991. do 23.12.1995.godine);
- uvjerenje o pripadnosti Oružanim snagama.

Član 231.

Članovi porodice šehida-poginulog borca koji svojim sredstvima izvrše podizanje nišana-nadgrobno spomenika (tipiziranog šehidskog ili drugog tipa u skladu sa svojim uvjerenjima) imaju pravo naknade troškova nabavke nišana-nadgrobno spomenika.

Visina naknade iz prethodnog stava ne može biti veća od cijene koju je Ministarstvo postiglo sa odabranim dobavljačem nišana – nadgrobno spomenika u tekućoj godini.

Član 232.

Porodica koja želi ostvariti pravo na refundaciju obraća se pismenim zahtjevom za refundaciju sredstava Ministarstvu, ili lično datom unificiranom izjavom u Ministarstvu i prilaže dokaz o podizanju nišana.

Kao dokaz služi: račun od preduzeća ili od samostalne zanatske radnje koja je obavila poslove, izrade i ugradnje šehidskog nišana ili nadgrobno spomenika ili potvrda preduzeća o plaćenim troškovima.

Ministarstvo neće refundirati troškove dodatno izvedenih radova na mezaru šehida – poginulog borca.

Član 233.

Refundacija sredstava će se vršiti u skladu sa planiranim sredstvima u budžetu Ministarstva.

Član 234.

Ukoliko je porodica postavila nišan – nadgrobno spomenik drugog tipa, a želi da joj se postavi tipizirani nadgrobno spomenik – nišan od strane Ministarstva, Ministarstvo je dužno izvršiti postavljenje nišana – nadgrobno spomenika, uz uredno popunjenu izjavu porodice.

U slučaju iz prethodnog stava, porodica nema pravo na refundaciju troškova prethodno postavljenih nišana drugog tipa.

Član 235.

Ministarstvo će izraditi bazu podataka u skladu sa evidencionim kartonima, odnosno Izjavama porodica šehida i poginulih boraca.

b) Izgradnja spomen obilježja

Član 236.

U skladu sa raspoloživim sredstvima za svaku budžetsku godinu Ministarstvo objavljuje Javni poziv za finansiranje/sufinansiranje izgradnje, sanacije, dogradnje i uređenja spomen obilježja, mezarja i grobalja u kojem se obavezno naznači ukupan iznos sredstava koja su predmet raspodjele.

Član 237.

Zahtjev za finansiranje/sufinansiranje programa/projekata mogu podnijeti samo pravna lica i to: **udruženja koja okupljaju boračke populacije, institucije i vjerske ustanove** sa razrađenim programima usmjerenim na realizaciju ciljeva proizašlih iz namjene ovih sredstava.

Član 238.

Zahtjev je potrebno obrazložiti, u smislu razloga podrške projekata/programa (općem, društvenom, finansijskom i sl). Sredstva će se dodjeljivati na osnovu Javnog poziva, jednokratno, a koji će biti objavljen na radio-televiziji Bosansko-podrinjskog kantona Goražde, oglasnim pločama institucija i na web stranici Ministarstva.

Član 239.

Prijedlog raspodjele i isplate ovih namjenskih sredstava vršit će se u skladu sa općim i posebnim kriterijima.

Član 240.

Opći kriteriji za odobrenje sredstava za finansiranje/sufinansiranje izgradnje spomen obilježja, uređenje mezarja i grobalja su:

- kvalitet i kompletnost programa;
- originalnost projekta u smislu njegovog značaja;
- visina učešća sopstvenih sredstava.

Član 241.

Posebni kriteriji za odobrenje sredstava za finansiranje/sufinansiranje izgradnje spomen obilježja, uređenje mezarja i grobalja su:

- programi koji se realiziraju uz pomoć više sufinansijera
- veličina prostora koji je obuhvaćen projektom

Član 242.

Zahtjevi po Javnom pozivu za odabir programa/projekata, podnose se Ministarstvu.

Zahtjevi će se podnositi Ministarstvu u toku Javnog poziva, odnosno u trajanju od 15 dana od dana njegovog objavljivanja na oglasnoj ploči Kantona.

Član 243.

Aplikacioni formulari se objavljuju na WEB stranici Ministarstva, a mogu se preuzeti i u prostorijama pisarnice Kantona.

Nepotpuni zahtjevi i programi se ne razmatraju.

Ministarstvo nema obavezu vraćanja predate dokumentacije aplikantima.

Član 244.

Uz zahtjev se dostavljaju slijedeći dokumenti:

1. Adekvatno popunjen i ovjeren aplikacioni formular;
2. Uvjerenje o identifikacionom broju;
3. Rješenje o registraciji;
4. Kopija ugovora sa bankom o otvaranju transakcionog/tekućeg računa;
5. Detaljan opisan projekat ili program za koji se traži finansiranje/sufinansiranje;
6. Finansijski plan projekta ili programa, sa očekivanim prihodima i rashodima;
7. Potvrda/uvjerenje od vjerske ustanove kao dokaz da se programi i projekti odnose na finansiranje/sufinansiranje uređenja mezarja i grobalja.

Član 245.

Za provođenje procesa selekcije, evaluacije i ocjenjivanja projekata Ministarstvo formira komisiju.

Komisija sve dostavljene aplikacije razmatra i evaluira u periodu od maksimalno 10 dana od završetka Javnog oglasa.

Evaluaciju aplikacija provodi se na osnovu kriterija za raspodjelu sredstava za finansiranje/sufinansiranje projekata uz obaveznu primjenu skale za evaluaciju iz člana 268. u kojoj su sadržani opći i posebni uslovi i broj bodova u odnosu na traženi iznos sredstava.

Član 246.

Prilikom procesa selekcije i evaluacije prednost će se davati projektima i zahtjevima čija implementacija uključuje veći prostor koji je obuhvaćen projektom i programe koji se realizuju uz pomoć više sufinansijera.

Član 247.

Pojedinačna visina sredstava koja se može odobriti za **sufinansiranje** zahtjeva, projekata/programa iznosi do 10.000,00 KM, dok za **finansiranje** zahtjeva, projekata/programa koja se može odobriti iznosi do 30.000,00 KM.

Član 248.

Sve odobrene zahtjeve Ministarstvo predlaže Vladi da u skladu sa izvršenjem Budžeta, donese Odluku o odobravanju sredstava iz Budžeta Kantona.

Nakon prihvatanja prijedloga Odluke o odobravanju zahtjeva za isplatom sredstava od strane Vlade, zahtjev je odobren i pristupa se potpisivanju ugovora za finansiranje ili sufinansiranje zahtjeva.

26. PARTICIPACIJA U UČEŠĆU NA SPORTSKIM TAKMIČENJIMA U INVALIDSKOM SPORTU

Član 249.

Sportski klubovi invalida kantonalnog nivoa kojeg čine pripadnici boračkih populacija imaju pravo na participaciju troškova za učešće na sportskim takmičenjima, odnosno u organiziranju i održavanju sportskih takmičenja u invalidskom sportu.

Visinu participacije iz stava 1. ovog člana utvrđuje Ministarstvo, u skladu sa raspoloživim sredstvima a na osnovu projekata/zahtjeva usmjerenih za realizaciju ciljeva iz predhodnog stava ovog člana.

27. POSEBNA PRAVA DOBITNIKA RATNIH PRIZNANJA I ODLIKOVANJA

Član 250.

Pod uslovom da su imali prebivalište, odnosno boravište na području Kantona, neprekidno, najmanje tri godine prije stupanja na snagu ovog Zakona, dobitnici ratnih priznanja i odlikovanja, kao i članovi porodice poginulih dobitnika ratnih priznanja imaju pravo na jednokratno novčano primanje u toku jedne kalendarske godine, u visini i prema dinamici koju utvrdi Ministarstvo.

Dobitnici ratnih priznanja ili odlikovanja imaju pravo na obavještanje o smrti putem javnih medija, organiziranje dženaze - sahrane uz državne počasti i pravo na ukopno mjesto na lokacijama zaslužnih ličnosti u skladu sa posebnim propisom koji donosi Vlada Kantona.

Dobitnici ratnih priznanja i odlikovanja i članovi porodice poginulog, umrlog i nestalog dobitnika ratnog priznanja i odlikovanja, u ostvarivanju prava utvrđenih ovim Zakonom, imaju prioritet pod jednakim uslovima u okviru boračke kategorije kojoj pripadaju (demobilisani branioци, ratni vojni invalidi, članovi porodice šehida - poginulog, umrlog i nestalog branioca).

28. DRUGA PRAVA U SKLADU SA POSEBNIM PROPISOM

Član 251.

Na osnovu podnesenog zahtjeva, lica iz člana 2. ovog Zakona mogu ostvariti i druga prava, koja odobrava Ministarstvo ili općine u sastavu Kantona.

Član 252.

Nadležni organi osigurati će isticanje obavijesti na vidnim mjestima (bolnice, ambulante, općine, sudovi i druge javne ustanove) da prednost bez čekanja u redu imaju ratni vojni invalidi, dobitnici ratnih priznanja i odlikovanja i roditelji šehida i poginulih branilaca koji svoj status dokazuju odgovarajućim iskaznicama.

28.1. Uslovi, način i kriteriji za ostvarivanje prava na novčanu pomoć za druge potrebe

Član 253.

Pod posebnim uslovima za ostvarivanje jednokratne novčane pomoći za druge potrebe smatraju se okolnosti koje podnosioca zahtjeva, s aspekta materijalno-socijalne situacije, dovode u otežavajući položaj, odnosno ugrožavaju normalan način života kao što su: (elementarne nepogode, saobraćajne nesreće, iznenadna smrt, maligna oboljenja, pomoć u liječenju užih članova porodice pripadnika boračkih populacija koja ne mogu ostvariti pravo po drugom osnovu a isti su oboljeli od teških malignih oboljenja i drugih teških bolesti, participacija troškova dženaze/sahrane uslijed smrti užih članova porodice ratnog vojnog invalida, demobilisanog borca, članovi porodice šehida/poginulog borca, pomoć u odlasku na ekskurziju djeci pripadnika boračkih populacija lošeg imovnog stanja, pomoć porodicama umrlih demobilisanih boraca i ratnih vojnih invalida koje se nalaze u stanju socijalne potrebe, participacija naknade štete pripadnicima boračkih populacija uslijed pretrpjelih šteta napadom zvijeri/pasa lualica na poljoprivredne posjede i stoku, izgradnja i popravka puteva u mjestu stanovanja pripadnika boračkih populacija, pomoć šehidskim porodicama koje se nalaze u teškoj finansijskoj situaciji (roditelji šehida, djeca bez oba roditelja, nabavka materijala za dovod vode u naselju gdje žive pripadnici boračke populacije gdje nije instalirana gradska vodovodna mreža sa prirodnih izvorišta i ostale nepredvidive okolnosti u kojima je nužno pružanje pomoći braniocima i članovima njihovih porodica.

Predmetna pomoć može se dodijeliti za izmirenje poreskih obaveza u visini definisanoj Zakonom pri angažmanu fizičkih lica od strane udruženja boračkih populacija za izvršavanje određenih poslova i zadataka, pomoć pripadnicima boračkih populacija koje uslijed gašenja, likvidacije i stečaja preduzeća u kojem radi se nađu u izuzetno teškoj materijalno-socijalnoj situaciji i sl.

Član 254.

Za ostvarivanje prava na dodjelu jednokratne pomoći za druge potrebe, borci i članovi njihovih porodica su obavezni dostaviti:

1. Zahtjev sa tačnom adresom, brojem kontakt telefona i brojem žiro-računa ;
2. Dokaz o boračkom ststusu;
3. Fotokopija lične karte podnosioca zahtjeva;
4. Dokaz o mjestu prebivališta;
5. Kućna lista;
6. Uvjerenje da se podnosilac zahtjeva i punoljetni članovi njegovog porodičnog domaćinstva nalaze na evidenciji Službe za zapošljavanje (za nezaposlene) ili dokaz o visini primanja (po osnovu radnog odnosa, boračko-invalidske zaštite, penzije, samostalne djelatnosti i drugih osnova), ili dokaz o redovnom školovanju;
7. Posebne isprave – dokumenta, kojima podnosioci zahtjeva dokazuju tačnost navoda iz zahtjeva.

Član 255.

Razmatrnje zahtjeva, provjera njihove formalne ispravnosti i davanje prijedloga o dodjeli sredstava u skladu sa kriterijima iz ovog Zakona vrši Komisija iz člana 215. ovog Zakona imenovana od strane Ministra.

Član 256.

Na prijedlog Komisije iz člana 255.ovog Zakona Odluku o dodjeli i odobravanju sredstava donosi Ministar.

Član 257.

Iznos sredstava po osnovu jednokratne novčane pomoći za druge potrebe ne može biti veći od jedne polovine prosječne netto plaće isplaćene u Federaciji BiH u predhodnoj godini.

29. OSNOVNO OBEZBJEĐENJE

Član 258.

Pravo na osnovno obezbjeđenje ima demobilisani branilac stariji od 65 godina koji je u Oružanim snagama proveo neprekidno najmanje dvije godine ako on i njegov bračni partner ili vanbračni partner nemaju neophodnih sredstava za izdržavanje i ako stalno žive i imaju prebivalište na teritoriji Kantona.

Član 259.

Smatra se da lice iz člana 258. ovog Zakona i njegov bračni partner ili vanbračni partner nemaju neophodnih sredstava za izdržavanje ako nijedno od njih:

1. Nije u random odnosu;
2. Ne obavlja samostalnu djelatnost ličnim radom;
3. Nije uživalac domaće ili inostrane penzije;
4. Nije korisnik mjesečnih novčanih primanja prema federalnim i kantonalnim propisima;
5. Nema u vlasništvu zemljište površine veće od 10.000 m²;
6. Nema drugih prihoda po osnovu izdavanja u zakup stambenih zgrada, poslovnog prostora i slično.
7. Da korisnik prava ima otvoren samo jedan žiro-račun.

Član 260.

Iznos osnovnog obezbjeđenja utvrđuje se u visini od 20% prosječne netto plaće isplaćene u Federaciji BiH u predhodnoj godini i usklađuje se od 1. januara tekuće godine sa kretanjem prosječne plate u Federaciji BiH.

Član 261.

Licima koja ispunjavaju uslove za priznavanje prava na osnovno obezbjeđenje pravo pripada od prvog narednog mjeseca od dana podnošenja zahtjeva.

Korisnik prava iz člana 260. ovog Zakona dužan je u roku od 15 dana od dana nastanka promjene prijaviti svaku promjenu koja utiče na korištenje prava.

Pravo iz člana 260. ovog Zakona prestaje ukoliko dođe do promjene bilo koje okolnosti iz člana 259. ovog Zakona.

Pravo na osnovno obezbjeđenje prestaje napuštanjem teritorije Kantona u vremenu dužem od 90 dana.

Član 262.

O pravu na osnovno obezbjeđenje u prvom stepenu rješava prvostepeni organ nadležan za boračko-invalidsku zaštitu, prema mjestu prebivališta podnosioca zahtjeva .

Rješenje kojim je priznato pravo na osnovno obezbjeđenje podliježe reviziji. Reviziji prvostepenih rješenja vrši Ministarstvo, u roku od tri mjeseca od dana prijema predmeta.

Revizija odlaže izvršenje rješenja

Protiv rješenja u postupku revizije može se pokrenuti upravni spor.

Član 263.

Žalba na prvostepeno rješenje može se izjaviti u roku od 15 dana od dana prijema rješenja. Po žalbi izjavljenoj na prvostepeno rješenje rješava Ministarstvo.

Žalba odlaže izvršenje rješenja.

Protiv rješenja donesenog po žalbi može se pokrenuti upravni spor .

Član 264.

Sredstva za ostvarivanje i korištenje prava na osnovno obezbjeđenje obezbjeđuje se u Budžetu Kantona.

31. FINANSIRANJE BORAČKIH ORGANIZACIJA ČIJI SU ČLANOVI LICA IZ ČLANA 2. OVOG ZAKONA I FINANSIJSKA PODRŠKA BORAČKIM UDRUŽENJIMA ZA PROJEKTE I AKTIVNOSTI KOJI DOPRINOSE POBOLJŠANJU STATUSA BORAČKIH POPULACIJA

Član 265.

Organizacije koje okupljaju populacije proistekle iz odbrambeno-oslobodilačkog rata 1992-1995.god. a iste su od posebnog interesa i značaja za Kanton ostvaruju pravo na finansiranje iz budžeta općina i Kantona u visini neophodnoj za finansiranje redovne registrirane djelatnosti organizacije-udruženja, uz maksimalnu racionalizaciju broja tih organizacija-udruženja.

Pravo na finansiranje iz predhodnog stava ovog člana mogu ostvariti:

1. Savez ratnih vojnih invalida «Sinovi Drine» Bosansko-podrinjskog kantona Goražde;
2. Organizacija porodica šehida/poginulih boraca Bosansko-podrinjskog kantona Goražde;
3. Udruženje demobilisanih boraca Armije Bosne i Hercegovine Bosansko-podrinjskog kantona Goražde;
4. Savez dobitnika najvećih ratnih priznanja Bosansko-podrinjskog kantona Goražde;
5. Udruženje Veterana rata, Zelenih beretki i Patriotske lige Bosansko-podrinjskog kantona Goražde;
6. Udruženje «Svjetlost Drine» Bosansko-podrinjskog kantona Goražde.

Pravo na redovno finansiranje redovne djelatnosti može ostvariti i privredno društvo koje zapošljava pripadnike boračkih populacija čiji je većinski vlasnik udruženje–fondacija registrovana za pružanje pomoći borcima i članovima njihovih porodica

Član 266.

Finansiranje redovne djelatnosti organizacija-udruženja iz stava 2. člana 265. ovog Zakona realizovat će se isplatom iz budžeta Ministarstva u vidu mjesečnih anuiteta (tranši), s tim da pojedinačna visina mjesečnog anuiteta po jednoj organizaciji-udruženju ne može biti manja od jedne prosječne plaće niti prelaziti iznos od 2,5 (dvije i po) netto prosječne plaće isplaćene u Federaciji BiH u predhodnoj godini.

Finansiranje redovne djelatnosti privrednog društva iz stava 3. člana 265. ovog Zakona realizovat će se isplatom iz Budžeta Ministarstva u vidu mjesečnih anuiteta u skladu sa raspoloživim sredstvima koja utvrđuje Ministarstvo

Član 267.

U visini raspoloživih sredstava u budžetu mogu se odobriti finansijska sredstva na ime podrške boračkim udruženjima za projekte i aktivnosti koje doprinose poboljšanju statusa boračkih populacija, a čiji su efekti prepoznati za pojedince i udruženja u cjelosti na prostoru Kantona i općinama iz stava 2. člana 1. Zakona.

Visinu sredstava za realizaciju prava iz predhodnog stava ovog člana, na prijedlog Ministra utvrđuje Vlada.

29.1. Uslovi, način, postupak i kriteriji za raspodjelu sredstava

Član 268.

(1) U skladu sa raspoloživim sredstvima za svaku budžetsku godinu, Ministarstvo objavljuje Javni poziv za finansiranje/sufinansiranje projekata i aktivnosti udruženja boračkih populacija Kantona koje doprinosi poboljšanju statusa boračkih populacija u kojem se obavezno naznači ukupan iznos sredstava koja su predmet raspodjele, procedure i kriteriji na osnovu kojih se vrši raspodjela sredstava.

(2) (Kriteriji za raspodjelu)

Za raspodjelu sredstava, u skladu sa općim i posebnim ciljevima koristiće se više kriterija za raspodjelu sredstava korisniku ili grupi korisnika. Kriteriji za raspodjelu sredstava su:

- I) Ispunjavanje općih uslova za učestvovanje,
- II) Ispunjavanje posebnih uslova definisanih Zakonom,
- III) Povezanost sa općim i posebnim ciljevima,
- IV) Rezultat procesa selekcije aplikacija.

(3) (Opći uslovi za učestvovanje)

Opći uslovi omogućavaju učešće udruženja boračkih populacija i drugih udruženja građana kojima je cilj unapređenje statusa branilaca i članova njihovih porodica i njegovanje tradicije odbrambeno-oslobodilačke borbe za Bosnu i Hercegovinu.

Opći uslovi za učešće aplikanta su:

- 1) Da imaju rješenje o registraciji koje je izdao nadležni sudski ili upravni organ u Federaciji BiH i da im je prebivalište (registracija) na prostoru Kantona;
- 2) Da imaju uvjerenje od poslovne banke da je korisnik sredstava solventan i da mu račun nije bio u blokadi;
- 3) Da se prijedlog projekta ili zahtjev kandiduje u skladu sa odredbama ovog Zakona.

(4) (Kandidovanje prijedloga projekata i zahtjeva za sredstvima)

Prijedlozi projekata i zahtjevi za sredstvima dostavljaju se u formi koja je propisana od strane Ministarstva.

Prijedlozi projekata dostavljaju se u skladu sa Javnim pozivom koji se raspisuje u skladu sa odredbama ovog Zakona tamo gdje je Javni poziv potreban.

Minimalno jedan Javni poziv će se raspisati za sve projekte/aktivnosti. Ministarstvo može raspisati i Javni poziv za pojedinačne projekte/programe u slučaju raspisivanja dva i više Javnih poziva.

Javni poziv za dostavljanje prijedloga projekata na evaluaciju i selekciju provodi se u skladu sa Programom rada Ministarstva.

Dostavljanje zahtjeva za sredstvima će biti definisano procedurama apliciranja.

(5) (Odobranje prijedloga projekta ili zahtjeva)

Pravilno popunjavanje propisane forme omogućava da se svi aspekti prijedloga projekata ili zahtjevi selektiraju i procijene.

Svi prijedlozi projekata ili zahtjevi se odobravaju u skladu sa procedurama apliciranja, selekcije, evaluacije i rangiranja.

a) Procedure apliciranja, selekcije i evaluacije projekata i zahtjeva za sredstvima

(1) (Aplikanti)

Boračka udruženja i udruženja građana Kantona i neprofitne organizacije a koji ispunjavaju opće i posebne uslove imaju status aplikanta.

Aplikant aplicira na sredstva u vidu prijedloga projekta i u vidu zahtjeva za sredstvima. Aplikant može odabrati najpovoljniji način apliciranja na sredstva.

(2) (Korisnici sredstava)

Korisnici sredstava su aplikanti koji su uspješno završili proces apliciranja, selekcije i evaluacije i koji su uspješno rangirani za korištenje sredstava.

(3) (Podnošenje prijedloga projekata)

Aplikant može dostaviti više prijedloga projekata, ali maksimalno jedan prijedlog projekta za finansiranje aktivnosti u okviru jednog specifičnog cilja.

Ukoliko se u prvom Javnom pozivu ne utroše sva planirana sredstva Programa, te ukoliko se sredstva planirana za finansiranje zahtjeva ne utroše u vremenskom planu koji je određen Programom, Ministarstvo će raspisati drugi Javni poziv za dostavljanje prijedloga projekata.

Krajnji rok za objavljivanje javnih poziva je 31.oktobar tekuće godine.

(4) (Finansiranje prijedloga projekata)

Ukupan budžet predloženih projekata koje aplikanti dostavljaju za finansiranje, ne može biti manji od **500,00 KM** i veći od **50.000,00 KM**.

Prijedlozi projekata čiji ukupni iznos prelazi maksimalni iznos projekta u kojima je planirani grant veći ili manji od utvrđene visine, će biti automatski odbijeni kao neprihvatljivi za finansiranje.

(5) (Podnošenje zahtjeva za sredstvima)

U slučaju postojanja hitnih ili specifičnih potreba, aplikanti mogu dostaviti zahtjeve za sredstvima.

Aplikant ne može u toku godine u okviru istog cilja dostaviti i prijedlog projekta i zahtjev za sredstvima. Ukoliko je aplikant koristio sredstva putem zahtjeva za sredstvima, njegov prijedlog projekta, ukoliko je podnešen za isti cilj kao i zahtjev, biće automatski odbijen.

Zahtjev za sredstvima aplikant podnosi u propisanoj aplikacionoj formi za zahtjeve.

U slučaju pozitivne odluke, aplikant može podnijeti novi zahtjev za sredstvima, tek nakon pozitivnog usvajanja izvještaja o utrošku sredstava po odobrenom zahtjevu. U slučaju odbijanja zahtjeva u procesu evaluacije, aplikant može podnijeti novi zahtjev tek nakon isteka 30 dana od dana prijema obavještenja o odbijanju zahtjeva.

(6) (Obavezni sadržaj zahtjeva)

Prilikom apliciranja u vidu zahtjeva za odobravanje sredstava, aplikant je dužan navesti slijedeće informacije:

- razlog zbog kojeg se zahtjevom traži odobravanje sredstava,
- informacije o usklađenosti zahtjeva sa općim i posebnim ciljevima,
- pregled planiranih aktivnosti,
- ukupni iznos sredstava neophodnih za provođenje planiranih aktivnosti,
- očekivani rezultat koji se planira ostvariti,
- traženi iznos sredstava od Ministarstva,
- iznos sredstava koji bi se obezbjedio iz drugih izvora.

(7) (Finansiranje zahtjeva za sredstvima)

Zahtjevi za odobravanje sredstava u pojedinačnom slučaju ne mogu biti veći od **2.000,00 KM**. Iznose odobrenih sredstava po ovim zahtjevima određuje Vlada posebnom Odlukom. Vlastita sredstva aplikanta su poželjna, ali nisu obavezujuća.

(8) (Otvaranje aplikacija i administrativna provjera)

Otvoranje aplikacija i administrativna provjera za prijedloge projekata se provodi najkasnije 30 dana od zatvaranja Javnog poziva. Aplikacije za zahtjeve za sredstvima se otvaraju nakon prijema i kao takve upućuju u proceduru administrativne provjere i ocjenjivanja.

Administrativna provjera se provodi u cilju utvrđivanja da li aplikant ispunjava uslove za učestvovanje u korištenju sredstava Ministarstva u okviru ovog Zakona.

Administrativnom provjerom Komisija će provjeravati da li je svaka aplikacija zadovoljila slijedeće uslove:

- 1) da aplikant ispunjava opće i posebne uslove za učestvovanje,
- 2) da je aplikacija u skladu sa općim i specifičnim ciljevima,
- 3) da je dokumentacija potpuna i ispravno popunjena u skladu sa propisanom formom.

Ukoliko su ovi uslovi ispunjeni, komisija će aplikaciju evaluirati u skladu sa odredbama Zakona. U suprotnom, aplikacija će i bez evaluacije biti odbijena iz administrativnih razloga.

Na osnovu dodijeljenih bodova utvrđuju se prijedlozi rang lista korisnika grant sredstava do visine planiranih sredstava predviđenih Zakonom.

Nakon provedene administrativne procedure, Ministarstvo će obavjestiti sve aplikante o rezultatima administrativne provjere.

Podnosioci prijava čija imena nisu objavljena u predloženim rang listama korisnika grant sredstava mogu uložiti prigovor Ministarstvu u roku od 7 (sedam) dana od dana objave na oglasnoj ploči Kantona i web stranici Ministarstva, radi provjere činjenica i objektivnosti ocjene prijava.

Konačnu Odluku o prijedlogu rang liste za dodjelu grant sredstava donosi Ministar, a o dodjeli grant sredstava Vlada.

(9) (Evaluacija dostavljenih prijedloga projekata)

Za provođenje procesa selekcije, evaluacije i ocjenjivanja projekata Ministarstvo formira komisiju.

Komisija sve dostavljene aplikacije razmatra i evaluira u periodu od maksimalno 30 dana od završetka administrativne provjere .

Pri evaluaciji projekata komisija primjenjuje pet grupa indikatora i to:

- 1) Finansijski i operativni kapaciteti aplikanta,
- 2) Relevantnost,
- 3) Metodologija,
- 4) Održivost,
- 5) Budžet i troškovna efikasnost.

(10) (Evaluacija dostavljenih zahtjeva za sredstvima)

Komisija provodi evaluaciju zahtjeva nakon provedene administrativne provjere.

Pri evaluaciju zahtjeva komisija primjenjuje tri grupe indikatora i to:

- I. Relevantnost,
- II. Održivost,
- III. Budžet i troškovna efikasnost.

(11) (Ocjenjivanje aplikacija)

Evaluacija aplikacija se provodi na osnovu Skale za evaluaciju. Evaluacijski kriteriji su podjeljeni u okviru grupa i podgrupa. Za svaku podgrupu komisija daje ocjenu između 1 i 5 prema slijedećim kategorijama procjena:

- 1 - veoma slabo;
- 2 - slabo;
- 3 - adekvatno;
- 4 - dobro;
- 5 - veoma dobro.

Svaka ocjena se množi sa koeficijentom koji je za svaki indikator predviđen u evaluacijskoj skali. Maksimalan broj bodova za projekat iznosi 100, dok je maksimalan broj bodova za zahtjev za sredstvima 80.

Projekti koji imaju manje od 70 bodova, odnosno zahtjevi za sredstvima koji imaju manje od 50 bodova se odbacuju u prvom krugu selekcije. Ukoliko je ukupan rezultat u poglavlju **relevantnost** manji od 15 aplikacija se odbija, bez obzira na dobiven ukupan maksimalan broj bodova. Ukoliko je ukupan rezultat u poglavlju **budžet i troškovna efikasnost** manji od 15 aplikacija se odbija, bez obzira na dobiven ukupan maksimalan broj bodova.

Komisija će procjenjivati vrijednost indikatora. Svi članovi komisije dodjeljuju ocjene, a ukupan broj bodova se dobija kada se ocjene dobivene od svih članova komisije podjeli sa brojem članova komisije. Visina sredstava predloženih za dodjelu kod projekata je u visini traženih sredstava aplikanta, a kod zahtjeva visina sredstava se utvrđuje procentualno osvojenom prosječnom ukupnom broju bodova u odnosu na traženi iznos sredstava po apliciranom zahtjevu.

(12) (Skala za evaluaciju)

SKALA ZA EVALUACIJU PROJEKATA I ZAHTJEVA		
OPIS INDIKATORA	OCJENA PROJEKTI	OCJENA ZAHTJEVI
1. Finansijski i operativni kapaciteti aplikanta	10	
Procjenjeni nivo iskustva aplikanta u upravljanju projektom	5	
Procjenjeni nivo tehničkog znanje neophodnog za implementaciju projekata.	5	
2. Relevantnost	30	30
Koliko je aplikacija relevantna za svrhu, opći i posebne ciljeve Programa?	5x2	5x2
Koliko je aplikacija relevantna za prioritete Programa?	5x2	5x2
Koliko je aplikacija relevantna za očekivane rezultate Programa?	5x2	5x2

3. Metodologija	10	
Da li aktivnosti u prijedlogu projekta odgovarajuće i konzistentne sa ciljevima i očekivanim rezultatima projekta?	5	
Koliko je koherentan dizajn projekta, konkretna analiza problema, da li su predložene aktivnosti odgovarajuće za rješavanje prezentiranog problema, te da li su na zadovoljavajući način uključeni svi koji mogu doprinijeti rješavanju problema?	5	
4. Održivost	20	20
Da li će predložene aktivnosti značajnije doprinijeti rješavanju problema koji je naveden u prijedlogu projekta ili zahtjevu?	5x2	5x2
Da li predložene aktivnosti mogu imati pozitivne multiplikativne efekte na unapređenje statusa pripadnika b/p?	5	5
Da li su očekivani rezultati aktivnosti za koje se traži finansiranje održivi u finansijskom smislu i da li će se ostvarivati i nakon prestanka finansiranja iz sredstava Ministarstva za boračka pitanja?	5	5
5. Budžet i troškovna efikasnost	30	30
Da li je odnos između planiranih troškova i očekivanih rezultata zadovoljavajući?	5x2	5x2
Da li je visina predloženih troškova adekvatna za implementaciju planiranih aktivnosti?	5x2	5x2
Da li su predloženi troškovi aktivnosti obrazloženi na način da dokazuju da će sredstva Programa biti iskorištena na efikasan i ekonomičan način?	5x2	5x2
MAKSIMALNI BROJ BODOVA	100	80

(13) (Procedure odobravanja prijedloga projekata

Projekte koji su u procesu evaluacije dobili više od 70 bodova, komisija rangira po broju osvojenih bodova.

Nakon provedenog rangiranja odobravaju se svi najbolje rangirani projekti do visine raspoloživih sredstava koja su definisana za svaki pojedinačni cilj. Svi najbolje rangirani projekti za koje postoje raspoloživa sredstva imaju status odobrenih projekata.

Prijedlozi projekata koji imaju više od 70 bodova ali za čije finansiranje nema raspoloživih sredstava stavljaju se na listu čekanja u slučaju obezbjeđenja dodatnih sredstava za Program ili donošenja odluke o preraspodjeli sredstava u skladu sa odredbama Programa.

Sve odobrene projekte Ministarstvo predlaže Vladi da u skladu sa Zakonom o izvršenju Budžeta, donese odluku o odobravanju sredstava iz Budžeta Kantona – ekonomski kod– Tekući transferi neprofitnim organizacijama.

Istovremeno sa prijedlogom odluke o odobravanju sredstava iz Budžeta, Vladi se dostavlja odobreni prijedlog projekta i nacrt ugovora o finansiranju ili sufinansiranju odobrenog projekta.

Ukoliko se odlukom Vlade odobrava iznos granta veći od **10.000,00 KM**, prije potpisivanja ugovora, nacrt ugovora dostavlja se Kantonalmom pravobraniocu na mišljenje.

U slučaju da je planirano finansiranje ili sufinansiranje projekta iz Programa veće od 6.000,00 KM i manje od 50.000,00 KM, uz nacrt ugovora podnosi se i prijedlog zaključka Vlade o davanju saglasnosti Ministru za potpisivanje ugovora. Nakon prihvatanja prijedloga odluke od strane Vlade, projekt je odobren te se pristupa potpisivanju ugovora za finansiranje ili sufinansiranje projekta.

Ugovorom će se definisati način implementacije projekta, vrijeme implementacije, obaveze korisnika sredstava i Ministarstva i način obezbjeđenja instrumenata za namjenski utrošak sredstava.

(14) (Procedure odobravanja zahtjeva za sredstvima)

Aplikaciju podnešenu u formi zahtjeva, komisija rangira po broju osvojenih bodova, za one zahtjeve koje su dobili više od 50 bodova.

Nakon provedenog rangiranja, komisija predlaže odobravanje zahtjeva u punom ili umanjenom iznosu u zavisnosti od rezultata procesa evaluacije. U toku provođenja procedura odobravanja zahtjeva komisija vodi računa o predhodno odobrenim zahtjevima, odobrenim projektima odnosno projektima koji se nalaze u procesu odobravanja. Komisija može predložiti privremenu suspenziju procedura odobravanja zahtjeva najviše do 3 mjeseca, nakon čega donosi konačni prijedlog odluke.

Zahtjevi za sredstvima koji imaju više od 50 bodova ali za čije finansiranje nema raspoloživih sredstava stavljaju se na listu čekanja u slučaju obezbjeđenja dodatnih sredstava ili donošenja odluke o preraspodjeli sredstava.

Sve odobrene zahtjeve Ministarstvo predlaže Vladi da u skladu sa Zakonom o izvršenju Budžeta, donese odluku o odobravanju sredstava iz Budžeta Kantona– ekonomski kod– Tekući transferi neprofitnim organizacijama.

Nakon privatanja prijedloga odluke o odobravanju zahtjeva za isplatom sredstava od strane Vlade, zahtjev je odobren i pristupa se potpisivanju ugovora za finansiranje ili sufinansiranje zahtjeva.

b) Prioriteti i posebni uslovi

Prilikom procesa selekcije i evaluacije prednost će se davati projektima i zahtjevima čija implementacija uključuje realizaciju prioriteta definisanih ovim Zakonom.

Osnovni prioritet je pomoć boračkim udruženjima da na temelju statuta i adekvatnih programa svojim radom doprinesu poboljšanju statusa boračkih populacija na prostoru Kantona kantona i susjednih općina u Republici Srpskoj

Prioritetne aktivnosti i mjere koje imaju prednost za odobravanje sredstava su:

1. Pomoć u radu boračkih udruženja;
2. Poboljšanje statusa članova boračkih udruženja u oblasti zdravstvenog i stambenog zbrinjavanja;
3. Socijalna inkluzija I razvoj sporta ratnih vojnih invalida na prostoru Kantona;
4. Učešće u obilježavanju značajnih datuma, događaja i ličnosti;
5. Obilazak porodica šehida i poginulih boraca;
6. Održavanje redovnih skupština udruženja;
7. Projekti od općeg interesa svih pripadnika boračko-invalidske zaštite;
8. Pokretanje promotivnih kampanja;
9. Projektima koji uključuju volonterski rad građana u projektnim aktivnostima će biti pružena dodatna prednost;
10. Projekti od općeg interesa koji se odnose na izradu I ugradnju spomen obilježja i njihova zaštita;
11. Projekti kulturno-istorijskog I edukativnog značaja.

Aplikanti mogu predvidjeti i implementaciju ostalih aktivnosti i mjera koje su povezane sa posebnim (specifičnim) ciljevima.

III POSTUPAK PRIZNAVANJA PRAVA

Član 269.

Poslove upravnog rješavanja u prvom stepenu o pravima i obavezama iz ovog Zakona vršit će općinske službe, i to: zdravstvenu zaštitu, banjsko i klimatsko liječenje, naknada putnih troškova i troškova za liječenje u inostranstvu, prava po osnovu preostale radne sposobnosti, uklanjanje arhitektonsko – urbanističkih barijera za ulazak i kretanje po stanu u invalidskim kolicima, participacija troškova naknade za dodijeljeno građevinsko zemljište na korištenje i naknade za uređenje gradskog građevinskog zemljišta, besplatnu ili povlaštenu vožnju i pomoć u slučaju smrti i osnovno obezbjeđenje.

U drugom stepenu o pravima i obavezama iz ovog Zakona rješavat će nadležni kantonalni organi.

Član 270.

Prednost pri korištenju programa Službe za zapošljavanje Bosansko-podrinjskog kantona Goražde, stimulativne mjere pri zapošljavanju i samozapošljavanju, prednost pri zakupu i otkupu poslovnog prostora, prvenstvo upisa u obrazovne ustanove i besplatno školovanje, stipendiranje, prednost pri smještaju u đačke i studentske domove, pravo na besplatne obavezne udžbenike za redovno školovanje, stambeno zbrinjavanje i pomoć u stambenom zbrinjavanju (kod stambenih jedinica nad kojim pravo raspolaganja ima Kanton i sredstva koja se za ove namjene izdvajaju iz budžeta Kantona, pravo na participaciju troškova na priključak na infrastrukturne mreže (voda, električna energija), pravo na stan u vlasništvo, prioritet u dodjeli sredstava za povratak i održivi povratak, posebna prava dobitnika ratnih priznanja i odlikovanja, jednokratna pomoć, podizanje nišana nadgrobnih spomenika i spomen obilježja) i finansiranje boračkih organizacija čiji su članovi lica iz člana 2. Zakona. U prvostepenom postupku rješavaće nadležni Kantonalni organi, a u drugom stepenu Vlada Kantona.

Za lica, povratnike u Republiku Srpsku u prvostepenom postupku rješava najbliži prvostepeni organ nadležan za boračko invalidsku - zaštitu općina u sastavu Kantona.

Pravo novčane naknade za vrijeme nezaposlenosti, programi kantonalne Službe za zapošljavanje koji se finansiraju - sufinansiraju iz sredstava Federalnog zavoda za zapošljavanje, te ostvarivanje penzije pod povoljnijim uvjetima, u prvostepenom postupku rješavat će nadležne kantonalne službe, a u drugostepenom postupku rješavat će nadležni federalni organi.

Član 271.

Službenu evidenciju o korisnicima prava po ovom Zakonu vodi Ministarstvo i prvostepeni organi u okviru propisane nadležnosti općina u sastavu Kantona.

Član 272.

U svim postupcima koji se vode za priznavanje prava iz člana 6. ovog Zakona, prilikom obrade ličnih podataka podnosioca zahtjeva i unošenje u elektronsku bazu podataka ostvarenih prava po ovom Zakonu, mogu se bez predhodnih saglasnosti nosioca podataka objavljivati lični podaci, a u skladu sa članom 6. stav (1). tačka a) Zakona o zaštiti ličnih podataka («Službeni glasnik BiH» broj: 49/06 i 76/11).

Voditelji postupka iz člana 269. i 270. ovog Zakona, kao i pravna lica nad kojima Ministarstvo vrši nadzor nad zakonitošću rada, u cilju transparentnosti rada i ostvarivanja demokratskog procesa u skladu sa kojim su dužni postupati javni organi na cijeloj teritoriji Bosne i Hercegovine, mogu vršiti objavu lista lica koja su ostvarila pravo po ovom Zakonu sa ličnim podacima i odobrenim iznosima na službenoj internet stranici Ministarstva, u dnevnim novinama, na oglasnim pločama Kantona, info-punktu, sjedištima kantonalnih boračkih udruženja i službama za boračko-invalidsku zaštitu svih općina Kantona.

IV OSTVARIVANJE I PRESTANAK PRAVA

Član 273.

Prava utvrđena ovim Zakonom mogu se koristiti dok postoje propisani uvjeti za korištenje tih prava i ne mogu se naslijeđivati niti prenositi na druga lica.

U slučaju smrti demobilisanog borca i ratnog vojnog invalida prava po ovom Zakonu nastavljaju koristiti članovi njegove uže porodice (bračni drug, djeca do navršenih 18.godina života, odnosno 25 godina života ako se nalaze na redovnom školovanju).

Član 274.

Prestanak svojstva vojnog invalida ili člana porodice šehida - poginulog borca (korisnika prava na ličnu, odnosno porodičnu invalidninu) u skladu sa važećim Federalnim propisima, povlači i prestanak prava utvrđenih ovim Zakonom, ukoliko su ta prava ostvarena na osnovu tog svojstva.

Odjava prebivališta ili boravišta sa područja Kantona, odnosno prijava prebivališta ili boravišta izvan područja Kantona i općina iz stava 2. člana 1. ovog Zakona, povlači prestanak prava utvrđenih ovim Zakonom.

Član 275.

Korisnik prava po ovom Zakonu dužan je prijaviti svaku promjenu koja povlači izmjenu ili prestanak prava utvrđenih ovim Zakonom u roku od 15 dana od nastanka promjene.

V SREDSTVA ZA FINANSIRANJE PRAVA

Član 276.

Sredstva za finansiranje prava utvrđenih ovim Zakonom obezbjeđuju se iz budžeta Kantona i općina.

Član 277.

Troškove postupka u vezi sa ostvarivanjem prava, prema ovom Zakonu, snosi organ koji vodi postupak.

VI NADZOR

Član 278.

Nadzor nad sprovođenjem ovog Zakona i drugih propisa, donesenih u skladu sa ovim Zakonom, vrši Ministarstvo i drugi organi čija je nadležnost propisana Zakonom.

VII NAKNADA ŠTETE

Član 279.

Lice kome je isplaćen novčani iznos ili ostvarilo pravo prema ovom Zakonu, na koje nije imalo pravo, dužno je vratiti primljeni iznos, odnosno vratiti protivvrijednost izraženu u novcu za iskorišteno pravo:

1. Ako je na osnovu netačnih podataka za koje je znalo ili je moralo znati da su netačni, ili je na drugi protivpravni način ostvarilo novčano primanje ili drugo pravo koje nije izraženo u novcu, prema ovom Zakonu, kojemu ne pripada, ili je ostvarilo novčano primanje u većem iznosu nego što mu pripada.
2. Ako je ostvarilo novčano primanje zbog toga što nije prijavilo nastale promjene koje utiču na gubitak, prestanak ili smanjenje obima nekog prava, a znalo je ili je moralo znati za te promjene.
3. Ako je primilo novčani iznos veći od iznosa koji je određen rješenjem.

Potraživanja iz stava 1. ovog člana zastarijevaju protekom roka određenog Federalnim zakonom kojim se uređuje zastarijelost potraživanja za odnosnu vrstu potraživanja. Ovi rokovi počinju da teku od dana kada je u upravnom postupku postalo konačno rješenje kojim je utvrđeno da isplaćivano primanje, odnosno korištenje drugog prava ne pripada ili da pripada u manjem obimu iz stava 1. tačka 1. i 2. ovog člana, odnosno od dana kada je izvršena posljednja nepravilna isplata iz stava 1. tačka 3. ovog člana.

Lice iz stava 1. ovog člana dužno je da vrati novčano primanje odnosno protivvrijednost za iskorišteno pravo, najviše u iznosu primljenog za posljednje tri godine računajući od posljednje isplate odnosno korištenja prava iz ovog Zakona na koju nije imalo pravo.

Obaveza vraćanja nepravilno isplaćenih iznosa odnosno protivvrijednosti za iskorišteno pravo postoji, bez obzira nato da li je rješenje kojim je tom licu pravo priznato, poništeno ili ukinuto.

Za nepravilne isplate odnosno nepravilno korištenje prava iz ovog Zakona koje su nastale kao posljedica greške organa koji je vodio postupak, nepravilno isplaćena sredstva odnosno nepravilnog uvođenja u pravo nadoknadit će organ koji je učinio grešku i odgovarajući iznos doznačiti na račun organu koji obezbjeđuje sredstva za određeno pravo.

Član 280.

Lice kome su isplaćena novčana sredstva za ostvareno pravo prema ovom Zakonu, a ista nisu namjenski utrošena ili predviđeni projekat nije do kraja realiziran u datom roku ili su utvrđene određene nepravilnosti ili odstupanja od realizacije projekta za koji su isplaćena novčana sredstva, dužno je vratiti primljeni iznos.

O povratu sredstava iz prethodnog stava, odlučuje Ministarstvo posebnim propisom.

VIII KAZNE NE ODREDBE

Član 281.

Novčanom kaznom od 500 do 2.000 KM, kaznit će se za prekršaj odgovorno lice u nadležnom prvostepenom organu ako izvrši rješenje koje podliježe reviziji prije isteka roka za reviziju, odnosno na koje nadležni organ koji vrši reviziju nije dao saglasnost, osim ako ovim Zakonom nije drugačije propisano.

Novčanom kaznom od 1.000 do 2.000 KM, kaznit će se član ljekarske komisije predviđene ovim Zakonom ili drugo lice koje namjerno ili iz namara izda nalaz i mišljenje ili potvrdu sa podacima za koje zna ili je mogao znati da su lažni.

Lica iz prethodnog stava biti će odmah suspendirana i ne mogu biti imenovana u bilo koju komisiju ili tijelo koje ima istu ili sličnu nadležnost.

IX PRELAZNE I ZAVRŠNE ODREDBE

Član 282.

U roku od 3 mjeseca od dana stupanja na snagu ovog Zakona, Vlada Kantona i nadležna Ministarstva donijet će akte iz svoje nadležnosti predviđene ovim Zakonom.

Član 283.

U roku od 30 dana od dana stupanja na snagu ovog Zakona, prvostepeni organi će donijeti rješenje o priznavanju prava, ukoliko ispunjavaju uslove iz člana 7. ovog Zakona, za vojne invalide, članove porodica šehida - poginulih boraca, demobilisane borce i porodice umrlog ratnog vojnog invalida kojima je pravo na zdravstvenu zaštitu bilo priznato u skladu sa Federalnim propisom.

Član 284.

Ratni vojni invalidi kojim je, do stupanja na snagu ovog Zakona, posredstvom državnih organa, izvršeno uklanjanje arhitektonsko-urbanističkih barijera za ulazak i kretanje po stanu u invalidskim kolicima u stambenoj zgradi u kojoj stanuju, smatraju se da su iskoristili pravo iz člana 158. ovog Zakona.

Član 285.

Lica iz člana 2. ovog Zakona kome su dodijeljene novčane pozajmice ili bespovratna sredstva za otvaranje radnih mjesta i novčane pozajmice ili bespovratna sredstva za rješavanje stambenih potreba, a nisu uredno izvršili povrat sredstava ili ne izvršavaju redovno preuzete obaveze vraćanja dodijeljenih sredstava, do izmirenja svojih obaveza po ovom osnovu ne mogu ostvarivati prava propisana ovim Zakonom izuzev prava iz člana 6. tačke 1., 2., 3., 4., 12., 19., 23., 25. i 27.

Član 286.

Danom stupanja na snagu ovog Zakona prestaje da važi Zakon o dopunskim pravima branilaca i članova njihovih porodica Bosansko - podrinjskog kantona Goražde („Službene novine BPK Goražde“, broj: 9/07 i 14/08).

Sve radnje i postupci započeti po Zakonu iz prethodnog stava, biće okončani u skladu sa njegovim odredbama.

Član 286. a)

Tumačenje odredbi ovog Zakona vrši donosilac, a provedbene propise donosi Ministarstvo za boračka pitanja BPK Goražde.

Član 287.

Ovaj Zakon stupa na snagu osmog dana od dana objavljivanja u “Službenim novinama Bosansko – podrinjskog kantona Goražde”.

**PREDSJEDAVAJUĆI
SKUPŠTINE BOSANSKO-PODRINJSKOG
KANTONA GORAŽDE**

Suad Došlo